

الأعمال الشعرية الكاملة

مكتبة جزيرة الورد

اسم الكتاب: الأعمال الشعرية الكاملة

إيمان بكري

رقم الإيداع: ٢٠١٠/٢٢٧٣

حقوق الطبع
محفوظة

مكتبة جزيرة الورد

ميدان حليم خلف بنك فيصل الرئيسي شارع ٢٦ يوليو من ميدان

الأويرا

الطبعة الأولى
٢٠٠٩

ت: ٢٧٨٧٧٥٧٤ م، ٠١٠٠١٠٤١١٥ / ٠١٠٠٠٤٠٤٦

إميليا نيكيري

الأعمال الشعرية العامية

مكتبة جزيرة الورد

ميدان حليم خلف بنك فيصل شارع ٢٦ يوليو ميدان الأوبرا

ت: ٠١٢٩٩٦١٦٣٥/٠١٠٠٠٠٤٠٤٦/٠١٠٠١٠٤١١٥/٢٧٨٧٧٥٧٤

شارع محمد عبده أمام الباب الخلفى لجامعة الأزهر

عجایب یا زمن

إهداء

إلى روح أبي
علمتني يابا باقول الحق
وإمتي أقول الآه
وإمتي أصرخ لأ
وفوتني في الكون
نازل معافرة وزق
وف جوف زمن مجنون
على راسي نازل دق
بيكي بصوت مخنوق

وقلوب حجر ما ترق
ضاق يابا بيّه الكون
مش لاقى فيه ولا شق
ده زمانا يابا زمان
أخرس جبان ملعون
الحق فيه اتنسى
والعدل مش موزون
والقاضي حكمه نفذ
فيّه وأنا المطعون
ووحوش بقت بوشوش
على كل شكل ولون
من غلبى يابا بقول
ويكون بقى اللي يكون
ده أنت اللي ميت حى
وأنا بالحيا مدفون

الشاعر

شاعر أنا

زادی وزوادی قلم

ساعة ما يشتد الألم

أجری وادورع الورق

لحظة قلّق ما بتنخلق

إلا في أهاتي ووحدتي

ساعة ما بيلع دمتي

وفي ليل سكاتي ووحدتي

بتدوب حروفي جوّه جوفي

بتنصهر وتتخنق

وكلامي يبقى رصاص وعائز ينطلق

يصيب يدويّ جوّه قلبي

بيحرقه ويينحرق

شاعر أنا

زادى وزوآدى قلم
عائش وبحلم بالأمل
أخضر ينور دُنيتى
مهما الزمان حاول يلخبط خطوتى
عمرى ما اتوه عن سِكتى
بحلم بدنيا محندقه ومزوقه
طिलाها إيدي وضحكتى
تعلّا تجلجل فى السما
والكل يفرح مش يدوبك بس أنا
شاعر أنا

عيب

يا بنت بلدى عيب لما اللجام حيسيب
يسترخصو كى الناس
في بنطلون مزنوق وبلوزة شبر لفوق
ولا حتى في الجمباز
عريتي تحت وفوق ولا عدشي عندك ذوق
ولا حتي فيه إحساس
لحم الخروف مذبوح بنجيه بعد الروح
ما تحصل الأنفاس
ولحمتك بالكوم دكان وطول اليوم
مفتوح لأرخص ناس
يخرب زماناً زمان كأن عمر ما كان
لنا أصل ولا أساس

مين ليّه

يا حلوة يا أمُّ ضحكايه
يا أجمل حلم جوايا
يا عُقد يا قوت ودلايه
على صدرى ملاليّه

يا شمس وجايّه بتقرب
بتيجي في لحظة وتغرّب
تغيبي مهما حتغيبي
مسيرك ترجعي ليّه

يا تسبيحه في ملامحنا
وقلب أخضر يسامحنا
نخاصمها .. تصالحنا
بنظرة شوق وحنينه

يا صافية القلب والنيّة
حمامك خاصم الغيّه
وأيامه ماهيش هيّه
وطال شوق الملاغيه

يا نسمايه وبتعدى
علي قلبي وبتهدي
تداوي الآه وتسقيني
ولا تحوأ بحور فيّه

يا شجرة نور بتتوضا
بمية نيلك الفضة
تصلّي الفجر تدعيلك
وتدعي بالهُدى ليّه

يا جسر أتمد في عروقي
ما بين العتمه وشروقي
خطاوي تدب ف عروقي
بخاف واهرب والاقيني
في ليلك دمعته منسيه

يا أرض الحور .. يا طارحة زهور
سنابل نور تمد جسور
تدب الروح في أرضي البور
وترويلي صحاريه

يا فاردة شعرك الليلي
علي نهاري وعلي ليلي
ده حسنك والله رباني
وعلمي ورباني
بغيب وأبعد علي عنه

يا تكعية عنب خضرا
جهاتك الأربعة خُضره
تمد الحب ضليله
تساعى الأهل والعيله
وتصفي لي لياليه

يا فارده شراع معديه
ما بين الشط والميه
تنادى ع المراكبيه
أنا ليكم ومين ليه

عدالآهات

عدالآهات يا زمن
سهم الهوى صابني
خذني لبحور الشوق
وفي وسطها صابني
وأنا مانيش بحار
ولا كنت يوم عوأم
وليقطني وسط الموج
تايه مع التيار
بصيت لتحت وفوق
ويميني وشمالي
ما لقيتشي حتي طوق
ولقطني وحداني
إيه اللي كان جانبي

عد الآهات يا زمن
سهم الهوى صابني
عد الآهات يا قلم
واكتب في كُرَاسي
لا فرحي يوم اكتمل
ولا مركبي راسي
حييت زمان إنسان
قلبه حجر قاسي
جمعت له مهره
لُولى وألماظي
وعملت حُبّه تاج
زيّنت بيه راسي
والشوق عملته حجاب
فاتني حبيبي وغاب
ولا حتى جهُ يواسي

لا زمن صفالي في يوم
ولا حتي دول ناسي
وسهرت وياً الآه
ودموعي حُرَاسي
عد الآهات يا قلم
واكتب في كُرَاسي



عد الآهات يا ألم
غنيَّ وسمَّعنا
ده كل جرح بألم
ولكل آه معنى
الحلم غاب عني
وحروفي منسيه
وكلامي تاه مني
ولا عادلهوش معنى
موال جروحي بكَيَّ

والصبر فاض يَّه
وصرخ بعزم ما فيه
دي الآه بتوجعنا
لا لقينا يوم الدوا
ولا حد يسمعنا
تُهنا مع التايهين
ويامين يرجعنا
عد الآهات يا ألم
غنى وسمعنا

أنطرطور

اصحى يا خينا واسمع منى
قصيدة بعيدة تمامًا عنى
فيها كلام موزون ومُقَفِّي
بس يكفي ميت مليون
لو راح تفهم معني كلامي
ابقي قابلني في نفس الساعة ونفس اليوم
هيه ثواني وإنسي كلامي
وشد لحافك كمِّل نوم
حاسس إني اليوم تراللي
عقلي مونون قوي مع إني
واكل طبق الفول ولا كمنى
وماشي متنح
زي ما أكون واحد مسطول

وأطرش وسط الزفة لكنى

متهيا لي والله أعلم

إنى خلاص على وش جنون

ماشي بغني ليل ونهار

طار.. طار .. عقلي احتار

طور .. طور.. أنا طرطور

لا .. أنا طُور

ماشي في ساقيه بنت لذينه

حالفه يامين إنها ما تدور

غموا عنه .. نسيتها في وشي

بلعت لساني وحتى ودانى

ماهيش لا زمانى

بقيت مهطول

إنت جنابك فاهم حاجة؟

طب فهمنى يمكن أفهم لما تقول

مين الدح؟ ومين الكخ؟ ومين مظلوم؟

حذر..حذر

زي تمام فوزرة عبيطه بالمظبوط

هى البيضه كانت الأول

والا يا سيدى كان الكتكوت

ولا الديك هو المسئول

جينا لعبنا آدى البيضه

حذرناها وفزّرناها

وسلقناها وقشرناها

واللى أكلها واحد مسعور

واحنا ضحكنا على خبيتنا

لما وقفنا صفوف ف طابور

نفسنا يبجي علينا الدور

والكاس واقفه ولا بتلف ولا بتدور

دنيا يا ناس اتشقلب حالها

ولا عارفين إيه اللي جري لها
حتي ميزان العدل اتمرجح مش موزون
مش قلت لكوا إن أنا مجنون
غني معايا وقول علي طول
طار..طار..عقلي احتار
طور..طور..أنا طرطور
أنا طرطور..أنا طرطور

الجمعيات

طوابير طوابير طوابير	قدام الجمعيات
م الصبح يا عيني واقفين	رجاله علي ستات
أنا شفت الست سنيه	سورقت ف الحته داهيه
فناقت جريرت يا ولاد	علي بيت الخالة جمالات
قالت ده معدشي مجاعه	طلعت في الحته إشاعه
في صابون وفراخ ولحوم	بلديه ويمكن فـول
جربوم نسوان الحارة	ولا يا بنى أجـدع غـاره
يخذوا الدعم المقروض	يوصلهم بالمظبوط
مرت ساعات وساعات	وبيان الجمعيات
مقفولة على التموين	وأهو واحد م الواقفين
م الغيط أهو فرقع مات	في سبيل الجمعيات
لُكميه ف زهر سنيه	وقلم علي وش عليّـه
اتحشرت فيها وليّـه	واقفه ع الناحية الثانيه
جريت قال بتصالحهم	وبسرعه خدت مطرحهم
لمحتها واحده عـفيه	فيها صحة ومتربيه

وعديك وقامت خناقات	ع الشرطة وع الجنايات
والناس بقوا بالألوفات	شلاليت وصريخ وصوات
فيها ناس شيك متربيه	وسرينه وجت عربيه
لابس بدلة بصففين	وشوفير معرفش منين
من واحد سلطه خفيه	وف إيده جواب توصيه
بفراخ كل الجمعيه	نفسه في مرقه ملوخييه
علي ناس رايعين جايين	وف ساعه راح التموين
لكن زي الدبابير	مايقنفوش في الطوابير
ناقص حبه ويتقهروا	والناس واقفين وبيغلوا
لكن مين يسأل فيهم	على حق يا عالم ليهم
باكياس مليانه حجارة	واهو رجعموم أهل الحارة
أم شففنيق الدلالة	جريريو يدورأع الخالة

ونقول يا مين

ونقول يا مين .. يا مين

ودة يرضي مين

دي مصر أم الصابرين

صبرت وفاض الصبر بيها

اتألمت ما اتكلمت

ودموعها سالت والجبين

ميّل حزين

على ابن ليها كان لها ستر وغطا

شب وحبا على أرضها

وكانت سبيل

ورضع من النيل وارتوى

شمس وهوا

وكان يوماتي ينام يكن في حضنها

وكانت له ضلة ونور بيضوى ع الجبين

الواد حزن .. ضلت خطاه

وكثير معاه تاهوا ومشيواف سكته

رايحين لفين

مصر اللي كانت إيد بتحمى م الخطر؟

مصر التاريخ إالى انكتب وإلى انسطر؟

مصر الأمان مصر العبور واللي عبر؟

مصر اللي حابت ع الضنى

وقالت له حابس م الخطر؟

إيه اللي صابك يا وله؟

نازل عليها بقسوتك

ولا عدت بتكذب خبر

اللي يمص في دمها

واللي بينهش لحمها

واللي طعنها في قلبها

وسهام بترعي في جسمها زي المطر

هو الوفا سوقه جبر
ولا انتوا عالم مش بشر
أنا من هنا بصرخ وأقول
وبنادى ع السبعين مليون
كل واحد مننا لازم يفوق
ويكون إدين تمسح دموعها وخدها
من حقها نرفع لها ثاني الجبين
ونقوم نطهر أرضها
من كل خاين أو جبان
من حقها نصون ترابها وعرضها
ونعيد لها ظبط الميزان
ما تقولشي إنت ولا هوّه ولا أنا
ده أنا مصري ودى مصرى
ومصر مش أرض وسما
ولا هيش حدود

مصر الحضارة والهرم وتاريخ جدد

مصر العزيمة والإرادة

والأمان لازم يعود

مصر سفينة ماشية بينا

وسط موج بيصدها

ولوح تغرق يوم حنغرق قبلها

ونضيع ف بحر مالوش حدود

مصر الإرادة والأمل

مصر الشباب

دي مصر عيسي ومصطفى وفاتحة كتاب

مصر حلم قديم ولازم يتولد

من تاني جوه في قلبنا بعد الغياب

تعالوا يللا قربوا من حضنها

داووا الجراح

واتوضوا بترابها وصلُّوا

واطلبوا منها السماح

دى مصر أرض المغفره

طول عمرها كانت لنا أرض السماح

ونقول يا مين..؟

حلم

وحلمت أنا ويجعله خير

حلم وكان ف الفجرية

لقتيني قال أمير كبير

حواليه م الخدام ميه

قاعد ف قصر رخام عظيم

وجنبي ميت ألف حورية

فجأة لقتيني ذليل أجير

وف وسط شلة حرامية

بييرطعوا ف قصري الكبير

وأنا حتى مش لاقى المية

ولقتيني طور عمال بدور

في ساقية ومغمى عنه

وبلعت صوتي جمرة نار

نزلت في جوفي ومحميه
وكتفوني وقالوا لي عوم
وحبال في أيدي ورجليه
وكل ما آجي أقب وأقوم
واحد يبجي يغرق فيه
وصبيه سمرا واقفه بعيد
حزنانه وبتبكي عليه
بصيت لقيت كده شيخ كبير
ويدقن فضه نده ليه
قام مد إيده في وسط الموج
وقاللي تبت قوي فيه
خبط علي كتافي وقاللي
قوم يا بني فوق رد عليه
متخفش قوم للم خوفك
وأقبلها مني دي هديه

وعطاني شال أخضر وكان

ف وسطه نجمع ملالية

قبل ما أمد ايديه لقيت

فجأة بدال الإيد ميه

وصحيت أنا من النوم مخضوض

بصيت بسرعة حواليه

لقيت غطايا ماهوش موجود

وسريري متغرق ميه

المحاكمة

نصبوا المحاكم والتاريخ
كان قاضي عادل من زمان
قلب دفاتره وبص وقال:
إنت يا إنسان مدان
ألف تهمة وتهمة ليك متوجهه
عندك كلام؟ جاوب قوام
مدان صحيح أم غير مدان؟
ووقفت مقطوع اللسان
جوه القفص من غير كلام
قال لي قوللّي قبله إسمك يبقي إيه؟
قلت له أول حروف اسمي فاكرها
نص اسمي عبد والثاني ماتعدش كثير
عبد روحى .. عبد غيرى

عبد لقمة عيش تجيني

عبد لصغير أو كبير

عبد والأسياد كثير

قاللي عمرك... يعني سنك يبقى كام

قلت له من غير علام

السن عمره ما كان سنين بتمر بينا والسلام

ف الزمن ده عمرنا ما بنحسبوش

ولا بنعشوش بس عايش

قاللي عايش فين يا سيدي

يعني سكنك يبقى فين؟

قلت له ف كل شارع أي حارة

ف كل عطفة أنا ليّه بيت

بس بيتي ما بيدخلوش إلا العقارب والديدان

أصله بيت من غير بيان

قاللي شغلتك بالضبط إيه؟

قلت له: طرطور يا بيه..

«وزغدني حارس كان ورايا

كان في بينه وبين قفايا عشم قديم»

قاللي ماتطولش تانى في الكلام وترد علي قد السؤال

خبط القاضي بشاكوشه

وقال سكوت

مش عايز اسمع همهمه أو صوت كلام

بص لي القاضي وقال

يللا قوم إحلف بيمين

قلت له أحلف بيمين؟

قاللي برب العالمين

قلت له غضبان علينا من سنين

قاللي يعني يكون كلامك كله حق

وتجاوبني إما أيوه أو بلا

قلت له الحق ولاً اللا ضاعوا من زمان

خلصني قوللي إيه أساس الاتهام؟

قاللي أول تهمة ليك بتقول جبان

قلت له: عمرى ما كنت ف يوم جبان

والجبن عمره ما كان في يوم من طبعنا

ولا كان بيجرى ف دمنا

بس النهاردة بيتولد

جوانا قبل ما نتولد

وأنت شاهد ع الكلام

قاللي خاين

قلت له: طب خنت مين؟

قاللي: نفسك

قلت: تاهت منى من كتر الزحام

قاللي ليه لونت وشك ألف لون

قلت له: علشان أكون

لأجل ما ألقى لقمه تدخل جوه جوفي

لأجل ما اهرب من خضوعي ومن كسوفي

ألف مرة كنت عايز أقول ولكن

إللي كان بيحوشني خوفي

قاللي: خلاص يعني ما فيش فايده ف كلام

قلت له: والكلمة دي قالها زمان

واحد وكانوا من حبايبك القدام

قاللي : خلاص يعني اعترفت بتهمتك

قلت له: بقي أنا اعترفت بذمتك؟

قال: وبتعترف إنك مدان

قلت له: أحكم يا قاضي عليه يلا

بأي حكم والسلام

قال: حكمت يا إنسان عليك

تفضل كده تايه وتايهه سكتك

لحد ما تدلك عليها خطر تك

تفضل كده من غير ودان

من غير لسان

قلت له: طمعان يا قاضي ف رحمتك

قاللي خلاص يا بني مافيش فايده في كلام

«والجلسة رُفعت من زمان»

أنا إنسان؟

أنا إلهي كنت ف يوم إنسان
كان لي وجود.. إحساس وكيان
كنت بقول اللا على حق
مش منظره.. ولا بس كلام
كنت جرى وشجاع ما اسكتشي
عمري ما كنت أشوف الحق
يضيع قدامي وأبلع صوتي وما اتكلمشي
كنت براعي الناس والجيره
لا أعرف كره ولا أعرف غيره
فين دلوقت راح الانسان
الإنسان ما بقاش إنسان
بقي باترينه مخبي وراها
ميت مليون وش بألوان
بقت اللقمة ييجري وراها

بالمشوار وف أي مكان
بقي جلاد كرباجه في إيدہ
جوه ف قلبه حجر صوان
فين دلوقت راح الانسان
الإنسان ما بقاش إنسان
بقي شيء تاني
شيء وكأنه عمره ف لحظة ما كان إنسان
مين بيقول إن أنا إنسان
أنا مش إنسان
وأنت كمان مانتش إنسان
الإنسان ما بقاش إنسان

بغني لصر

أنا العاشق بلاد النيل
ونقطة ف ميتة الصافية
وحرف وغاب ف سطر كتاب
بيحكى لنا تاريخ ليكي
عشقت التوته والساقية
وحدوته هوي باقية
في موالي ولياليكي
علي صوت ناي بغنيكي
ما أنا ابنك وأنا زندك
بشيل حملك علي أكتافى
ووقت الشدة تلقيني
عشان خاطرك أبيع عمرى
وقلبي كون يساعيكى
ده أنا منك وأنا ليكس بغنيكي

وأنا قمحك وأنا رمحك

وأنا رمله ف صحاريكي

تشيلني الريح تشرقني تغربني

بترميني علي شطك

تلاقيني وألاقيكي

تضميني علي صدرك

تدوسيني برجليكي

ما أنا حرك وأنا بردك

أنا هاتور وبأؤونه

أنا معجونة ف المونة

عشان أعلي واعليكي

ده أنا ليلك وأنا نهارك

أنا إللي مشي ف مشوارك

وخذتيني في تيارك

نسيت نفسي وتاه دارك

قوليلي فين أراضيك
بناديكي ما أنا صوتك وأنا همسك
وأنا أمسك وأنا شمسك
وفجر وليد علي إديكي
ده أنا منك وأنا ليكي بغنيكي
تعالى للمي جرحي
عشان خاطري بلاش بدري
أشوف الدمع ف عنيكى
تعالى ومدى لى إديكى
وضمينى فى أحضانك
وخلينى أكون جارك
وخلينى أكون بسمه
أكون نسمة.. أكون ضله
وشال أخضر يدفيكى
ده أنا منك وأنا ليكى بغنيكى

ما أنا الحارس وأنا الفارس
وحبي سلاح عرق عامل
وإيد فلاح بعزم ما فيه بيرويكي
وأنا الجندي بحبيكي
ودمي حنة ف إديكي
وكان نفسي أطير بيكي
علي جناحي وأنا نايم وأنا صاحي
ورغم الجرح أداويكي
وأجيب ليكي شعاع الشمس والنسمة
أشبههم بساط ليكي
ما أنا شراعك وأنا دراعك
وأنا القارب حديكي
بحور الغربة مهما تطول
مسيرى ف يوم حلاقيكي
وحهديلك قمر مسحور

وحفزل من خيوط النور
نهار يهدى خطاويكى
ده أنا منك وأنا ليكى بغنيكى
ده أنا رسمك علي كفوفي
علي قلبي وف حروفي
علي دفوفي بغنيكى
وأنا مرسومه في كفوفك
وهمزة وصل في حروفك
حروف عطفك حروف وصلك
ما أنا كتابك وأنا فصلك
وأنا زارعك وأنا حاصدك
وأنا وردك وأنا نصلك
وأنا صورتك وأنا أصلك
وأنا عود فرع من أصلك
عريس أسمر طالب وصلك

وعهد عليه أراعيكي
ده أنا منك وأنا ليكي بغنيكي
لجيب طرحه علي قدك
وتوب فرحة يزين قدك
ومين زيك ومين قدك
ده ندر عليه لارقيكي
وأجيب عصفوره م الجنة
في إيدها حفنة م الحنه
ف يوم الفرح واتحني
علي أعتابك وأحنيكي
ده أنا منك وأنا ليكي بغنيكي

ديدي إيه

أغنية غامضة تباري الكل على النغني بها رغم هبوط مستواها

ديدي إيه.. ديدي واه
غَنِّ يا حيله وقولوا يا ناس
ديدي إيه.. ديدي واه
حاجة جميلة تخلي الواحد
يرفع رأسه يقول الله
أما مصايب واحد خايب
خلاّ الكل يقولوا وراه
ديدي إيه.. ديدي واه
كل ما بفتح راديو ألاقها
وتليفزيون بيحفظُ فيها
حاجة عجيبه وحاجة غريبه
كل مشاكل الكون إنحلت

لما أتغنت ديدني إيه.. ديدني واه
غنى يا حيله وقولوا يا ناس
ديدي إيه.. ديدني واه
واه على جرح كرامه بينزف
كل دقيقة وعرض عروبه بقى ينداس
واه على راية ظلم بتعلا
وراية حق ماليها أساس
هات أستيكه وامسح بيها
تاريخ أجدادك مصطفى كامل والنحاس
وانسى حضارة شعب بحاله
لما اتغير حاله اتبدل
إيه حيفيده؟ ما عدشي خلاص
غنى يا حيلة وقولوا يا ناس
ديدي إيه.. ديدني واه
واه على دمك لحمك عرضك
صبحوا مشاع ولا فيش إحساس

هات سكينه تلمه يا أخين
وادبح فينا كل شعور أوِّي حماس
وابلع صوتك علشات قوتك
واوع يفوتك تبقى مداس
وارمي سلاحك ربح عقلك
انسى كتابك والكراس
وإياك تزرع ثاني ف أرضك
ولا تقرب يوم م الفاس
وأخلع توبك وأمشي اترقص
على مزيكة الروك والجاز
غنى يا حيله وقولوا يا ناس
ديدي إيه.. ديدي واه
واه على طفل ف إيده حجاره
وإحنا هنا بطبلة وزمارة
وهوَّ ف صدره بارود ورصاص
واه على حالنا لما رضينا

نطاطي ف يوم ونغمی عنينا
وكتاب لینا کریم ینداس
واه علی بکره وع الأحلام
عالم کله ماشي لقدام
وانت یا عیني واقف محتاس
واه علی الکاس إلی شربناه
ذل وخزي إعودناه
وکل ما یفضي بنملا الکاس
واه علی دم برڈ في عروقنا
وکلمة حق بقت تخنقنا
وخسيس إیده بقت تنباس
غنی یا حيلة وقولوا یا ناس
ديدي إيه.. ديدي واه

مخي يا ناس

وياريت ألقى معاكم حل	مخي يا ناس قربت اتجن
ولغات بفهمها وبالعافية	بين عربي وفيزيا وجغرافيا
قولوا ده كله إزاي يتلم	وتاريخ ورياضة وفلسافية

حذف وعطف وجزم وكسر	نصب ورفع وشد وجر
تهت ما بين فعى ومفعول	حذفوا العلة وأنا المعلول
وده ليه مالوش قولوا الأسباب	وده له محل من الإعراب
مخي يا ناس قربت اتجن	بصراحة قربت أكتب ذم

كرهت فرنسا مع يوغوسلافيا	والجغرافيا جابتلي الكافية
تهت ما بين أفريقيه وآسيا	ورياح باردة ورياح دافيه
وده كم طوله اسم الله عليه	قوللي روافد البحر ده إيه
مخي يا ناس قربت اتجن	استهويت وركبني الهم

دي لغات خلّت عقلي فلو	بين جود مورنج أو بونجور
وبوركواه بتسأل مسيو	مش حافظه غير نو وأوكيه

وإزاي حفهم بتقول إيه وأنا جى نى بارل با فرانسيه
بس الإغ بقولها بفن مخي يا ناس قربت اتجن

بين جا وجتا أو ظا أو ظتا أو قا وقتا أنا متلخبطه
مهما حتشرحوا فيها سنين برضه بتحلف مش فاهمين
لو غاريمات دي ومتأروطة أس وتكاعيب متعفرته
وخط بياني ما عندوش دم مخي يا ناس قربت اتجن

كيميا وفيزيا وهما الجوز طلعا روحنا جابولنا كابوس
حطي الميه على المحلول رجي شويه حيطلع فول
قوليات أحماض دربكه عدسات أومحاليل فبركة
وأشعه حمرا وزى الدم مخي يا ناس قربت اتجن

وتاريخ نازل لت وعجن رغي وبس في سيرة الناس
وده عمل أبصر إيه ونفّوه وده كان كُخه ف هوجه شلوه
ونابليون بوناپوت افترى جاله جفاف وماخدشي الدوا

وأنا ما بطقشي يا ناس النم مخي يا ناس قربت أئجن

جُوه الفصل علب سردين نص قاعد والباقي واقفين
مهما حتشروا مش فاهمين ولا حتكتبوا مش شايفين
دي مناهج صعبة مُطوله وكراسي عوجه ومتعورة
وأسئله بايخه ومالهاش حل مخي يا ناس قربت أئجن

أنا مش نبي

أنا مش نبي.. ولا نيش رسول
ولا نيش ولي.. وما نيش جسور
ولا كنت ساحر.. ولا مسحور
ده أنا يادوب إنسان بسيط
إسمي محمد عيسى موسى مصطفى عبد الحميد
عمري ما كنت ف يوم عييط
علشان ف يوم أحلم أكون
زي الأمير والبس حرير
وأقعد في قصر من الرخام
وأتغدى وأتعشى حمام
وأمر وأنهى ف الصغير والكبير
ده أنا يادوبك بعرف أخطف لُقمتي
بعد العذاب بعد الشقا
مرة طرية مفرقة

وساعات بنام من غير عشا
ودي مسأله بتحصل كثير
لكن الحقيقة المشكلة هي الغطا
ساعة ما باجي أنام ليلاتي ف فرشتي
لحافي كش يا ناس قوي
ولا عدشي واصل ركبتي
مع إني كنت حريص ودائماً
كنت أنام وانا تاني تحتي ركبتي
وحقول بجرأة ومش ح اخاف
أنا نفسي يبقى لي لحاف
وازاوي راح أقدر والنبي
إني أجيب لي لحاف كده
وأنا مشي نبي.. ولا نيش رسول
ولا نيش ولي.. وما نيش جسور
ولا كنت ساحر.. ولا مسحور
ده انا يادوب إنسان بسيط

اسمي محمد عيسى موسى مصطفى عبد الحميد

بحلم وحلمي بسيط قوي

مش مستحيل

بحلم بشجرة صغيرة

تطرح لي تين

وعليها عشر طيور صغير مش كبير

وعايز لي خيمة محندقه

متر ف متر مربعة

وحته نونو من السما و حبة سحاب

وياريت كمان حفنة هوا مفهاش تراب

وياريت كمان أم العيال

تبقى تيجي تزورني مرة في السنة

يا هل ترى الحلم ده أصبح محال

وإزاي راح أقدر والنبي

إني أحقق حلمي ده

وأنا مش نبي.. ومانيش رسول

ولا نيش ولي.. ولا نيش جسور

ولا كنت ساحر.. ولا مسحور

ده أنا يادوب إنسان بسيط

اسمي محمد عيسى موسى مصطفى عبد الحميد

بحلم ألون كل حاجة بفرشتي

على قد إيدي وقدرتي

وألّم ياما قلوب كثير متلوّته

وأغسلها غسلة كويسة

وأمسح دموع الشقيانين

وألّم كل الشحاتين

وأخذ زكاة الأغنيا

وأعمللهم حفلة فطير

وأرفع بهمه ومجدعه

نسبة ذكاء الأغبيا

وأعيد بناء الأبنية

وأصْحَى كل المسطولين
بالذمة مش حلمي جميل
وإزاي راح أقدر والنبي
وحدي أحقق كل ده
وأنا مش نبي.. ولا نيش رسول
ولا نيش ولي.. ولا نيش رسول
ولا كنت ساحر.. ولا مسحور
ده أنا يادوب إنسان بسيط
اسمي محمد عيسى موسى مصطفى عبد الحميد
بحلم بعيل يتولد ساعة الآدان
يشبه تمام ابن الوليد
بشجاعته وبقلبه الحديد
عادل تمام يشبه عمر
ويعيد لنا ظبط الميزان
وجريء ويشبه عنتره
ف جمال سماره وطلعته

إن قولنا آه يجري هوا
ويجيب لنا حق الدوا
وأشعر بقربه بالآمان
معقول يا ناس الحلم ده
يصبح حقيقي ولا أنا
عاش وبحلم بالمحال وازاي راح أقدر والنبي
إني أجيب عيل كده
وأنا مشي نبي.. ولا نيش رسول
ولا نيش ولي.. ولا نيش جسور
ولا كنت ساحر.. ولا مسحور
ده انا يا دوب إنسان بسيط
اسمي محمد عيسى موسى مصطفى عبد الحميد

أهل المغنى

عمنا بيرم قالها زمان
يا أهل المغنى دماغنا وجعنا
دقيقه سكوت لله
وإحنا كمان قلناها وراه
يا أهل المغنى ودانا.. دماغنا
روحوا بقى ومنكم لله
المزيكا دي فن وذوق
مش برطمه وكلام مسلوق
ولا تنظيط من تحت لفوق
مطرب ييجي وعامل نفسه
حليم في زمانه
ناكش شعره ومتهيأله
إن الواد بقى مالي مكانه

لأ.. ولابس لك سلسلة فضة

لأجل ما يحرس حسن جماله

فجأة يبرطع يصرخ يجري

وشباب يصرخ ويقول ثاني

واجري أدور أنا على قطنه

لأجل ما بيها أسد وداني

بين الآه والإيه والأوه

ضاعت المغنى وضعنا يا هووه

التعليم

يا وزارة التـعليم الغى بقى التـعليم
وريحونا يا ناس
فصول بقت بالراس ولا عدشي باقي مكان
لقلم ولا لكراس
وحضانة للخناشير وغلبنا ف الطباشير
يكتب ولا إحساس
وعيالنا محشورين جوه ف علب سردين
قاعدين بكل حماس
ولالكلام فـاهمين ولا حتى صوت سامعين
مافهمش غير الراس
منهج بقي بالكوم وياريتـه كان مفهـوم
لأبلة أو أستاذ
ويا ريتـها تنفع يوم كتب ماليـها لزوم
غير تتعمل قرطاس

في الشهر ألف قرار وقرار بيلغي قرار
وياريتة كان له أساس

يا هل ترى التعلیم بقى ملك خاص لمين
ما تفهمونا يا ناس

السكوت محال

يا أمه ليه بتكتفيني؟

يا با ليه بتغمى عيني؟

نفسي أقول كل الكلام

السكوت بقي شيء محال

ليه ف زمانكوا قلتوا لأ؟

ليه في زماناً ما في حق؟

ليه زمانك غير زمني؟

فين كلامك؟ فين لساني؟

أنت شايف وأنا شايف

وانت وانت وغيرنا شايف

واللي واكل واللي شارب واللي نايم

ليه بيسرق مني قوتي وقوت عيالي؟

واللي راكب ليه بيفرم اللي ماشي

ياللي قاعدين ع الكراسي

وبكلامكوا وجعتوا راسي

ليه اتسرعتم

ليه اتقلبتم ليه وحوش

مين ح يلحق مين يحلق مين يحوش

مين يا ناس

ياللي قسّمتم بلدنا ورث أبوكم بالمقاس

ده يميني وده يسار

ده شيوعي وده حمار

إللي حاصل ده حرام

مصر طول العمر كانت

أم لينا كلنا

وانتورا بس ولاد حرام

ياللي راكب البويك

ياللي شارب السيجار

ياللي قابض بالدولار
إللي حاصل ده حرام
كل واحد خادله كام ملطوش
يلطش بالكلام
لأ يا عالم.. لأ يا هووه
مصر ليها تاريخ كبير ح تضيعوه
ومنين أجيب معنى الكلام
دي الناس كمان استسهلت بس الكلام
كله طائر في الهوا زي الحمام
يطير ويعلا في السما
ويعود ويرجع غيَّته علشان ينام
وطُؤا صوتكم والنبي
عايزين ننام
نحلم بناكل جوز حمام

أحلف يمين

(باللهجة الصعيدية)

لسه صوت أبويا

بيطن ف وداني

ساعة ما كان يجعد يوماتي

جنب باب الدار ينادي

واد ياطه تعال أجريك الكتاب

كنت أروح أجعد حداه

وانطج الحرف بحساب

كان يجوللي نام ومصحف تحت راسك

وأوع يا ولدي تخالف يوم ضميرك

أو تعفر يوم جبينك

ود أرضك.. ود ناسك

وأمي كانت في العصري

تجعد وتحكلنا الحكاوي

عن أبو زيد الهلالي
والزناتي خليفه بالغناوي
لساك صداها چوه راسي
صوتها چوه الجلب باجي
والزمن دواره بينا
كيف ما بتدور السواجي
كيف ما بتلف الرحايه
والضحايا ناس كثير
عشش الخوف اللعين
چوه صدر حاوي چواه
جلب ميت من سنين
ضاعت الجمرايه منه
وانطفئ نور الحبين
والناس كثير اتغيروا
والزمان غير كثير

صارت الضحكاية صفرا
والعيون زايغه وجاسيه
والرجال صبحهم جليل
والصغار الولداتهم ف الطريج
لا لجيوا خل ولا صديج
ولا عاد لهم واصل كبير
أما النسا وكيدهم ده عاد
لا يصدجه عجل
ولا بجاله مثيل
ونجول يا مين والخلج طايحين مسعورين
همّلوا ديارهم وناسهم والعلام
نسيوا العلام وعشجوا تزويج الكلام
وبجيوا مثل ركوبه عاصية
إنجول يا مين عتجول شمال
ونجول يا مين علمونا ف الزمن ده

حاجات كثير

علمونا كيف نطاطي لكل ربح

من يومها الراس مطاطيه

ولا عارفين نجيم

واحلف يامين

بابوي وبراس جدي الكبير

إن يوم اليامه حايه

بعد يوم أو تنين

وليه تنين؟ هلست جامت من سنين

رسالة من هريدي

(باللهجة الصعيدية)

سلامات.. يا أهلي يا ناسي يا بلديات
م السعودية ببعث ألف سلام وتحية
لخالتي هريدي وأمي الحاجة البركة صفية
وكمال ألف سلام وشوج
لأهلي في جبلي من تحتيه لحد لفوج
من أسيوط لجنا وسوهاج
ولفرشوط ملعون لفراج
اللي يخلي الولد يهمل
داره وأرضه وأم عياله
لأجل ما يبجي تور يدور
ساجيه ف أرض ماهيش بجياله
أوع ياخال اتكون متكدر
مل اللي بجوله
عجلي مخلبط جاعد أفكر ليل بطوله

صوت أُمّاي ف قلبي ينجرّ
ليه يا ولد مهممل دارك
كاره أرضك ليه وناسك
كنّ يا ولد الله يهديك
ده المال عمره ما راح يغنيك
وايش يساوي مُربة ميه
ونومه هنيه وسط حبايبك وف أراضيك
صح كلام أُمّاي وزين
وعره الغربه وريحها تجيل
خد من جلببي يا خال وصر
بعد الغلب أنا دجت المر
ولاداش يوم ف الغربه يسر
لكن طمن جلبب إمّاي
حاجي وأجيب الفيديو معاي
والفزيون عيكون ملون وبشاشتين
لأجل ما أكيد الكفر بحاله وأمّ سليم
إيوه صحيح الواد عثمان

إبن الحاج سليم وهدان
جاي ومعاود مصر يومين
شيّعي ليّه معاه ياماي
بلاص مش جديم بدوده
وعيش بتاو وفطرتين
ومسك ختام ألف سلام
م السعودية لخالي هريدي
وأمي الحاجه البركه صفيه

وردة إيسه؟

قالولي ورده م الربيع
أوف الربيع
عنوان لندوتنا النهاردة
أنا قلت لسه فيه باناس
ورد حيطرح ف الزمان ده
ولو لقينا الورد مين فينا ح يشمه
ده الورد عنده دم
ولا عدشي بيهمه
من إيد ماليتها الوحلة والطينه بتلّمه
ده الورد حتى الورد
بقي زيناً فضحيه
منظر وشكل وبس
ولا عدشي له ريحه
وإزاي حنزرع ورد
والأرض مسمومة
والدمعة فوق الخد

والضحكة مرسومه
وقلوب ماليها الخوف
في الضلمه مسجوننه
عشقت ليالي الصمت
وبنفس مكسوره
زرعت إديها الأرض
بالذل والخسة
طرحت ندالة وجبن
وديابة مسعورة
سرحوا في عز الظهر
بالبلطة والشومه
لاهمهم حرَّاس
ولا ناس بقُوم صوره
قلعوا عيدان الورد
والتمر والحنة
وخلوا بق السبع
ياخدوا معاه صوره

ما تفوقوا حبه يا ناس
وتصحصحو شويه
ولا انتوا يعني خلاص
بقي دمكم ميه
عشقتوا لون الدم
والدنيا خادتكم
ما بين رغيف وغموس
ديناكوا محصوره
لموا عيدان الشر
من قبل ما تفرع
وإزاي تنبت أرض
والكل بيقلع
دي الأرض بتشابي
وبصرخة مكتوبه
حابوا عليه حرام
خلوني مستوره

كيدهن عظيم

هي: شوفي يا أختي الراجل جوزي

ماشي ينعر ليل ونهار

وكتير يا خواتي حذرتة

وبرضه واخدلي الجذ هزار

مش عارف إن أنا عندي

دراسات علّيا من الجزار

ومسيرتي تقوم زرايني عليه

وساعتها حيعمل فار

الجارّة: لأ يا أختي طوّلتي بالك

شوفي حترسي معاه على إيه

واهو برضه الراجل جوزك

وأبو عيالك نعمل إيه؟

وأدينا بنعلف فيهم ونربيههم

لما نشوف آخرتهم إيه

وأهو همي وهمك واحد

بقوا مناحيس دي جبلة إيه
هي: الراجل م الصبحية مبوا فيه
كأنه بلعله لوحده حمار
عمال بيهزأ فيه فاكرني هفيه
وجتتي يا ختي قايد فيها نار
أنا قايمه بسرعه اتصرف قبل ماليله يبان له نهار
الراجل المتهور قال متصور
إنه بقى شمشمون جبار
الجارة: ليه يعني مهما استقوى
أنت الأقوى فاكر نفسه أحسن من مين
وإن كان جاهل مش عارف فين مصلحته
يبقى ساعتها الحق عليه
وإن كان فرحان متعاقب بالزمارة
هاتيها اثنين
أو كان متعافي الخافي
نسهر فيه يوم الاثنين

النيل يبكي

بلدي.. يا حزن ملين بالدفا

يا نبع للخير والوفا

يا زرع أخضر فيه شفا

بلدي يا جنة ربنا على أرضنا

يا أم المداين والجناين

خضرا تجري ف دمننا

بتتك أنا.. نبضك أنا

صوتك أنا يا حنينه

إبنك أنا.. زندك أنا

فارس وحافظ سكتك

حالف راح أمسح دمعك

اتكلمي يا مؤمنه

ليه الدموع بلمح صداها في ضحكك؟

قلبي عليك يا مصر يا أم الوجود

ده أنا حبي ليكي مالوش حدود

النيل على ضفافك بكى

من قسوة الناس واشتكى

بيقوللهم أنا منكم

بجري هنا من كان سنه

لا يوم شكيت

ولا عمري يوم أنا ضهري مال

من حملكم

زارع أنا.. حصد أنا

وميتي دم بيسري في أرضكم

تروي الورود تطرح سنابل قمحكم

قلبي شراع فارد لكم

ستر وغطا

ده أنا كنت ضلة

وكنت أحلى من القمر

ونسامي ياما إتونس

بيكم وقامت ملّست على شعركم
ليه تجرحوا حارس أمين على عرضكم
بلمح خطر.. غدر.. وقدر
حط ف قلوبكوا يا ناس حجر
آه.. صبري نفذ من ظلمكم
آه.. ضهري أنقسم من حملكم
واقع أنا وف عرضكم
خلوني طاهرة ده ربنا
قال إن أنا أصل الحياة
منكم وليكم أصلكم
يعني أكيد حرجع لكم
بس الأكيد بالشكل ده
حرجع سموم
تجري وترعى ف دمكم

ياماكان

حكولنا من زمان حكايات

كتبناها في كرايسنا

ذاكرناها في أنف كتاب

فهمناها ف مدارسنا

وفاكر كنا نقرا زمان

ونرفع للسما روسنا

عن المصري القديم مينا

وعن سينا وعن أحمس

وعن واحد بطل اسمه

صلاح الدين وعن حطين

وعن غيرهم ياما سمعنا

حكاوي كتير

كانوا بيتسابقوا على الموته

ولا تلمس دماغهم طين

وألف حكاية وحكاية
ولا الأساطير
وعن واحد بطل اسمه
عرابي بيه
وقف وقفة راجل راضع مياه النيل
صرخ فيهم بعزم مافيه
أنا مصري ودي مصري
وأنا سيد وحر أصيل
معدشي خلاص عبيد ترضى
بحكم أجير
وجه زميله وعاش عمره
يغني يا نيل
أنا مصري وليد عصري.. ومات محصور
وجه واحد كبير بعده
قدر يدي لمصر كثير

فني نفسه فدا ليها

وقال ليئا

ما فيش فايده وقلبه كسير

وجت ثورة وجم ثوار

أبو خالد معاه أحرار

وطبلنا وزمرنا لألف قرار

وجم غيرهم عالم تانيه

وبني آدميين

قالولنا كتير

وهيصنا وصقفنا بدون تفكير

لحد ماجت لنا النوبه

فَسَهَّمْنَا وَبَلَّغْنَا وَقَلْنَا خَلاصَ

خَلاصَ تَوْبِهِ وَمَشَ لَا عَيْنَ

أعضاء مساطيل

وبصفتي مواطن عادي
لا ليّ ف طور أنا ولا ف طحين
رشحت أنا نفسي محامي
عن إخوانا البعدا المساطيل
وأنا شايف إن الأفضل
ليكوا وليهم تفضلوا أحسن كده كاتمين
وإن كان ع الإخوة الباقيين
ممکن ييجوا يا خدم بقين
وأهو كل ما ييجي مسئول مسطول
حيكون رزقه ف رجله
بصراحة دي زمبه أقوى من البمبه
وحد ضرب إسفين
وماحدث ليه من الأول قال
ما الكل كانوم عارفين

واشمعنى العشرة دول بقوا حشره

وفيه غيرهم ملايين

وأنا عارف منهم ميه

ويمكن أكثر م القاعدين

أغلبهم كانوا حرامية

وتابوا شويه

ورجعهم أسخم م السامعين

والباقيين لقيوا الهوجة

ركبوا الموجة

وقلّعوا ولبسوا توب الصالحين

والحل الفل يغور الكل

ف داهية وقولوا آمين

ولحد ما تخرب مالطه

عيشوا أونطه

ورزق الكل على المساكين

مهما غيروكي

مهما غيروكي.. لا
مهما لونوكي.. لا
مهما يداروا ع الأمان إللي في عنيك
أو جرحوكي وغيروا في كل شيء كان حلو فيكي
قلبي الصغير أنا
طارح ليالي غنا
مواويله حلوه يا حلوه زي عنيك
مهما تداري وشك عني
حاسس قلبي بيكي تملّي
بلمح دموع الحزن ماله عنيك
شايفك في عز الضلمه مدّه اديك
لا عارفه تيجي ولا
قادر أجيلك أنا
لكن مسيري ف يوم راح أوصل ليكي
مهما غيروكي.. مهما لونوكي

الهافوت

وموظف أنا غلبان مهدود
وبدرجة لكن هلفوت
واستاهل ضرب القفا
وبونيه وزغد وكام شلوت
خبيّت أنا نفسي بإيدي
وقلت علام وياريته ما كان
آخرتها قلة حيله وشغله عبيطه
وكام سحتوت
لا أنا عارف أدبر حالي
وأربي عيالي بقيت ممروض
القلب جاني والضغط علي
والسكر مش مضبوط
مع إني مواطن عادي وهادي
وماشي أنا جنب الحيط
طول عمري بقول وأنا مالي
وراضي وباخد بالنبوت

والعيشه مرار والعقل احتار

والدنيا مولعة نار

وإزاي الساقية تدور

دول ربطوا الساقية ف راس كتكوت

وياريتني طلعت أنا زبال

أو شيال أو حتى شوال

أو حتى عواطلي وفاضي

كنت زماني بقيت مبسوط

وأولادي ياكلوا الغالي

ويلبسوا أغلى ما في الباتارين

ولا كنت احتار

بين عشا وفطار

وأدوس الكل وأفوت

مين قال إن أنا زعلان

أو مش فرحان لأ ده أنا مبسوط

من كتر الفرحة أنا حاسس

إنني حطقتُ ف مرة وأموت

تصقيف

تهليل وهتاف تصقيف
لجنابه الواد حريف
دراسات عليا ف وأنا مالي
متخصص في التصقيف
ف زمانه الحال أهو ماشي
والراكب زي الماشي
ولا عاد بينهم تكليف
والأطرش بقى يتعايق
بودانه وفرحان بيها
ويقول أنا سمعي نظيف
والأعمى ماشي بيتحنجل
في الزحمه وعامل فيها
بسلامته الواد شويف والخلق بقت مسعورة

وكلت بمزاجها تاتورة
حلمت قال بالروزبف
والكل أهو باع أحلامه
واشترى عقله بأوهامه
بخمس بلحات ورغيف
وخلص ولا عاد يضايق
بقى مسطول زي الفايق
ولا عاد بينهم تكليف
ولا عاد بيعس بزحمه
ولا نفسه في حته لحمه
ولا روحه جت الطرايف
ولا عاد لكلام بيكسر
ولا بدموع بقي يتأثر
بقي عاشق للتسويق
وبقيت أنا مو فْهَمْتَش

حواليه الكل بينتش
وأنا خايب ف التصريف
تهليل وهتاف تصقيف
لجنابه الواد حريف
دراسات عليا ف وأنا مالي
متخصص في التصقيف

الهروب

بهرب من يومي بنومي وروحي خلاص وصلت مناخيري
وإن جه حد يصحيني فجأة عليه تطلع زرابيني

بتأريف لما بشوف الناس ماشين بوزهم شبيرين
شايلين الهم يومياتي ونسيوم حتى صباح الخير

ع الصبح أخينا مبلم واقف نايم ف الأتوبيس
أتاريه م الزنقة يا عيني روحه راحت منه فطيس

أنا شفت موظف حافي وماشي يشم في حنة خمة
ظبطوه متلبس بيها وقبضوا عليه وأهو راح ف الزحمة

والتاني ده كان متهور قال لنفسه أنا لازم أعيش
بماهيته راح اشتري جزمه وبعد يومين مات بالبراطيش

أنا سامع جرس الباب وحطش حتى إن كان مسموع
حيشرنني إن أنا جبت في الكهربا أكبر مجموع

بترعب لما بلاقي الكشف جاي لي ويقلول هات
ومسير الفولت في راسي حيعني وحبقي من الأموات

بتعكنن لما بشوق شبان الحته يوماتي واقفين
ع الناصية ياعيني عليهم خيبوا روحهم بالتعليم

الواحد فيهم كان فاكر بشهادته حيطلع مين
صايعين ضايعين وبقالهم ف الشغلة دي يجي ست سنين

والحاج محمدجاري وصاحبي ولكن حالته تغيظ
من ستين سنه يبحوش نفسه يا عالم يبقى عريس

وأهو ربنا رزقه بشقه وبعد الغلب لقي له ونيس
قلت له على إيه مستني قال بصراحة لازمني عريس

والعيل م الصبحية يفتح عينه يقول مصروف
ومنين والست تقوللي ياريتني بدالك جبت خروف

وأهي دنيا تلطش فيه وألطش فيها لكن مبسوط
وأنا بدعي لربي تمللي يا رب أرجع من تاني مسخوط

الصيام

يلا يا صايم سلي صيامك
واعبد ربك ليل ونهار
رمضان شهر كريمة أيامه
تعمل حسنة تاخذها كتار
وأوع تفكر إن صيامك
تملا المعدة وتبقى عمار
قمر الدين وصواني كنافه
بندق.. فزدق.. لب.. فشار
تقعد تحشر لما يجيلك
تُخمه وتبقى الحالة مرار
سيبك م الفوازير وخلافه
لحسن يا بني تروح النار
تسهر تهلك صحة ح تتعب

عينك تضرب

تدِّي حَمَار

وتروح شغلك ساهي مبلم

عامل إن الصوم مسمار

ترجع بيتك بوزك ملوي

قال متعفرت عايز زار

تنظر تنفخ ليه وكأَنَّك

بيننا وبينك حرب وتار

مش معقول ح تضع يومك

سب ولعن خصام ونقار

إوعى تفكر إن صيامك

تمنع أكل وشرب سيجار

رمضان شهر عمل وعبادة

مش سجادة وسبحه شعار

فرصه وجتلك طهر نفسك

وأرمني حمولك ع الغفار
أدِ الفرض وسبح ربك
يبقى ما بينا وبينه عمار
كلمة يا خينا بقولها اسمعني
دا عمر الجلد ما يبقى هزار
ساعة لقلبك ساعة لربك
كلمة زمان وقالوها كبار

يا شمس

يا شمس ليه بتغربي
وبتبعدي وتقربي
وبتيجي لحظة وتهربي
يا شمس آه لو تعرفي
أنا قد إيه محتاج لكي
ولضيّ يفرش سكتي
يا شمس آه لو تقدري
ترجعي لي من الشتا
لحظة دفا ولون ضحكتي
يا شمس آه لو تسمعي
من بكره بدري حتطلعي
يا شمس آه لو تسمعي

انتباه

مصري أنا.. إنسان أنا
عاشق لكل الكون
وحامد ربنا على نعمته
عائش وبحلم بالجمال
وبحسن مالي جنته
بسم الحياه بسم الأمل
بسم الوجود
بسم جنة ربنا إلهي وهبها لأرضنا
من غير حدود
بسم الحضارة والأصالة
والتاريخ إلهي انكتب بإيدي عفيه
بسم أرض النيل بنادي
عالمي كانوا هم أصل الإنسانية
انتباه.. انتباه.. انتباه

ده الخطر حوالينا وف كل اتجاه
والخطر يعني التلوث
والتلوث شيء خطير
غول حيسرق ضحكة حلوة
م الصغير والكبير
إن كان ف دخان المصانع
ولا عادم سيارات
ولا في ضجيج الشوارع
ولا زحمة بيتخفق فيها السكات
والنبات الأخضر يا أخينا
ليه بإيدنا بنخنقه وبندبحه
حتى الأمل حولينا مات
والمياه إلهي خلقها ربنا
للنيل خلاص غيروها وعكروها
طب ليه يا ناس

اللي يرمي فيه سيجاره
واللي يحذف فيه حجاره
واللي يغسل فيه هدومه
واللي يرمي فيه حموله
وهوه واهبنا الحياه
كل واحد فينا لازم
يبقى قد المسئولية
ويحس بخطورة القضية
ده التلوث شيء خطير
غول حيسرق ضحكك حلوه
وصحة غاليه
م الصغير والكبير
إنتباه.. إنتباه.. إنتباه
ده الخطر حولنا وف كل اتجاه

مش شطارة

لأ يا شاطر مش شطاره
ترمي سلة مهملاتك
جوه شارع أو ف حاره
كل واحد يلقي كوم ويكوم أكثر
واللي أخطر من ده وأخطر
حشرة جايه بتتمخطر
حامله ميكروب الملاريا
ولاميكروب بلوة تانيه
تيجي تلبد لك ف عبك
ولا إيدك ولا عينك ولا رجلك
هي لسعة وإن تسمى
ع الدكاتره واللي يلقي علاجه شاطر

أهل الطب

ح أحكي ليكو	إيه جرالها خالتي خوخه
لما جالها صداع	وحاست يوم بدوخة
مشيت المسكينة	تدعي لربها
يبعثت لها	دكتور يكون على قدها
وولاد حلال	دلّوها على واحد تمام
كان من نصيبها وبختها	دكتور فافي قوي

قام قال لها:

قولي آه جامدة خالص

عايز أشوف فين القوانص

والكلاوي واللبلاوي إلي جوه جوه خالص

ياي.. ده بقك ضلمة خالص

ليه عنيك أحمريكا

انت ليه بتخوفيني

انت واوا ولا سخنه

ولا عايزه تلسعيني

ليه سنانك مش نضيفه
 انتي فعلاً مش لطيفه
 امشي بره.. امشي يللا
 انتي كخه ومش نضيفه
 طلعت المسكينه تدعي لربها
 يبـسـت لـها دكتور يكون على قدها
 وولاد حلال دلوها على واحد تمام
 كان من نصيبها وبختها دكتور قاسي قوي

قام قال لها: اتكتمي خالص واخرسي

لازم يا هانم تعرفي

إنك هنا عند طبيب مشهور قوي

من نظره حعرف بلوتك

من غير ما حلمس جتتك

عندي هنا كله تمام

الصداع زي الزكام

كله ياخذ دوا واحد

واللي يبجي عندي تاني

يبقى واحد مش تمام

إنتي ليه حطالي ريحه

متكونيش فعلاً أبيحه

إنتي فعلاً مش مريحه

امشي بره ثاني مرة

لو حشوفك حصرخ

وحعملك فضيحة

تدعي لربها

دكتور يكون على قدها

دلوها على واحد تمام

دكتور غشيم قوي

طلعت المسكينة

يـبـعـت لـها

وولاد حلال

كان من نصيبها وبختها

قام قال لها:

قبل ما حسمع حكايـتك

عايز أقولك وبصراحه

علشان أشعر براحه

القلوب ماخذتهاش

والكلي مافهمتهاش
والمسالك والجراحه دي بصراحة
عايزة واحد ثاني خالص
والكبد عايز تخصص في السباحة
والمرارة واللوز ولا الحصاله
والحناجر واللسان
عايزه واحد له رسايل
أو ماجستير ف الودان
أي حاجة بتشكي منها
غير ده هيه
حتلقيني تحت أمرك
راح أعالجك فيه فيه
على العموم راح اكتب لك رويته
فيها عشرين نوع دوا
تبلعيهم كلهم ع الريق سوا
ولا أقولك مش مهم خلاص دوا

طلعت المسكينة	تدعي لربها
يبتعت لها	دكنور يكون على قدها
وولاد حلال	دلوها على واحد تمام
كان من نصيبها وبختها	دكتور نساء وصریح قوي

قام قال لها:

لأ يا هانم متخفيش
إنتي ليه خايفه يا هانم
ده أنا مولد كل الهوانم
دي الولاده سهله خالص
وف معادك بالسلامة
شيلي اسبوع أو زيادة
بس أول مغصة تيجي
تجري دوغري ع العيادة
وأنا آجي أو ماجيش
مش مهم.. المهم
تكوني جاهزه للولادة
كل طلباتك أوامر

عايزه إيه؟

عايزه اخرم لك عنيه

ولا اشدّه شده جامده

تنخلع فيها إيديه

ولا أشفطلك نفوخه

ييجي عامل بوز إزازه

ولا أحسن شكل فازه

وانتي عايزه قيصريه

بفتحه ورُبْ جهنمية

ولا عايزه ولادة عادة

بصي شوفي كله حيان ف الولادة

إيه يا هانم قمتي ليه

إنتي خايفه ولا إيه

دي الولادة سهلة خالص

الولادة سهلة خالص

طلعت المسكينة	تدعي لربها
يبعت لها	دكتور يكون على قدها
وولاد حلال	دلوها على واحد تمام
كان من نصيبها وبختها	دكتور جشع قوي

قام قال لها:

كل واحد له دقيقه

يلا قوللي ع الحقيقة

قول يلا بسرعة مالك

إيه جراك

انتي بيجيلك صداع

ولا كرشه ونقح جامد ف الدراع

ولا عندك ضغط عالي

ولا نبضك صوته واطي

لأ يا خالتي مش فضيلك

عندي ميت مليون زبون

يلا قوللي ولا قومي

خلصيني من ده دور

مش طريقة شغل ديه
كل ده محسوب عليه
وانتي دافعة كشف عادة
يعني كام زبونه زيك
بكره نقفل العيادة
لسه حتشكي لي حالك
لسه حتقولي لي مالك
انتهى درك يا هانم
بالسلامة وادفعي بره الغرامه

قولوا يا أهل الطب قولوا وفهمونا
فيه جماعة منكوليه بيعذبونا
ده انتو رحمه ملايكه لينام السما
مش بنطلب منكم حق الدوا
عايزين بشاشه ورقه حبه وترحمونا

المصححاتي

إهداء

إلى أمي الحنون مصر:

بحبك يا بلدي

وحفضل أحبك لآخر الزمان

بحبك في ليلك

ولون سلسيلك

يصحى قلوبنا ف ساعة الآدان

بحبك غناوي

حكاوي وتقاوي

مع الفجر تطرح زهور الكلام

إيمان بكري

وتر السكوت

وتر السكوت حيموت

لو جبت يوم العود

وعزفت كام جمله

وطنك نشيد مولود

فوق الشفاه حيموت

لوبيعته بالجمله

اطلع سلالم دو

واصرخ وقول يا هووه

عصفور كناريه زهق

لملم خيوط عشه

لاحد بيكلمه ولاحد بيهشه

قال الفروع بتحميل

والجذر ليه خوَّخْ

وطريقكوا صعب طويل

مشاويره بدوَّخ
عطش السنين مبدور
على سكه مقلوبه
والشيب سرح في الغيط
والضحكه مصلوبه
فوق الملامح ليل
ملهوش نهار يطلع
ولا زقرقة عصافير
ولا طلع عاد يطرح
يا مولودين عواجيز
وعيونكوا معصوبه
إتحطوا في البراوين
وامشوا في زمان طوبه
ده الحال في يوم ما يميل
ما بتسندوش طوبه

أرضي الشراقي تقول
كلني العفن والبور
ودياهه حرّاسي
والسقاين رُحّال
متسلسلين بحبال
وموطيين راسي
دَوْر سواقي الشوف
وناولني فاس وشادوف
أوصل لباطنها
ده الحر لما يشوف
وبيان له ع المكشوف
حيصون حفان طينها
أنا وأنت كُنّا اتنين
والحلم تالتنا
جالنا غراب البين

عشش قصاد بيتنا
يا صيادين الشوم
شباكوا ليه دابت
متسندين ع الحيط
وركبكوا ليه سابت
أسد الخلا معروف
بالطهر والذمه
لومات في يوم م الجوع
ما يطاطي ع الرّمه
يا مفطومين ع البكا
ضيّ الزمان بادي
تَبَّتْ فِ جَذَعِ النور
يطرح نهار نادي
ضيّ الشموس حيدور
ومسيره يوصلّك

واوعى الشموس لتغيب

ليموت في يوم ضلك

كلمنجي أنا يا ناس

وكلمتي زادي

لا حعدل إللي مال

ولا كنت يوم قاضي

قلمي الرصاص مكسور

والخبر كان فاضي

يجعل كلامي سلام

مربوط في رجل حمام

للّي فهم معناه

ورصاص بارود أو شوم

ع الغرقانين ف النوم

واللّي كلامي أذاه

ياريتها تعود لياليكي

يا لابسہ توبك النيلی
وماسكه طرف منديلي
تساوري لي تلاقيني
مُحِبُّ أسير وطوع أمرك
أسير مشاوير على جمرك
وأقيد شمسك
وأجيب قمرک
ارشرشهم على رملك
واسلسلك نجوم الليل
تقيد عناقيد على صدرك
وخلخالک یرن یعيد
صدی صوتک وموالک
ومهما تكوني عني بعيد

حجيب سلّم وحوصلك
وأبوس خدك وأوصلك
حبال الود من تاني
وأجيب عمك وأجيب خالي
يكونوا شهود
ده أنا المولود على حرك
ياما شلتك وهدهدتك
مشيت بيكي وسكتك
عشان تتغطي وتنامي
لعبت معاكي في الحاره
عريس وعروسه وبشاره
وصوت زغاريد وزماره
تقول توت توت تجمعنا
وشجرة توت علينا تجود
بضله وقوت يشبعنا

ياريتها تعود لياليكي
وأشوف بسمه على فيكي
ياريت حضني يكفيكي
وأنا أتيلك وأخبيكي
ما بين الجفن والنّي
ولا عفريت ولا جنّي
في لحظة يوصلوا ليكي
يا خط العمر فوق كفيّ
سنين عمري ما حتكفي
ولا حقدر أوافيكي
ده أنا الطالع في فنجانك
بطرز لك خيوط شالك
حجيب لك توب قصب فضي
وعيلّ نون حيخطي
وحيوأو على اعتابك

ويفتح للنهار بابك وإيد الشمس حنَّبط

على الشباك وشباكك

يخشه النور

يكون طاقه لأحبابك

يقيموا سبوع لميت أسبوع

يخطُّوا الخط في كتابك

آيات توصف لخطابك

ملامح شقشقة فجرك

وشلالك حنان حيفيضر

على العطشان لريق الفرحة

ليلة العيد ونملا القلَّة

تترقص شمال ويمين

في صحن البيت بيتمرّج

ضيا قنديل بيتشاقى

بيتعفرت في وسط الحيط

ده أنت' نبتك وطلع الغيط
أمانه تفتحي بابك
عشان أدخل وأرشد البيت
بمية مسك أو عنبر
ونرسم حلمنا الأخضر
على وش الندى الطالع
بقول يريت بقالي سنين
وأنا واقف ومستني
ولا تعبش ولا ملّيت

عجبي

عجب عليك يا زمن
يلّي لويت إيدي
وقلت لي بالذوق
أمشي ورا سيدي
لتزقني من فوق يسهل عليك صيدي
غميت عنه الجوز
كتفت لك إيدي
وقطعت كل خيوط
شرياني ووريدي
وقلعت توب عنتره
ولبست توب ديدي
ولقيتني يا ولداه
كرباج في إيد سيدي

سألوني النوني

سألوني النوني كونوني
 عن اسمي واسم إيلي جابوني
 أنا قلت ياريتهم شطبوني
 م الدفتر ساعة ماجبوني
 ولا كنش النانشي كونشي
 فيه داعي أتكلم أو أمشي
 وأتوه ف الزحمه وما أسألشي
 أنا عايش ليه طب دلوني
 زعلان الناني كوناني
 من مامي ودادي إيلي هراني
 بكلام مالهوش أي معاني
 بخطب ومبادئ فلقوني
 وسابوني النوني كونوني
 في الدنيا لعالم هرسوني
 وكلوني بعضمي وبهدومي

وياريت النيتي كونيتي
أنا أتوه عن نفسي وعن ميني
والأقي ناس يتبنوني
أنا أصلي النصلي كونصلي
حاسس بعضامي ومفاصي
مطحونه ياريتكم تحيولي
دكتور النوري كونوري
يطبق على نفسي وعلى زيري
ولا توصل كلمه على سني
معلش النشي كونشي
مش عارف فين راح أدري وشي
لو يوم يا ولادي سألتوي
عن صوتي انوتي كونتي
ليه بلعته بإيدي وبسكتي
ووقعت في فخ نصبه لي
وخلاصي الناصي كواعي
ملعونه الفكره إلهي في راسي

قال عايز أقول لأه حشوني
 دي اللأه النأه كونأه
 طول عمرها مرهونه بزقه
 هاتوا إيدكم يلاً وزقوني
 عشاني الناني كوناني
 أصحي من النوم وأنام تاني
 وأمانه ما تيجوا تصحوني
 سلاماتي الناتي كوناتي
 على خلق بتدن وتهاتي
 وياريت ع السكه تدلوني
 ونعيشي النيشي كونيشي
 أنا وانتوا في دنيا حلتبشي
 وأمانه عليكموا افتكروني
 أنا إسمي النسمة كونسمي
 إيمان الناني كوناني
 وحسيب ليكو إسمي وعنواني
 ومعاهم غمرة تليفوني

ألفباء

وقرينا في كتاب المطالعة
إن بكره الشمس طالعه
والنهار له ضيَّ فارد
فوق ضلام الليل عبايه
يلّي سامع قول معايا
بكره راسم فوق مباسم
العيال الطيبين
حلم غايب من سنين
جاي راسم شوق بهيه
والملس والجلابيه
والعصايا والطاقيه
إللي كانوا في إيد ياسين
بكره جاي في يوم أكيد
جاي جاي ومش بعيد
نلقى بكره بتوب جديد

جاي آيه رافعه رايه
يلي سامع قول معايا
واقرأ يلا الدرس عيد
الألف.. كان يوم ميلادي
به.. بحبك يا بلادي
ته.. تفاوي القمح زادي
ته.. ثوابك من جوابي
جيم.. جمالك نور عنيّه
حه.. حاشبك لك إيديه
خه.. خسارة النور يموت
دال.. دواكي في السجود
ذال.. ذراعك يقوي بيّه
ره.. رقيتك م الحسود
زين.. زمانك جه عليّه
سين.. سلامتك يا بهيه
شين.. شبابك مش هفيّه
صاد.. صوابي شمع ليكي

ضاد.. ضروري الفرحه تيجي

طه.. طالبت بحقي فيكي

ظه.. ظلام علّي يجافيكي

عين.. عواف علّي يعافيكي

غين.. غناوي طارحه فيكي

فه.. فؤادي بيناديكي

قاف.. قرارك صوته واطي

كاف.. كفايه القسوه ديّه

لام.. لا يمكن يوم نطاطي

ميم.. ماليش غيرك صبيّه

نون.. نصلي وندعي ليكي

هه.. هجمّع لك حصادي

واو.. وحفديكي بولادي

يه.. يعيش الحب فيكي

يجي بكره ويلافيكي

قاعده ليلة الصباحيه

فارده طارحه وجلابيه

والعيال قاعدين قصادك
جُمُّ ياركوا لك حصادك
جوه حجرك ألف طارحه
تبديرها تبقى فرحه
جوه قلب الشقيانين
تمسحي دمع الحزين
وف حضورك تلتقي
كل البحور العطشانين
نلتقي: والأرض تعطش تتسقي
من ضيّ فجرك إلهي ج'ي حيتولد
ما بين إيديكي
وبين إيديه الممدودين
يترسم فوق الجبين
وفي عبون الطيبين
تنفتح لك ألف طاقة نور
تعديّ وفي إيديكي
شقشقة ضيّ السنين

تجمعي كل الصفوف
الغنا ودق الدفوف
نكتبي فوق السطور
البعاد مش راح يطول
ده النهار فتح عنيّه والندى هالل عليّه
مدوا إيديكم للسحاب
رجعوا حلمي إللي غاب
والضموا لي حبّ عقدي
إللي انفط فوق الكتاب
رجعوا لي ابن عمري
إللي انفطم في سنين عذاب
وافتحوا كتاب الطالعه
واقروا بكره الشمس طالعه
جايه لينا امّال لمين
يلّي سامع قول آمين

قال لك إيه

قرب .. قرب
إلعب . جرب
سيرك يا صاحبي
تعالى اتفرج
قالك إيه .. قالك آه
قالك كله يقول الله
فتح عينك .. تاكل ملبن
غمض عينك .. تاكل لوز
أدى أراجوز
طالع نازل واكل جوز
إتكيت على بطنه يصقف
إتكيت على ظهره يصقف
ماتت كل حواسه يا عيني
بلبوص لكن لابس شوز
يجري ويمرح ع الحبلين

وابن الهرمه أبر وشين
واخذ دبلوم مسح الجوخ
ولا يوم يتعب ولا بيدوخ
عايز بوكس وطاخ طيخ طوخ
قرب.. قرب
دور.. لف
عن أمثاله ابعد حتخف
يضحك يزعل كله يجوز
قرب.. قرب..
إلعب.. جرب
قالك إيه.. قالك آه
كله يطبطب علي وراه
فتح عينك تاكل ملبن
غمض عينك تاكل لوز
عندي الحاوي وبلدياتي
ولا فيش زيه ف الناحية دي
الواد جن خليفه زناتي

خاله ألاتي
وجده فلاتي
وعمه مولف ع القرداتي
ابن لذينه وأصله نباتي
يعني تمام كده زي حلاتي
يعمل شربه من الكرات
يعمل شبة من البهارات
قرب قرب لف وطوف
وش جنابك مش مألوف
لونك أصفر ليه ومخطوف
عندي دواك والنبى موصوف
اشرب شوربة أبو مخلوف
تبقى تمام زي الحلوف
واشرب شوربة عم حسين
تهري الجته وتعمى العين
قرب قرب كله بقرش
خشش يا فندي يا بغل بكرش

سدّ ودانك طنش عيش
رزق الهبل على الدراويش
إدخل خطي عدي ودوس
دوس على الرقبه ودوس ع الرّوس
قرب.. قرب
إلعب.. جرب
فتح عينك تاكل مبن
غمض عينك تاكل لوز
قالك إيه.. قالك آه
قالك كله يبص وراه
قالك صرّخ أو قول جاي
كله ألسطه وف الباي الباي
فيه بيانولا وفيه أفلام
خش اتفرج كله تمام
حتلاقي وحش السيما مدام
قاعد يشرب في المدعوق
ولا بيصحصح ولا ييفوق

لكن لما مزاجه يروق

بقه ما بيطلش كلام

آه يا سلااام

أفلام أكشن زي النار

فيها معارك حرب وتار

سبع برمبه مع صرصر

واللي تقررص واللي مجرّس

والفهيح وعاملتي حمار

واللي يطالب واللي يعوز

واللي بياكل قشر الموز

قرب.. قرب

إلعب.. جرب

فتح عينك.. تاكل ملبن

غمض عينك.. تاكل لوز

وبعش وبموت

وبعش في عيكي وأموت

وبنيت في القلب بيوت

ومدينه عجيبه

مالها أسوار

ولا فيها حدود

وساعات.. شوارعها بتبقى براح

وسنين.. بلاقيها قصادي سدود

لكن.. ممدود

شريان الدم

ما بين النبض وبين القلب

طريق ممدود

وبغيب

وبتوه

وبعش

وبموت

وفي رعشة صوتي

بحس بموتي لكن برجع لك ثاني ولید

ف ملامحه بشاير نور البدر

وبعود

مع أول خيط بيلون وش الفجر

وبعش

وحعش في عنيكى وأموت

وساعات

بفرد كفيني سلام

وحمام

طاير من غير جناحات

بيطير ويطير

للامح آخر غصن زيتون بردان

عثمان

للدفا ولهمس النور

وساعات التلج ف راسي يفور

وكتير بتّوه مني الإجابات

ولزمن العتمه بعود

مولود

بيلم خيوط الشمس في عز الضهر

في حجره وبينني بيوت

وبلاقي الحرف بيولد حرف

في وسط غابات وسكوت

بيموت

ويموت الحلم الضايح جوه عيوني في ليل مهدود

ولزمن المحنه بعود

وبحط العمر في كفّه

وعضمي في قفّه وياكله الدود

وبتوه بين آه أو ليه وازأي
وشفايفي تضم الناي
وإيديه على الأرغول
وبغني وأنادي وأقول
وعيدان القمح وتر مشدود
بيرن في جوف العود
أنا مش يونس ولا نوح
ولا عمري حشق الضلمه وحطلع يوم من بطن الحوت
ولا حبني سفينه
تعدي جسور وتودي شطوط
وحعود
واكتب على آخر ورقه في الشجر التوت
راح أعود
راح أعود والوقت أدان
والضحكه في ساعة الفجر

حتبقى بشاير فرحه وفال

والغنوه البكر

حتبقى حصاد ومعاد وأوان

وحوصل حبلي السري بروحي وأمي

وأعود إنسان

راح أعود

راح أعود من ثاني وليد

ف ملامحه بشاير نور البدر

وحعود مع أول خيط حيلون وش الفجر

وحعيش

وحعيش في عنكي وأموت

خير الكلام

لَمَّا الْغِيطَانُ بِتَشِيبِ
وَلَا الشَّوَاشِي تَخِيبِ
الزَّرْعُ فَوْقَ الْعُودِ
بِيَمُوتَ عَطْشٌ يَا وَلَادِ
لَا مِيَّ يَوْمَ تَرْوِيهِ
وَلَا دَعْوُهُ بِتَخْلِيهِ
يَطْرَحُ غَنَاوِي حِصَادِ
وَأَمَّا الْغِيلَانُ بِتَجُورِ
عَ الْأَرْضِ وَالْمَحْصُولِ
وَالدُّودُ بِأَكْلِ فِي الْغِيطِ
يَتَهَدُّ سَقْفَ الْبَيْتِ
وَالْخَيْرُ يَمُوتُ مُحْصُورِ
لَمَّا الظَّلَامُ بِيَطُولِ

ضي النهار بيقول
خلّي الأمل جواك
وح أمدّ إيدي معاك
والضم لي إبره وخيط
واغزل شعاع النور
تتبدل الأحوال
عمر الظلام ما يدوم
ولا النهار ييموت
طول ما الأمل مرسوم
فوق الجبين موال



أنا إنسان

أنا إنسان

ماليش عنوان

لكن عايش في حضن الكون

بحب الخير

وأحب النور

وأحب أطيّر كما العصفور

وأحب الشمس والميه

وقلبي مصالح الدنيا

وأجمل حلم في عنيه

حمام طائر بحريه

وغصن زيتون

أنا وليدك

أنا وليدك أنا

دمي في وريدك نما

وكتني أرض وسما

وساقيه دايره وقنا

وعصاية إللي انحنى

وكتني ضهر وسند

وحلمي فيكي اتولد

وكتت أنا.. بنت وولد

راسمين حكاية تضمهم

على قلب فوق جذع الشجر

بينادي نور ضي القمر

يضوي على حروف إسمهم

ضاعت سنينهم منهم

وش القمر غاب عنهم
رسموا الآهات ويا الدموع
عصفور ومات بين الضلوع
ملقاش له عش في قلبهم
نادي الجراح
والكون براح
ضاع الصدا
وسط الرماح
مات الكناريه وهو حافظ عهدهم

أم الطيبين

قومي لمي ضناكي يا أمه
وامسحي دموع الجوامع
دي الشوارع بينا عتمه
واحنا فيها اللي تايه واللي ضايع
واللي نفسه يبكي مره فوق كتافك
بس شافك إنت رُخْرَه
عايزة تبكي برضه زيه
قومي يا أمه واحكي ليه
إحكي حدوته بهيه
إحكي أي حكاية تانيه
غير حكاية الغوله ديه
قومي يا أمه زوقينا ولبسينا هدوم جديده
انتي ليه مانتش سعيدة
مش قالوا لنا العيد حبيجي بكره
قبل ميعاده لينا
ولاً فرح العيد مسافر زي أبويا

هُوَ لِيهِ مَا رَجَعَشْ يَا أُمِّهِ
 فَآكِرُهُ لَمَّا قَالِي مَرَّةً
 لَمَّا ضَمَّ ضُلُوعِي ضَمَّهُ
 وَقَامَ حُضْنِي وَقَالَ لِي رَاجِعْ
 لَسَهُ فَآكِرُ يَوْمٍ مَا سَافِرُ
 كُنْتُ سَامِعَ صَوْتِ مَدَافِعِ
 وَالْأَدَانِ كَانَ صَوْتُهُ عَالِي
 يَوْمَهَا صَلَّيْتُ الْفَجْرَ حَاضِرُ
 مِنْ يَوْمِيهَا رَاحَ مَا جَاشُ
 هُوَ لِيهِ مَا بَعَثْنَا شُ
 لِيهِ الْعِيَالُ إِلَيَّ فِي حَارْتِنَا
 بَيَقُولُوا لِي دَمَ أَبُويَا رَاحَ بَلَاشُ
 مِنْ يَوْمِيهَا لَا بَسَهُ تَوْبُ الْحَزْنِ يَا أُمِّهِ
 وَكَاشَفَهُ رَاسُكَ
 عَلَيَّ صَوْتُكَ وَادْعِي لَنَا
 غَنِّي يَا أُمِّهِ وَسَمْعِينَا
 غَنُوهُ حَلُوهُ مِنْ غَنَاكِي

ليه ف صوتك لسه فيه رنات حزينه

انني ليه بتعذبينا

ليه بتطفي النور علينا

لما حضنك يبقى ضلمه

مين يقيد السكه لينا

لما نتباع جوه حجرك

مين حبيجي ويشترينا

يا أمه كل الكون بيكبر

وإنتي ليه يتصغرنا

قومي يا أمه هاتي حفته

من تقاوي القمح يلاً وازرعها

وزعيها ع العيال إللي ف حارتنا

يشبعوا وتشبعينا

ده احنا فرحك

واحنا قمحك

ع الرحاية اطحنينا

وابدرينا جوه أرضك

يا أمه أنا واقع في عرضك
 دورى بينا السواقي
 بس حلي الحلم باقي
 رجعيي الحلم ثاني
 وارسمي لي البسمه وردي فوق شفايفي
 وارجميلي
 يا أمه يا أم دموع حزينه
 ليه يوماتي تودعينا الحواني وتسبينا
 يا أمه جوف البحر ضلمه
 لو خنغرق مش حتلقي يوم أثرنا
 شفت ناب الحوت قَصْرنا
 لما شافني لوحدي عايم
 والشطوط بَعْدت و غابت عن نظرنا
 مدى إيدك طلعيينا
 ده الشتا داخل علينا
 يا أمه صدرك برد ليه
 والغطا محطوط عليه

بس مش قادر يكفّي
أو يدفّي رعدة الخوف إللي فينا
مدى إديك يا أمه ليّه
حطّي إيدك فوق شويه
حطّي إيدك اليمين عند راسي وإقري ليه
إقريّ عديّة يس
ارقى يا أمه وادعي لينا
ده الشقى مكتوب علينا
وانت واقفه بتحرسينا
يا أمه يا أمّ الطيبين
غيرك انتي فين حنلقى
حضن دافي حيسعينا
حابي يا أمه علينا حابي
وإوعي يا أمه تضيعينا
إوعي يا أمه تضيعينا

إظهر وبان

إظهر وبان
عليك الأمان
يا حلمي المسافر
في جوف الزمان
بتطوي المكان
وتنسى إلهي كان
وترجع تدور
على خيط حنان
بقالك زمان
مجافي إلهي كان
ماعدشي البراح
مساعي الحمام
وماتت عيوننا
في وسط الزحام

وتنهنا وتاه
طريق النجاه
وضلل على الدنيا
موج الظلام
ياريتك تكون
بشائر لنور
وتهدي خطانا
ويصحي إلهي نام
ما تظهر وبان
عليك التبات
يا حلمي إلهي ضايع
في غابة سكات
سكاتنا ممات
كلامنا سكات
نقوم أو نبات
ما بين خد وهات

وننسى الثواني
تموت الساعات
عليك التبات
يا حلمي اللي مات
بنيت لك قصورك
بجفن الخيال
تنوه ف الوجود
وترجع تعود
وتلقى الوعود
وضيّ الأمانى
في حضن المحال
ما تظهر وبان
عليك الأمان
ورجع حروفنا
لمعنى الكلام

سطور الأبجدية

من فوق سطور الأبجديه

انتحر مني الكلام

نامت حروفي وانحنى سن القلم

كل المعاني اتبعثرت

فوق الطريق

وعلى الرصيف

بقى شيء مخيف

لما ابصر لنفسي واسأل مين أنا؟

والقاني ريشه

فرهضتها الريح وداستها انقدم

اكتبيني يامه فوق جسر الألم

أنا كنت إسمك

كنت رسمك

كنت سيفك.. وانكسر
أنا كنت فارس.. وانحصر
لما لقيت حلمي اندثر
يا شمس يلّي مغربه
أنا ضلّي مات
ساعة ما فات
الظلم جنبي وانحنيت
شبيت لقيت لما ابتديت
أول خطاوي سكتي آهات
نديت ع الجرح سال
غرق طريقي وذنيتي صبحت سراب
آه من العذاب
لما بريد الأسئلة
بيتوه ويرجع م السفر
من غير جواب

وبقيت أنا عنون كتاب
بیشخبطوا فيه العيال
بيقرطسوه
ويمزعوه
ويوزعوه بين المفارق والطُّرق
والعمر منّي بيتسرق
وأنا لسه وسط الكون سجين
عايش في حضن المستحيل
ما تبخريني يامه من عين الحسود
من شر حاسد إن حسد
يمكن تعود الروح وتسري
ف الجسد تعلقفني بالأيدين
قومي اندري دسته شجوع
للسيدة وسيدنا الحسين
لحظة ما أعود مولود يندب

فوق سطوحك من جديد
ويخبّي شمسك بين كفوفه
يجري ضيّك في الوريد
وأعود على جناح الأمل
فارس وراكب مهرته
عارف طريقه وسكته
شاهر في وش المستحيل
سيفه الحديد ويقول أنا راجع لكم

يا ضمير الإنسانية

يا ضمير الإنسانية

يا للي غائب من زمان

أنا إنسان ومن حقّي أعيش في سلام

ما نيش آله

مانيش صوان

مانيش حارس واقف ددبان

لكن عطشان لنقطة نور

في وسط بحور دموع وآلام

لنسمة حب تسقيني

تداوي الآه وترويني

ترجعني وليد إنسان

يا ضمير الإنسانية

ياللي نايم من زمان.

أتمشى النهار

أتمشى في عروقي النهار
والليل تابوت الانتظار
صوت السنين
بقى شرخ في جدار الحنين
والخطوة تاهت في الفضاء
والفجر خاصمت طلعه قطرة ندى
كانت نرشرش سكتي
أنا إلهي كانت خطوتي قد السما
والحلم كان جوه ف ضلوعي مخدتي
والسكه كانت سكتي
والبسمه كانت ع الطريق
قنديل ينور عتمتي
يرمي لي لما الليل يطول
طوق النجاه
بصيت لقيتني في وحدتي

موال حزين

والدنيا ماشيه

بس عكس الاتجاه

خربشت وش الكون بإيدي وبضوافري

وفضلت أعافر والزمان بيقولي عافري

جمعت فتافيت النهار

وزرعت فدان م الأمل

بس الدموع ويا الأئين

زرعوا الأهات

فدادين ألم

حتى القلم سنه اتكسر لما اتحسر

شخبط على وش الزمان

بحروف ومش متفسره

ضي الغروب لفلف قلوب

ماشيه في دروب متحيه

فوق الطريق أوراق حنين

قصاقيص تاريخ متبعتره
غية حمام هاجر زمان
ورجع لقاهما مكسره
كل الخطاوي تقول سماح ارمي السلاح
خطوه لورا
يا ليل يا فارد غربتك فوق الوشوش
طيرك وقع فوق م السما
إلحق وحوش
شرع الوحوش
إن الضعيف مالهوش تمن
راكبين على صهوة فرس
من غير لجام
ماشي ف زمان الإنشطار
سكة سفر
وعلى الطريق
عصفور كناريه بيرتعش

تحت المطر

بيودع الحلم البريء إليّ اتخفق

دبلت غصونه انكسرت

ولا عادشي فيه ريحة الرmq

يا آه يا مزنوقه ف ضلوعي اتمددي

سجن الضلوع مابقاش رجوع

يللاً ابتدي

حنشق صدر العتمه بسلاح الأمل

لحظة بروق الليل شروق بدر اكتمل

يا رفاقه يا أصحاب الطريق

مدُّوا الإيدين

حطُّوا الخطاوي ع الطريق يلا ابتدوا

حزن الوطن مهما بنلقى ف قسوته

بنعود ونمسح دمعته وقت الخطر

ده الفجر جاي حيجري ف عروق الوريد إليّ انفجر

الحاوي

لسه لحاوي جرابه كبير
فيه ألعاب ودست طراير
فيه أراجوز ضارب بوز
وبيتحنجل ع الحبلين
فيها تنابله وفيها يجوز
خايب دور ع المتعوس
عملوا حزب لأكل الجوز
عملو طابور لمعيز وتيوس
قرب قرب بص وشوف
كله بيعلب ع المكشوف
حذر فزر وإوعى تفكر
ولآ تقول أنا واد فهميم
لسه احاوي جرابه كبير
عنده حكاوي وعنده غناوي

عنده قصص و كمان فوازير
عنده حكاية الواد فرعون
لما اتفرعن قالوا بخاطره
محدث رده وقالوا جنون
عنده غناوي وفيها بلاوي
لو تسمعها يا صاحبي حتعرف
ليه الكون مابقاش موزون
عنده حكاية الواد مفروس
عاش ببساطه ووطى وطاقا
لحد ما جتته كلها السوس
باع الهدمه في مدة خدمه
ساقط قيد واهو مات متعوس
قرب قرب بص وشوف
كله بيلعب ع المكشوف
حذر فزر وأوعى تفكر
ولا تقول أنا واد فهميم

لسه الحاوي جرابه كبير
فيه براويز فيه تصاوير
فيه ألغاز ووابور جاز
لو يتعمّر مرّة يفرقع
يضرب بمب ويدي نفير
رسم سرايه وشكل عرايا
وناس في الدنيا ومش عايشين
فيها مآسي وفيها كراسي
وده بيسجل وده بيباصي
وده بيشوط ف البني آدمين
فيها غلابه وفيها دبابه
ناهشين لحمي الحّي سنين
قرب قرب بص وشرف
كله بيلعب ع المكشوف
حذر فزر واوعى تفكر
ولّا تقول أنا واد فهميم

لسه الحاوي جرابه كبير
عنده مناظر شكل وشوش
ميت مليون مليانه رتوش
ناس عدمانه وناس بكرءش
ناس بردانه وناس دفيانه
سبع برمبه وديك منقوش
كذاب زفه ومسك الدفه
وده بيحلق وده بيحوش
ناس خيانه وناس مليانه
وناس هفتانه وما بيأذوش
قرب قرب بص وشوف
كله بيلعب ع المكشوف
حذر فزر واوعى تفكر
واللا تقول أنا واد فهيم
لسه الحاوي جرابه كبير



أنا الأديب

أنا أديب.. ديب على قدي
تعريفه ممسوح ومصّي
ما يغركوش طولِي وعرضي
ده بسر عايش بالقُدْرُ،
أنا أديب شاعر فنان
واقف لوحدي كما الددبان
مستفعلن فعلن فعْلان
وغرقت في بحور الشّعرا
كلامي كله على النوته
وعقلي لفيته بفوطه
وعندي أفكار مكبوته
ونزِيل جهنم بالأجره
فضيت جيوبي وأفكاري

آه من عذابي ومن ناري
من مين راح آخذ أنا تاري
قلبي انكوى من غير فودره
طول عمري عايش مش عارف
لا عدت سامع ولا شايف
أنا مش شجاع ومانيش خايف
بس البيبان من غير أكره
لا طالبت عمري بمال ولا جاه
ولا سلطه خيانه يا ولداه
بس اعتقوني يا خلق الله
وسيوني أعيش بس لبكره
أنا أديب له أدواته
بييع هدومه وخلجاته
علشان يسبب يوم لولاده
شمعه تنور أو فكره

ده الحزن عشش جوايا
والهم ركبتة ورايا
ولزق لي يا فطه على قفايه
بتقول مُغفَل بالفطره
أنا أديب.. ديب قرداتي
خَلَصْتُ حبري وأدواتي
بصرخ وأجعر وأهاتي
مين ده إلي يسمع أو يقرأ
أنا أديب.. ديب وبفنن
قربت يا أخوانا اتجنن
مديت إيديه قالوا يحنن
شطبنا يا أهبل.. فوت بكره

نيام نيام

من جمهورية نيام نيام
برقيه هامه للعم سام
نضرب له فيها تعظيم سلام
ونقوله كله بقى ف التمام
الكل واقف جلوس قيام
حسب الأوامر والنظام
ولا فيه سماجه
ولا فيه لجاجه
ولا فيه لماضه ولا طول لسان
كل الخلايق هنا ف انسجام
آه يا سلام لم يا سلام
على ده نظم نظم يا سلام
آخر جمال...!!
واحلف يمين أنا بالطلاق
الكل في حالة انطلاق
نحو الهلاك والانبعاث والإنهزام

واطمّن سيادته بأن الجميع
مفوّض جنابه وبيقوله بيع
ولو بالخساره
ماهيه التجاره
غباوة وشطاره
وحبةً أونطه وناس غبانين
فبلغ شالومي لآل كابوني
واخونا راين
ده أصبح حيينا
وصاحب صديقنا وإيده اليمين
حيخرب بيوتنا
وكل البيوت المجاوره لبيوتنا
ولافينا واحد حيسأل بكام
مدام فيه اقتراض
مافيش اعتراض
و،حتى افتراضاً
ده لو فيه اعتراض
ما فيش إعتراض

حنقدر نهدي بحبة حوار
وحبة سياسة وحبة هزار
فكلُّ يوافق وكلُّ يطيع
ده حتى الرضيع حينزل يوأوأ
ويضرب سلام
يقولك يا باشا يا عم الجميع
توكل على الله يلا وبيع
ورحمة أبوك ما تسأل بكام ما فيش فرق بيننا
ولا فيش حساب
ده لأجل انشكاحك NSF التراب
نبوس الأيادي وشوشاً وضهراً
وندعي لجنابك صباحاً وظهراً
يديم المحبه يديم الهوان
وتحيا ونحيا على أي حال
سلامٌ عليكم سلاحٌ علينا
نموت ونُقْتَل ريحيا السلام

الشنجرنو

الشنجر ينجر نو
اتلحاح جاري الجو
وبلاش تنيج يا فصيح
لتلاقي نفسك في التو
في الطل مالكشي ونيس
واتعلم من النسائيس
بشوية لب تهيص
تشعلق في الأتوبيس
تعجن زي الفلاحه
وتقف في طابور الراحه
قرطاس وتقول بصراحه
نحن جميعاً قراطيس
حتلاقي الكون يحلو

والشجر بنجر مَوْ
لا تعض ولا تهو هو
ليجيلك يا بني العو
وتخاف وتموت أو أو
تضحك وتقول ها أو
واصبرع الجار السو
ليروح ف مصيبه أو
تدعي وتقول لو لو
يا تقول يا يابا ياتك بو
ده الحال أهو ظا ط واحل
والشجر بنجر نو

كان فيه واحد

كان فيه واحد صاحب واحد
كان أخو واحد.. واحد صاحبي
مره قابلني وقال لي يا صاحبي
تعالى انصحني وقولي
كلام سُخْنٌ يصحصحني
قلت يا صاحبي بلاش تصاحبني
أصل لساني تمللّي تاعبني
واللي قرفني ومغلبني
إني بشوف الناس ماشيين
سكتم بكتم مش حاسين
اللي بيرطم واللي بيرطن
واللي يطبطب واللي بيرم
واللي بيهرس بني آدمين

واللي معاه علوين برسيم
جل ولاده باع خلیجاته
وجوه بلاده عایش غربه بقاله سنین
قال بصراحه ماعدتش فاهم
لا أنا كده فاهم ولا كده فاهم
بس تعالی عشان نتفاهم
قصد جنابك تقصد إیه
قلت له دَوَّرْ بَصْ لِنَفْسِك
أو روح صَوَّرْ نَفْسَك صوره
بص لشكلك جوه مرايه
ماهیش مکسوره حتلاقي رسمك
شكل ملامحك مش مطبوطه
عَمَّالْ تَحَرَّتْ جَوَّهْ ف ساقیه
بس عیونك مش مربوطه
بص جنابك فیهِ علی بابك

واحد خول نفسه تعيش
على طول مسطول
بيبيع فينا أصله شاريننا
من الجمعية بطقة فول
بيكتفنا ويخوفنا
وكاتم على أنفاس أنفاسنا
واما بنيجي نشم نفسنا
بيغرقتنا ويفطسنا علشان إيه؟؟
علشان نفضل تحت وصايتة
بيجو عنا ويشعبنا وشكل عصايتة
بيغيرها ويبدلها على كيف كيفه
ما هو حاميننا وهو حارسنا
بعناله روحنا وحتى فلوسنا
بنحوشها تحت عبايتة
وكل ما نيجي نقوم نتكعبل

جوه شباكه أصل خيوط
اللعبة ف إيدء واحنا عرايس
بيرقصنا ويلعبنا ويمشينا
تحت مزاجه فاهم حاجه؟
مس محتاجه نباهه يا صاحبي
بس نصيحه منى اسمعها
كل كلامى ما عادلوش معنى
واوعى تصاحب واحد صاحب
زى حالاتى لسانه طويل
نفسه يفهم كل الدنيا
بس على الله يكونوا فاهمين

الشاعر

شاعر أنا وللشعر أصول
ولا يوم نصفني ولا مرء
أكلني المفضل طبق الفول
غاويه وساكن في مسره
ولا عمري كنت أنا ديل مسئول
ولا قرع يمد لبره
وكلامي كله كلام موزون
وكلمتي دائماً حره
وإن قلت لأأومش معتول
خد دفتري واوزن بره

صباح الخير (١)

صباح الخير.. يا بلدى يا مصر

صباح الخير.. يا أرض الخير

يا عمرانه بقلوب الناس

يا خضره ونيل وضل نخيل

وشمس عفيه قايدة حماس

صباح الخير يانسمة وطير

وبهديكى أرق صباح

صباح النور يا أرض الحور

يا طارحه زهور أمل وسماح

يجعل صباحك أحلى صباح

يا أم الصبايا السمر ملاح

وإدين عفيه وفاس فلاح

بالحب يزرع خطا ويكى

تخضر أرضك وواديكى
تطرح غناوى مع الأفراح
رزقى ورزقك على الفتاح
يجعل صباحك أحلى صباح
صباح الخير، يا بلدى يا مصر

صباح الخير (٢)

صباح الخير.. يا بلدي يا مصر

صبح الخير.. يا عم أحمد

صباح النور يا شليبه

قوام يا محمد اتوضا

وصلّي الصبح يا بهيه

عشان نلحق نقوم نفطر

ونشرب شاي ونتوكل على الرزاق

نشوف أعمالنا ونبدر

ده مشوارنا طويل لسه

من الجيزه على الدقي

ومن بولاق على الوراق

حرام ثانية تضيع يا بني

عشان نقدر في يوم نبني

دي مصر بلدنا محتاجه
لايد الكل صباح الفل
صباح الفل يا هادي
صباح الخير يا أولادي
صبح يفرش طريقكم نور
دي إيد على إيد نمد جسور
وتزرع حب يبقى أساس
نصير عزوه ف وسط الناس
دي كلمه في كلمه ف الكراس
بتبقى سطور بشاره ونور
وسطر في سطر يبقى كتاب
كتاب عربي كتاب تاريخ
وجغرافيا ولغات وحساب
ما تحسبها يا عبد الله
حتلقى حضارة العالم

أساس ليها قاموس وكتاب

كتاب الله حيهديكم

وعلم أكيد حيحميكم

يوصلكم لبر أمان

يا.. عم مرسي قوم اصحى

كفاياك نوم

وقوم إلحق ما بيتنا مكان

صباح الخير يزيديكم خير

كمان وكمان

صباح الخير.. يا بلدي يا مصر

صباح الخير (٣)

صباح الخير.. يا بلدي يا مصر

صباح الخير يا أمنا

يا مصر ده انتي ف دمنا

وعمار يا مصر دايماً

بجهودنا وحبنا

بالإيد ع الإيد حنبني

ونعلّي مجدها

يا ولاد مصر النهارده

محتاجه نحبها

عايزين قوة إرادته

عايزين صحوة ضمير

بعملنا مع العباده

حنحقق الكثير

في عيوننا حُبُّ جنة
يا ولاد مصر النهارده
مش محتاجه لكلامنا
محتاجه لعلم ينفع
ولإيد تبني وتزرع
ولروح تنسى 'المحال
للعامل في المصانع
قدَّام مكن شغال
محتاجه لكل واحد
يبدأ ويقول يا هادي
صباح الخير يا أولادي
صبح نادي يا مصر عمار
صباح الخير.. يا بلدي يا مصر

صباح الخير (٤)

صباح الخير.. يا بلدي يا مصر

صباح الخير يا ضحكائه

يا شمس نهار ووردائه

بتفتح بساينها

مع أغصانها جوايا

تمد النور وضلايه

ما بين شطين

ده أنا صفصافه بتسرح

ضفايرها يا ضي العين

نهارك فل بيصبح على الحلوين

على فلاح بتعاقب على الترعه

رمي همومه ما بين شطك

وطاقيته على الحاجب

ومين قدك

صباح فتح على خدك

يقول يامين يمد الايد

زهور طارحه على العناقيد

بتروي جناين الفرحة

وتغزل م الحماس طرحه

تزين توبك ياضي العين

صباح الخير.. يا بلدي يا مصر

الأوله

الأوله: يا عين

والثانيه: يا ليل

والثالثه: يا مين

الأوله: يا عين والصبر أجبيه منين صبري عليهم طال.

والثانيه: يا ليل قوللي نهارك فين تتبدل الأحوال

والثالثه: يا مين ملّك غراب البين وأمورنا للأنّدال

ده الندل لما حكم

قال للخسيس إعلى

والواطي مهما على

برضه الأصيل أعلی

يا مقسمين الأرزاق

ع الحلوء والمرّه

أنا إللي صبري طال

ما نصفتونيش مرّة
ظلم الخلايق فاق
وأنا كلمتي حرّة
مكتوبه ع الأوراق
بالتمر والحنّة
ده الحر لو يوم فاق
ما عمره ما كان مره
قدام جبان ينهان
ولا ينحنيش مرّة
وأنا قلبي فيكم داب
ما تصحصوا مرّة
طبع الخسيس قلاب
ما صدق ف يوم مرّة
واللي يا ناس فيه داق
ما يبسلهوش مرّة

وأنا صنعتي قَوَّال
والقول علينا حق
لو شفنا قاضي حكم
بالظلم حنقول لأ
يحرم عليه النوم
دي لو القيامه نقوم
والأرض لو تنشق
عمري ما أقول أنا آه
وأنا جوّه بصرخ لأ
آه يا زمان العبر
الحرفيك انضمام
شفنا ف زمانك عجب
والحكم له أشكال
حسب المزاج والطلب
والصنف والألوان

وإللي حكم ع العرب
قاضي مالهشي ميزان
الخصم عنده حكم
والشرع فيه متهان
قوم ياتاريخ إنظلم
واكتب على الأبدان
قوم فوق يا واد منك لها
قبل صدور الأحكام
ده الظلم لو يوم حكم
حكمه ف جميع الأحوال
براءة إللي قتل
وإللي انقتل إعدام

رحال

بعت لي حبيبي كام كلمه
مع النسمه ف جواب شفاف
ما بين رمشي وبني رمشه
أتولد بينا شعور واضح
ومش خوآف
وقال سافرت في عنكي
وف عيونك أنا رحال
بقيتي كل دنيايا
وأنا ليكي بقيت موآل
ماليش مرسى ولا مينا ولا زوآد
وقلبي بين كفوف إيدي
ولو بيدي
أخلي دقته تضوي على دروبك
شموع تنقاد

لقيت في عنيكِ موالِي
وعنواني إللي تاه مني بقاله زمان
لقيتلي مكان
ما بين شمسك وبين ليلك
لقيت في عيونك الدنيا
إللي كان نفسي أعيش فيها
وأموت يا ولاد
لقيت ضحكك نهار حلوه
لقيت معنى لقيت غنوه
تغنيلي أظير وأفرح
وأدوق شهدك
تناديلي عشان أرجع وتسقيني
ده أنا العطشان ليالي طوال
حعيش في عنيكِ ميت بكره
وفي عيونك حعيش رحال

سلام يا صاحبي

أنا عايش ومش عايش
أنا عايش على الهامش
بعيد عن شمس أيامي
أنا بحلم ومش خايف
من الأحلام ترجعني
لعتمه جوه سردابي
ده أنا واقف على بابي
رسول بالحب بيخبط
عشان أبدأ معاه ثاني
من الأول من الآخر
لازم أبدأ ولا اتاخر
ليل مالهوش يا ناس آخر
سلام يا صاحبي أنا مسافر
لدنيا تانيه واخداني

لضيّ ونجمه تحلالي
أعيش فيها لآخر عمري
وتكون لي مخده حرير
تضم الشوق وتحضني
رياح الخوف ما تأسرني
ولا استسلم لخوف ثاني
أنا ماشي ومش راجع
لقضباني إلهي خانقاني
وسجّاني خلاص مالهوش
عيون تقدر تحاصرني
بقيت دخان وسمه حرير
تطير لبعيد
لآخر نقطه واخذاني
وعنواني مالهش برید
ولا جوابات

على جناح الأمل طاير

بلا جناحات

لقتني خفيف وأنا راكب

على مهرة نهار طالع

يسلم لي رايات بكره

ياريت يا بكره تبقى لي

بشارة عيد

أعيش فيها وأنا بحلم

وأنا في حضنك بعمر جديد

ياريت يا بكره تبقى لي

بشارة عيد

بغبغوه

بغبغونا وبغبغود

كتفونا وسيبوه

جُم باعونا واشتروه

وأما جينا نقول يا هووه

قالوا ننه قلنا هرو

نمنا نمنا في التبات

حلمنا فرفر ومات

عمر جاي وعمر فات

وأما جينا نقوله هات

قال أبوكو السغامات

بس لازم تشنقوه

جينا نصرخ جاي ياهووه

قالوا ننه قلنا هرو

نحكشونا وسشوروه
فوق كتافنا ركبوه
هز رجله وقاللي شي
قلت له لأمش ماشي
حنسونا بالعليق
ضيعوا حلمي البريء
خربوا بيتي وعمروا ف بيوت أبوه
وأما جينا نقول يا هووه
قالوا ننته قلنا هوو
قلنا طور قالوا احلبوه
قلنا طور قالوم هاتوه
عملوا فته وفتتونا
شبعوا هممه وجوعونا
قلنا ممة قالوا بحه قلنا كخه قالوا دحه
ضحضوني وعضم أخويا قرقشوه

وأما جينا نقول يا هووه
قالوا ننه قلنا هووه
قالوا سد يا بابا نام
بكره جاي لك جوز حمام
والمخده ريش نعام
إتخمد وإياك تقوم
جيت أصحصح قالوا نوم
كتفوني وقالوا عوم
غرقوني وحلم بكره غرقوه
وأما جينا نقول يا هووه
قالوا ننه قلنا هووه

اليوجا

قالوا العرب حَزْمَه

أنا قلت مفكوكه

عملوا العرب حسبه

أنا قلت معكوكه

حسبوها بالمقلوب

ومشيوا بالشقلوب

طلعت لهم شوكة

وقفت في وسط الزور

على مين حيجي الدور

وحيركب الموجه

قالوا العرب فرسان

قلت الفرس حرنان

قالوا العرب جدعان

أنا قلت في اليوجا
وقفوا في طابور خبيان
واتصاحبوا ع التعبان
بقى لحمهم نوجه
قالوا العرب فاهمين
أنا قلت مش عارفين
دي اللعبة محبوبه
والحيل بقي مهدود
والعضم واكله الدود
والسكه معوجه

أهلك لتهلك

أهلك لتهلك يا وله
ده كلام قالوه من كان سنه
جدي وجدك أصلهم
كانت لهم أمثال بتحكم طبعهم
قوم عيد حساب المسألة
وارجع لهم
قالوا القرايب دول حبايب
واوعى تبعد عنهم
إفرد جناحك ضمهم
واسأل عليهم ودّهم
دول همّه زادك
همّه ضهرك والسند
وعشان تجيب بنت وولد

حافظين ملامح بعضهم أمك وأبوك وأختك وأخوك

لو يوم جافوك

الحب باقي ف قلبهم

وولاد عمومتك والخالات

وولاد ولاد عمك وخالك

همه دمك

و،انت فرع ف أصلهم

وقت الشدايد كن لهم

صدر حنون وسند لهم

البسمه فوق الشفتين

تصبح محبه في ضلهم

ضمّ الفروع واروي الجذور

بالود تبقى مأصله

والشجره تبقى مخضره

وأدي القرايب حقهم

وإن كنت زعلان منهم
داوى الجراح وانسى إلهي راح
وافرد جناحك بالحبه والسماح
ده العفو عند المقدرة
حيخلي حزن الكون براح
وبكلمه حلوه صغيره
الدنيا تبقى منوره
وتعيش بعزوه ف وسطهم
أهلك لتهلك ياوله



في ناس وناس

في ناس خبيثها يجوز السبت
وناس خبيثها أكيد الحد
واحنا خبيثنا ما عمرها
وردت يوم على حد
رافعين رايات التنزيحه
والهم بقي كيف ع الريحه
ولا حد قادر بسند حد
وعيون يا عيني وعميانه
وعقول أونطه وتعبانه
ورجال لازمهم تطريحه
ولحاف يدوبك بقي على القد
ضحكنا والضحك ده غيّه
والنكته أصلاً مصريه
ودي عاده فعلاً ومريحه
فنسينا كل كلام الجد

سبيناً عيالنا ورا المغنى
والرقص والكيف جاب داغنا
ولمّا شميناً الريحه
هويناً لمّا الحيل اتهد
سبيناً الحرامي ابن الهرمه
والراشي وقليل الذمه
وجيناع الغلبان إيه
وقطعنا إيده إللي بتتمد
صدقنا سيدي الكلمنجي
وعملنا أخينا برنجي
ولمّا زفوه بفضيحه
رُحنا لشارع آخرته سد
في ناس خبيتها يجوز السبت
وناس خبيتها أكيد الحد
واحنا خيبتنا ما عمرها
وردت يوم على حد

المنحوس متعوس

الى كل من يتصرف في أداء واجبه تجاه هذا البلد مستغلا مركزه

طول عمري كذاب ومقاوح

وشربت م البحر المالح

لحد لوني ما صار كالح

وعودي أصبح خشابي

مشيت على الشوك كعابي

أخط واشطب في كتابي

واعصر في تمرى وعنابي

علشان جبان طمعان فيّه

في الصخر نحت بإيديه

شايل هموم البشريه

وإن مُتْ كلب مالوش ديّه

وإن عشت أعيش عريان بلبوص

قالوا الفلوس بتذل نفوس

واللي اتنحس متعوس متعوس
وحتعمل إيه كهربا وفنوس
في نفوس ضعيفه ومقهوره
من نُقره تيجي للدوره
وحياة مقام أبو شفطوره
وبحق نفسي المكسوره
لاكنس عليكم الأوليه
واصرخ واشق الجلابيه
وادعى عليكم الصبحيه
بدعوه طازه منقيه
ومصبيه واقلب مركوبي
يجعل نهارك خروبي
ياللي انت فضيت لي جيوبي
ونهب زرع مع جيوبي
وفايطني اشحت ع الأبواب

فيه حد شاف أنا قدي عذاب

من ميت سنه لزمن قلاب

وأنا صفر ضايح جوه كتاب

بغني وأمشي ورا الكذاب

ولا عمره قدّم كشف حساب

وأنا ممعّيش ومعاها ملاين

حدعي عليه وتقولوا أمين

إلهي تعدم يوم كراسيك

ويعلقوك فوق شماعه

آمين

يكبس عليك النوم وتقوم

تمشي تطب في بلاعه

آمين

تقف في زورك يوم يا خفيف

مسمار يكون محشور في رغيف

آمين

تقف في وسط طابور مودعين

وتنبهك شركات توظيف

آمين

ما يربحك يا بعيد مليم

آمين

إلهي تركب بالمتلوب

حماره هبله وتحرن بك

آمين

إلهي تعطش - تشرب - تشرق

تروح في داهيه.. وقولوا آمين

آمين

كلاه تهاد

يا كلينتون يا زعيم المفهوميه
النظام العالمي بقى ميت ألسطه
وميه وميه
كلاه نايم في السكات
كلاه ساكت لنمات
كلاه لابد في لدره
يعني كام كراج ورا
وحينسوا إيه هيه القضييه
يا كلنتون يا زعيم المفهوميه
قالوا ماتوا من العرب
حبة عيال يطلعوا ميه
طب وماله إن شالله
ألف وعشروميه
حنراضيههم نشترههم
برغفين وبضانيه

يا كليتون يا زعيم المفهوميه
كل طلباتك أوامر فوق رؤوسنا
عدي واضرب يا جدع وفرم ودوسنا
ما احنا بعنالك نفوسنا
وبفلوسنا هات يارش ومكرميه
يا كليتون يا زعيم المفهوميه
والعرب بقوا في التمام
كله سامع الكلام
حد يقدر يلوي بوزه
أو يعارض شيء تعوزه
يبقى ناوي على الأذيه
يا كليتون يا زعيم المفهوميه
النظام العالمي بقى ميت ألسطه
وميه ميه

المصححاتي

مصصححاتي سهران بهاتي
ولا كنش أصلاً مسحراتي
ولا أي حاجة في آخرها راتي
طقت في راسه يقلع مداسه
ويلم ناسه ويلف طول النهار يهاتي
طبل وزمر قلبه المعمر
بالحب لوّن حبة عيونه واللون رمادي
قال كنت راضي حكّمك يا قاضي
وانت إللي عالم الحكم ظالم
وزهقت يابا من طول سكاتي
ده الجاني جاني ياخذ مكاني
طمعان في أرضي والأرض عرضي
والعرض غالي أفديه بحياتي
يؤمر نطيعه وتاريخ نبيعه

ونغد إيدنا يقطع وريدنا
وعيوننه حمرا والشر بادي
قالوا سلامكوا يسبق كلامكوا
طيرنا سرب الحمام وغنى
ورجع واهو مفرفر قصادي
أمرك يا سيدي حقفل بريدي
وأديح وليدي علشان جنابك
لا فيه مشاكل ولا فيه قواضي
أنا أصلي ناسي كل المآسي
من تحت راسك قربعت كاسك
ريحت راسي لا بقالي حاضر
ولا عندي ماضي
وجريت يا مرسي سجبولي كرسي
وسقوني خمره ف قزازه حمره
كترم قصادي أنا رحت ماضي
وفي بيعه سكه طلبونا فكه

عكونا عكه ومشينا سكه
آخرتها دكه في الاحتياطي
فتح يا اخينا ده ابن اللئيمه
ركب فوقينا ابن الذينه
وقال لي شي حا بلاش مقاوحة
وامشي الساعة دي
قوم قول يا هادي
صحصح زناتي
خليه ينادي على كل واحد
تاه من بلادي
أرض العروبه بنيناها نوبه
طوبه فوقها طوبه
ولا كان فيه واحد يقدر يعادي
لما افترقنا خابت فروعنا
نشفت عروقنا والدم أصبح
ميه بتروي غيط الأعادي

ارمي بياضك ده السبع صادق

مابقاش قصاصك

غير خطوة واحدة وإن كنت غاوي

بوس الأيادي

مسحراتي جاي النوبه دي

الحب زادي علشان ولادك

وعشان ولادي

قول حادي بادي

تعرف مرادي وافهم كلامي

تحفظ مقامك وارفع رياتي

كُل فول حراتي خليك نباتي

من صنع إيدك ولا حد سيدك

ولا يوم قصاص الخسيس تطاضي

لملم صفوفك يا تموت بخوفك

صاحب عدوك لازم يضرك

مافيهاش غرابه وده أمر عادي

الأؤونه أونه في مزاد باعونا
لما التقونا في سابعها نومه
والعقل فاضي
واهي بيعه يللا وغرقنا والله
لما افتكرنا إن الكتاكيت
صاحبت حدادي
بولوتيكا تيكا فتح ياويكا
حراميك ريك وحاميك ريك
وحياة أبيك فهم أخيك
ده انت وهوه على اللي يعاديكا
تقوي الأيادي
حلّوا القوالب ده الطبع غالب
ملعون أبونا لوطبعونا
وكفايه ضحكوا في يوم علينا
وقالوا حكم ذاتي
يا عروبه حره موتي انت حره

لكن حقولها لو مرة خطُّوا
فوق إلهي خطُّوا
على عضم أبويا
حفديك يا خويا
وحبيـع حياتي
وتعيشي حره يا... يا بلادي
قومي فوقيني صحصحيني
من سباتي مصصححتي مغنواتي
تلسعني شوربه أنفخ ربادي
بغني سيكا والناس بياتي
بدن في مالطه ووجودي غلطه
بازعق واهاتي وأنا في وادي
والنا..... س في وادي

ॐ नमो भगवते वासुदेवाय

إهداء

إلى أجمل وأغلى قصائدي ابني هاني

بحبك طير بريش أخضر

وموجه شقيه تتمخطر

على شط الأمل لولي

واحبك حلم ف جفوني

وتر مشدود على نولي

يا أجمل فرع ف غصوني

بحبك ضحكة جوايا

وشمعه وضي سهرابه

نغم ملضوم ف غنوايه

وبقلق لو تغيب عني

وبفرح وانت ويايا
واحـب رموشك السـمـره
وضـي عـيـونك العـسـلي
بشوف فيهم متين قمره
تنور لي سنين عمري
واحـبك لما تنده لي
وضـل وخطوه تسبقني
تـكـمـل لي مشاويري
واحـبك نسـمه تحيـيني
ونـجـمايـه ف سـما ليلي
وقلّه قناوي تسقيني
وتروي قلبي بالفرحه

واحبك سنبله وقمحه
وتكعيه أمل طارحه
واحبك طرح عنابي
وخطوة فجر يشابي
واحبك حرف يتشعبط
على سن القلم يرسم
ملامحك جوه ف كتابي
واحبك أحلى حدوته
وغنيوه وتوته توته
بتسألني . ده مين هوه
أقول هاني حبيب عمري
ونن عيوني من جوه

ماما

قصر الكلام

قُصِرَ الكلام

كُتِرَ الكلام

بيجيب مشاكل والودان

مش ناقصة زن

وعشان تبين نيتك

قصرّ وفسر كلمتك

لم المكسر والسليم خليه ف جنب

وعشان تفوق

طنش تروق

وكمّان يا زوق بقي لو سمحت

رجليك لفوق راسك لتحت

وعشان تسوق عرق الهبل والشيطنة

هات عود قصب واركن ورا

دندن عليه ظلموه يا بيه
والبس بيجامه مشجره
وفانله سودا مخرمه
وكمات ياريت
تدعل نفوخك كل يوم
ببيه سخنه وستفره
حتلاقي دنيا بين إيديك
حلوه وآخر مسخره
مجنون صحيح لكن صريح
وجنان يهون
ولا يوم تكون
عاقل وقاطع تذكره ف قطر السكات
وعلى العموم
القطر فات
وعليك يا واد تفضل كده

جنب الرصيف .. خليك لطيف
واسمع كلامي أصل أنا
جربت فعلاً من زمان
والله تلك المسألة
واهو من ساعتها
حتلاقيني في الطابور من غير كسوف
واقف ورا
مستني اقطع تذكره
في قطر الوقوف

صباح الفل

الغصن لما مال
همس النسيم وقال
يجعل صباحك فل
يا وردع الأغصان
ده لكل زاهر آوان
والشمس لما تطل
تدفا قلوب الناس
تطرح غُنا واحساس
والكون يساعي الكل
ميل ياورد جميل
وناولني عود ياسمين
قول يا بنفسج مين
جرح خدود حلوين
خلاك تملي حزين

سرحان على غصنك

عود الريحان يقول

إياك تبات مهموم

عَطَّرَ ربيع الكون

بزهور جمال حسنك

عُمِرَ الورود ما تموت

طول ما الأمل موجود

والورد للغالين

سبحانه مين خلاه

ده لكل زهر لغاه

ف الحب له مواعيد

وربيعه أجمل عيد

فيه القلوب تتلم

وتقول صباح الورد

ونقول صباح الفل

شقلباظ

شقلباظ شقلباظ

کله عالم شقلباظ

نصه کش وخاف ولاص

وباقی کلمه شقله... باظ

شق آخینا هدومه لما

صدق الکداب ولاص

والخسیس والندل لما

داسوا فوق خاش إلى جانبنا بالمداس

قسّموا ترکّه أبوهم بالمقاس

آه یا ناس

کل شیء ف الکون ده جایز

لما تبقي الدنيا سایبه

والمصیبه

لما نايب يبقى ناييه
حكّموا فينا ابن داىخ وابن خاييه
جابوا داغنا وفوق دماغنا
كر كبوها ولخبطوها
وحلفوا أبداً مايسبوها
إلا لما يخربوها
واشترروا فينا وباعونا
جوه حجرك يا وطنطن
وإللي زرجن وإللي برطم
واللي مات فيه الحماس
واللي بيته من قزاز
واللي قابل ناس عزاز
واللي قدم إلتماس
آه يا ناس
إلعنوا خاش إللي باس

واللي طير ف الحمايم
واللي قام يطلق رصاص
واللي علمنا نشخبط
فوق أسامينا برصاص
علمونا الشقلباظ
كله عالم شقلباظ
نصه كش وخاف ولاص
وباقى كلمه شقله... باظ

أولها

أولها طيط

وتانيها ظيط

وتالتها حلة أرنبيط

من غير غموس

ولاحاف يجوز

وانت وشطارتك يا عبيط

يا تعيش جبان وسط الغيلان

وتموت فطيس

يا تكون جبان

أو ألعبان

تلحق مكان بين المعيز

وتموت أليط

وأنت وشطارتك يا حويط

أولها طيط

وثانيها ظيط

وثالثها حلة أرنيط

حلم

بتمنى يوم العيد
أكون إنسان جديد
طاله بشاير فرحته
فوق الملامح من بعيد
شاهر ف وش المستحيل
سيفه الحديد
بحلم بروح ابن الوليد
ترسم على كل الأماكن والمدائن والغيطان
تكتب على حدود الوجود
عنوان أكيد ويكون دليل
مش مستحيل
الحلم يرجع ثاني
يجري جوه ف عروق الأمان

بحلم بحرفي يكون سهام
ويكون سلام ويكون بارود
بحلم بحرفي يكون ورود
ويكون نهار ويكون حدود
يطرح قنابل لو يعود
الخوف لأيام السكوت
بحلم أعود إنسان جديد
آه لو أعود

آدياوطن

لساك في عيني يا وطن
أجمل وطن
رغم إن ليلك طار طويل
لكن أكيد مش مستحيل
إنك في يوم حتعود
على صوت المدافع والبارود
وتعدي فوق جسر المحن
وتهد قضبان السكوت
وتعود إلينا يا بطل
زي القمر ليلة التمام
إياك تقول تعظيم سلام
للإنكسار والإنهزام
قوم يا وطن هز الهلال
وابدر سنابل طلعتك
فوق الملامح دي الغيطان

مشتاقه تحضن رجعتك
قوم شق صدر الليل ف لحظة مولدك
حل الضفاير يا وطن
وامسح دموعي وغربتك
تبدل الآهات ونفرح باللقا
ونرش أعتاب البيوت
بزهور جناين ضحككتك
آن يا وطن ده أنا فيك بموت
وحكايتي كانت بين سطورك ملحمة
متقسمه ومتلحنه
مكتوبه فوق جذع الأمل
بحروف ذهب فوق الجبين متبعتره حبات ياقوت
آه يا وطن لو يوم تعود
تحكي حكاية أصلنا وأصل الحدود
وتشد من جوف التابوت
عزم إلي ضاعوا في الطريق
وتوزعوا بين المفارق والحدود

الموت ده كان أهون لهم
من إنهم يوم يلمحوا ضي النهار على أرضهم
يوم ينتحر أو يوم يموت
قوم يا بطل واصحي بقي
ولاً الشقا
مكتوب عليك م الأولة ليوم الخلود
قوم عيد حساب المسألة
سن القلم والمنقله
وأحسبها صحصح يا وله
إيه اللي نابك من خيوط العنكبوت
قوم علي صوتك للسما
قول إلهي باعك يا وطن
ده ماكنش أنا
أنا مش جبان ولا نيش نبات شيطاني سارح بالجحود
ولا خوف ولا سجن البدن
حتخلي راسي تتحنى قدام تثار
ولا جيش مغول
ولا يوم حطيق أبداً سجود

إلا لرب العزه
ولامتى السكوت؟
يلا يا شمس اتسرسي
بين العروق واروى الشراقي والشقوق
إللي حفرها الخوف على جبين الشروق
قول السلام عمره ما كان
معناه تراجع ولا خوف
ولا يوم ما طيرنا الحمام
كان قصدنا نخضي على
صك لمبايعه ولا موت
واكتب على وش القمر
أن الأمل لازم يعود
ولا فيش خسوف
قوم يا وطن صحصح وفوق
حط النقط فوق الحروف

خروف العيد

رغم إنه عارف إنه لازم يندبح

عمره ما صرَّخ أو بكأ

ولا راح لقاضي ولا اشتكى

ولا يوم عصى ولا يوم كفر

ولا قال ده أنا ف سوق الغنم

أجدع نفر

واشمعنى أنا من بين ذوات الأربع أموت

ولا فيه ضريح ولا فيه تابوت

طول عمره راضي

والرضا طبعاً علاماته السكوت

شفناش بقى فيه مأمأه

ولا سفسطه ولا عضضه

طبعاً مفيش

مش ضعف منه ولا خوف

لكن ظروف !!

خلت خروفيه تولده

أم جه جنابه وحضرته طبعاً خروف

مكتوب على جبينه الشقا

ملهوش لاحق الاعتراض

ولا له حقوق ف المأمأه

وطلع نزل حبعيش خروف

ويموت خروف

سجن البدن

يا ويللي يا غربتي

من طول مشاويري

يحكي الزمان قصتي

ويعيد مواويلي

غريب ف حضن الوطن

والحلم كان زادي

مسجون ف توب البدن

يا أهلي يا ولادي

مين فيكوا يبقى دليل

ويكون لنا هادي

نوصل لبر النور

وتعود مراكبنا

يرسي الجمال والخير

قنديل قصاد بيتنا

مهما الضلام حيطول

لابد يوم راح أعود

أوصل جبال الشوق

بالوعد والمكتوب

ده أنا اللي صبري فاق

صبر النبي أيوب

معنى السكوت

وسط الزحام بيتوه

صوت الكلام بيناً

بنعدي سجن الكون

بعيون مشاعرنا

وساعات كثير يكون

ف الهمس بين قلبين

يحلا السكوت ويفوت

الوقت غمضة عين

والشوق شراعه يدور

تهمس شفايفنا

ونعدي ألفين سور

ولا حد يشوفنا

ده أنا كنت طير سواح

من غير جناح بيطير
قلبك بقالى براح
وربيع نسايمه حرير
إفرد جناح الشوق
واروي عطش ليلي
دوبني آه ف الكاس
واشرب مواويلي
دمع الحنين خوآف
أوعاك تخون مره
قلب الحبيب شوآف
ما نسيك ف يوم مره
عمري بديته معاك
ومشيت ف مشوارك
وجريت بشوقي وراك
قلبي انكوى بنارك

ولقيت حياتي معاك
جنة وكون ساعني
إن تهت يوم في هواك
إياك ترجعني
شيلني ف عيونك شيل
واحضن لياليه
ده أنا ويلي يابا ويلين
ويل قلبي وعنيه
قلبي يشب لفوق
نفسه يطير بيّه
ورموش عيون خافين
لتوه مراسيه
لو يوم يضيق الكون
حضنك يكفيني
ده هواك هلال مسحور

نورٌ سما ليلى
خدني لحضن النور
وننام سوا ونقوم
على شوق بيحضن شوق
وجنون ينادي جنون
رعدة سكوتنا كلام
والهمس من غير صوت
ده كلامنا لو يتقال
معنى كلام حيموت

وليـه لآه

تدوم يا مصر أعيادك
وأولادك شموع تنقاد
تنور لك طريق بكره
ونتلاقي مع الأعياد
تجمعنا ليالينا
وأحلامنا وأمانينا
نمد الإيد وإيد على إيد
ليالي العيد حتبقي جوه
ف قلوبنا
حياه ترسم على عروقنا
نساييم فجر حيفتَّح شبابكنا
على فرحه وعمر جديد
نهار يضوي داير ما يدور
ونور يهدي مراكبنا

نعدي ع الصعاب
نوصل لبر النور
قمر مسحور يناديكي
تلاقينا نلاقيكي
ونفديكي يا أرض الحور
نضمك حلم ف جفونا
نشمك عطر م الجنة
نزوقلق خطاويكي
يا منقوشه على عروقنا
يا دقه صاحيه ف قلوبنا
ما بين أيوه وبين لأه
تزيد الدقة والدقة
أغنيلك مواوليك
وأوصلك شرايني بشراينك
وليه لأه؟

حتتلاقي

ونتوضأ على سكة أمل لولي

مع ضحكة نهار فضه

نصلي الفجر ندعيلك

وبالنا يروق

ونبدرك أراضيك بتقاوي شروق

تدور فيكي سواقيك

وترويلي عروقي البور

نغني لك على الطبله

وع الأرغول

ده أحلى ما فيكي يا بلادي

أمل صاحي ما بين

رمش العيون السود

بتحلف أنها لازم ف يوم حتعود

ترجع ضحكه

حتز غرط على جبين الزمن وتقول
أنا يا بلدي جيت افتح طاقات النور
عشان نشرب ونتوضأ
على شط الأمس ونقوم
نقوم ونعيش
ولا نبكيش
نقوم نحلم
ولا نخبيش
دموع غربة ليالينا
ومادام فيه أمس موجود
لازم نرجع لبعضينا
ونسنتي قدوم العيد
تدوم يا مصر أعيادك
وأولادك وحلم جديد

عروق الكلام

أنا حرف واقع م الكلام
على حرف سطر مالوش بداية ولا ختام
قُصِرُ الكلام
أنا حرف تايه بين حروف
ملهاش ملامح من زمان
وساعات بغيب
وساعات بيان
وساعات بأدورع البيان
وأجري وأسبق خطوتي ف ضل السكات
وساعات بأموت وساعات بأنام
وكتير بتوه وسط الزحام
وساعات بكون ضحكة أمل متبعترة
شخايط قلم فوق السطور متحيرة

نرسم دواير كعب داير
في المواني واحارات
ترسم بشاير سكتي
وأحكي لطوب الأرض أصلي وقصتي
من الأوله لحد التبات
حدوته ماتت فوق شفايف غنوتي
وأجري وادّور عل الولاد
السّمرف عيون الحكاوي والمطارح والبلاد
وألقى العيال سابوا المدارس والعلام
خاصموا الأماكن والدكك
تاهوم صحيح ولا السكك
صبحت سراب
يا غراب يا نوحى
إمشي غور
خلّي البكور م الصبح بكره يرجعوا

يملولي عشي الضلمة نور
دي الأرض بور مترشقه بسهام عطش
والحلم باني ما بين عيونه
وبين عيوني ألف سور
عصفور أنا وبطير بربع جناح وأدور
ده أنا ريشي يا أمايه اتحرق
لما لقيت سيفي الحديد
أصبح ورق ف نهار عذاب وف ليل قلق
يا هل ترى إحنا إللي ضيعنا الطريق
ولا الطريق منّا انسرق
بس الأمل جوانا نور
لو تفتحيه راح تتعمي
من ضيه يا سكة عذاب
مكتوبه فوق صرخة أمل جوانا غاب
الحلم لازم يتولد ويا الأذان

قالت لنا كده من زمان
أمي الحبيبة الطيبة
من ألف ليلة وليلة وآخر الزمان
الحق لازم يوم بيان
لو حرف مال
فيه ألف حرف وحرف بكره حيطلعوا
وحيلضمووا ضي الكلام
ف عقود أمل وجناح حمام
وبسن ريشه حينكتب بسك الختام
وحيجري تاني المعنى ف عروق الكلام

قال الوداع

نزلت سوق الفرح
عشمان ف ضحكايه
لقيت شعوري انجرح
والحزن جوايا
مديت عيون الشوق
أوصل نهاري بكره
جبل الوريد انقطع
وبقيت أنا ذكرى
مكتوبه فوق الودع
بحروف بلا معنى
مكتوب عليك يا جدع
تفضل هنا معنا
نمشي ف طريق الألم
وأهات تجمعنا
ونسن سن القلم
نكتب بأوجاعنا

حُضِنَ البراح انخنق
ولا كون بقي يساعنا
قَلَّبَ كفوف الزمن
واقرا عناويني
حتلاقي عمري اتسرق
وفضل سواد ليلي
والقى ف زمانى البدع
واخنق مواويلي
واكتب عليك يا ودع
بدموع رموش عيني
نفسى ف حفنة فرح
ولطعم غنوايه
فنزلت سوق الفرح
عشمان ف ضحكايه
لقيت شعوري انجرح
والدنيا نسايه

اصرخ بعزم الصوت

بصرخ بعزم الصوت
يا نعيش سوا يانموت
والموت ما هوش بالجوع
والعيشه مش بالقوت
مـدينا ايدينا سنين
والدين صبح ميت دين
عمر الخلاص ما يكون
في طريق ظلام مسدود
والدين همومه كتير
ف رقابنا طوق مربوط
قوم يابني شد الحيل
وازرع وكل بإيديك
دي الأرض لسه عمار

واللقمه حتكفك
شرك الضلال منصوب
علشان تبات مغلوب
بيكتفوك بالقسوت
وبيضضربوا المربوط
علشات تخاف وتموت
بعنا آمال ونفوس
علشان رغيف وغموس
وصبحت يا ولداه
بين فك ديب ولصوص
زندك مادام موجود
إياك تميلع الغيير
واروي الأراضى البور
وابدر تقاوي الخير
خصمك يموت محصور

ونعود لحضن النور
حرّس من التعبان
وده قرصته والموت
واياك تعيش في الكون
موجود ومش موجود
وازعق بعزم الصوت
يا نعيش سوا يا نموت

حلي الضفاير

يانا يا أمه يا أمه آه
أه يا قلبي كان في جنبي
حلم جابني من بعيد
ولحد دارك
بس بابك كان موارب
والعقارب والسنين
شقين رحايه
وانتي مطحونه ف دمايا
كان معايا ألف حلم
وألف غايه ميت مرايه
والوشوش هياهمه هيّه
والزوايا منتهيه
والبدايه خط مايل
في النهايه عبد شایل

فوق كتافه حمل ناطق بالحقيقه
والعيون ماتت بريئه
لما باعونا ف دقائق
والمظالم لبسوها توب حقايق
والحرايق نهر جاري فوق دمايا
مين عليه ومين معايا؟
ألف ضفر وألف حافر
مغروزين جوه ف حشايا
وف بنوك الدم ضعنا
لما بعنا دم أحمر حر فاير
واشترينا دم فاسد
والروافد هيه هيه والحكاية منتهيه
واللي صاير ع الجميع
لابد يوم حيصير عليه
علمي داير فوق خطوط العرض حاير
حلّي يا شمي الضفاير

وابدريها ألف مره
يلّي خليت صوتي عوره
الكلام مالهوش مواسم
يلي واشم فوق عروقي
ألف دقه خوف كفايه
تهت يا امايه ف طريقك
وف طريقك
كان حريقي وكان حريقك
كنتي واقفه وانتي شايفه
ريشي طائر من لهيبك
بس خوفك بي ريقك
قام طريقك خاف وحوّد
عن طريقي انتي فاكراني بحقيقي
ولا ناسيه
ألف صحه وألف عافيه
ترجعلي بالسلامه

ترسمي ضي علامه فوق جبيني
 تحذيلي طوق نجاتي
 والزناي يقوم ينادي
 علي باقي من بواقي حلم عمري
 نن عيني يقوم يسمى
 الآيات توصل آياتي
 وف شرايني اللي ماتت
 ترجعيلي دم وافر
 حلم عافر جوه مني
 مستحيل البعد عني
 قربيني من عيونك
 واستريني بطرف توبك
 واشتريني قبل ما يبيعوا اللي فاضل
 لسه فاضل شعره واحده
 بين سكاتي وبين جنوني
 خوفي طالل من جفوني

ف انتظار لحظه ميلادك
والقرار ف اديكي إنتي
والعمار بإيدين ولادك
بس زادك مش مكفي
والعيال سافين ترابك
لو بكفِّي أملا قُفه من عظامي
تبني بيها سقف دارك
قلبي صدأ ف انتظارك
فوق شطوط لنيل موافي
حرف حافي ضهره محني ع الحديده
والمسافات الوحيدَه
هي موتي أو رجوعك بالسلامه

خلويص بقى

خلويص.. خلاص.. خلويص بقى
 يلي انتو جيبتموا لنا الشقا
 ماشيين ف سكه مبهوأه
 والناس يا عيني مصدقه
 ونزل عليهمها بهأهأه
 شبعم قواله وترياه
 ولا حاجه فيكوا محوأه

عاملين من النصّاب ولي
 بقى شكلكم يكسف قوي
 شحات وعامل فنجري
 واهبل وعامل فسهلوي
 وضحك عليكو المفتري
 خلاكوا فُرجه ومهزأه
 ولا حاجه فيكوا محوأه

أهلاً وسهلاً.. مرحباً
عاملينها قعدة ومصطبه
وايشي مكلمه وايشي طبطبه
واصدق ما فيكم بيدبا
مكتوب على وشه الغبا
أول حروفه التأنأه
ولا حاجه فيكو محوَاه

تستقبلوا وتودعوا
وبتكذبوا وبتنخسعو
وبتصرفوا وتبعزقوا
لو مال قارون ما حتشبعوا
واهي دقني اهي لو تنفعوا
يا مبدعين الحمراء
ولا حاجه فيكوا محوَاه

صماويل عقولكوا ملمسه

ولا فيه صباح ولا فيه مساء
وليلتكوا ضلمه مدغمسه
يا شله تايهه محروسه
فوق الكراسي متربسه
عاشين عواله وسفلاءه
ولا حاجه فكوا محوؤه

يا اخوانا إيه بس العمل
جبتولنا ف عقولنا الحول
وغداء عمل وعشاء عمل
ولا شفتنا حاجه بتتعمل
موتوا في قلوبنا الأمل
يا مدمنين الخرباءه
ولا حاجه فيكوا محوؤه

لموا الإيدين ولاش سلف
رد البضاعه بالتلف

واحنا اللي واكلمين العلف
بنقولكوا الوضع اختلف
ملعونه مين عايزه الخلف
خليها تتوحم بقى
عاملين لجان ومشكله
قالوا الخطط دي مؤجله
بس انتوا قولوا جلا جلا
وطلع ف جتتنا البلا
ولا نبنا غير البهدله
يا مفرمين بالوأوأه
ولا حاجه فيكوا محوأه

قلتوا السكوت يعني الرضا
ضاع الصدا ويّا النداء
ولا حتى سيبتوا لنا اللضا
شدتوا من فوقنا الغطا
جم دبّحوا فينا العدا

الله يسامحكم بقى
ولا دعوه فيكوا محوَاه

وحياه جوز أُمي اللي انحسر
ولا شاف كباب ولا داق ظمر
بالمفتشر والمختصر
لا دعى عليكوا نفر نفر
يشفيكوا من قصر النظر
وتحلُّوا عنا قـوام بقى

ما تخصصخـصونا وتخلصوا
أو سـربونا وهـيـصوا
وحياه أبوكوا اتصرفوا
ياريت بقى لو تـفـطـسوا
وتخلصونا وتخلصوا
يلِّي انتو بلوه معتقاه
ولا حاجه فيكوا محوَاه

طب عندي فكره كويسه
ونصيحه لانج ومخلصه
من غير زعل ولا نرفزه
ولا سفسطه ولا فلسفه
ما تجربوا حكم النساء
يمكن يحلُّوا المشنقه
يبقى عليكموا الهـوه
واحنا علينا المأمـأه
ونموت سوام الهـأهـأه
في حفره ضلمه مخندقه
ونقول لهم خلويص.. خلاص
خلصت بقي

«ولاد ال.....»

يعدي الليل وانا صاحي
لساعه الفجر صبّاحي
أحلف دمعتي لتنام
تبات سهرانه فوق رمشي
ورمش العين ما بربشي
أقوله ينام ما بينمشي
أقوله اسكت ما يسكتشي
وقال لي الدنيا دواره
سفينه قلوها غداره
ماهيش عطفه في جوف حاره
ولا عصفوره نقاره
ولا صياد رمى همومه
ما بين شطين
وقال رزقي ما بين شبكه وسناره

دي دنيا واقفه بخساره
عمود النور مالوش طاره
ولا لمبسه ولا بشاره
وعالم تحت باط أسى
لاهم أسى ولا حاجه
عروق الأرض محتاجه
لايد ترفع معاولها
تهد الضلمه فوق ليلها
على راس الخسيس تنزل
تهز الكون ويتزلزل
تشق الأرض بكفوفها
تحرر بالنهار خوفها
يا خوفي لا النهار يجي
يموت ضيئه على أيدي
وآه تحرق بتنهيدي
ملاح فاجر مش طالع

لا أنا شـايف ولا سامع
 ولا نازل ولا صالـع
 قـريت الكف والضالع
 لقـيت ف القلب ميت شارع
 بلا عناوين أخرهم سد
 بيوت مهـجوره عـريانه
 وبتأفأف ف عز البـرد
 تقول الأه صـداها يهـز وجدانك
 ده بحرر الظلم لوطالك
 ما يعرف غير قانون المد
 ولا فيش حد قال للحدع المكتوب
 مـشسينا السكه بالمقلوب
 طرح ف الشـبـر ميت أيوب
 وناعسه غيرت سيرها
 ولاحتـبيع ضفـايرها
 لعـيل كان ضرير الشوف

وفيك يادنيا ياما نشوف
سباعك مرعوبين م الخوف
وع السكه ضيق مرصوف
بدمعه وآه وتنهيده
قمر مصلوب على الحيطه
وشمس بتيجى وتروح
وانا مــــاشى وبطرح
شمال ويمين حلفت يامين
ما أنا مسلم على ظالمين
سلام يا صاحبي لو بالجور
سلام بالعافيه أو بالزور
طريق ضلمه وخلايق عور
مقام عبرى وله طرطور
كلام عربى ومش مفهوم
كراسى وصف ناس بالدور
شعوب ضايعه وميزان مكسور

ماتفهم يلى مش فـاهم
 وتعلم يلى مش عـالم
 وتنطق يلى ما بتـقول
 شروـقك لازمـه قلب جـسور
 وابوك الحـاج كان بيـقول
 عشـان تـفضل ياواد راجـل
 تعمـيش راجـل تموت راجـل
 حـذار من شـهاده الزور
 تراب أرضـك ده كـيف عـرضـك
 حـذار تبـيع ياواد أوعـى
 لاعـشت ف يوم ولا توعـى
 وتـستاهل ف ساقـيه تدور
 ومات محـسور على كـتفى
 حـضنت كـفوفـه بين كـفى
 ورأسـه بين ضـلوع صـدرى
 أنا فـاكـر ومـش ناسـى

"طظفيتو"

برمجونا احنا واللى خلفونا

قولنا أوكيه ونوت بريلم

ماشى حاضر

دوخونا يالمونه ع المجلس والمحاكم والمحاضر

قلنا ماشى ونوت بريلم

عملوا خطه جهنميه

ولبسونا السلطانيه

والعصابه المفتريه

رفعونا بالمدافع والخناجر

جرفوا معنى العروبه

من قلوبنا ودبحوا فينا الخناجر

قلنا نسكت نوت بريلم

بس زادوا الطينه بله

قلنا كلا وألف كلا

رحنا نعمل تكوى يمكن
يرفعوا عنا المخاطر
قالوا لما تشوف ودانك
إبقى قابلنى يا شاطر
والوسيط أصبح موالى
وف إديه مروط لجامى
قال كده حتز علوه
واحنا مش ناقصين ياهوه
وخلوا بالكوا معانا فيتو
وحق فيتو مستحيل
حيسبكوا مره تبهدلوه
وأعلا ماف خيلكوا اركبوه
قلنا نركب نوت بريلم
بس نعرف حاجه واحده
فيتو مين ده
ومين ده فيتو

اللى ظابط نفسه على حق الغلابه

فين ياناس المدعو فيتو

اللى سايب حقه فى إدين الديابه

نفسى أعرف مين ده فيتو

اللى خلا الظلم يعلا

والحقوق صبحت ففيتو

ليه يافيتو يابن فيتو

مش خلاص كنا اتنفقنا

إنت ليهم وإحنا ليتوا

ولا يعنى خلاص نسيبتوا

يعنى أروح السيده وادعى عليكموا

اللى فينا يجى فيتو

وربنا يستر علينا

وعمره ما حيستر علينا

انتوا يعنى خلاص كبرتوا وافتريتوا

كل مره تقولوا فيتو

فيتو فيتو

ظظ فيتو

يايا هوذا إنت والدرع اللى حامى

يابن مارشيل باصدغ يابن الحرامى

إنت عامل فيها راجل

الرجوله مش خيانه

مش مغالطه ومش نداله

الرجوله فى اواقف

ف احترامك للمبادئ والعداله

والعداله ف إيد شعوبها

والشعوب قد التحدى

واللى واخدع الكرامه

مستحيل يقدر يوطى

هيه كلمه واسمعوها

بلوا فيتوا واشربوه

ان شالله حتى تخللوه

ملعون جنابك على جنابه
ع اللى أصلا ألفوه
وانتوا يا عالم صدقوا وامنوا ياهوه
ديل الكلاب عمره ف يوم ماحينعدل
لو فوق قوالب علقوه.
ضحكوا علينا بالسلام
وسلاح جبان بيعمروه
عايزين ترابنا يهودوه
والدم يبقى للركب ويحللوه
• ده فصيلته إيه ده فصيلته نو
ده فصيلته عربى احرقوه
اصحوا يا أهل الكهف قوموا
وصحصحوا بقى وافهمونى وافهموه
يوه..... وحدوووه...

قوم يا ولدي

قوم يا ولدي
خطي فوق النور وعدي
جوه منك نار وثوره
صوت إرادته أمه حره
صوت ترابك بيناديلك
شق عتمة ظلم ليلك
خلي صوت الحق يعلا
شد طرف النور يجيلك
قوم وعدي بس حاسب
فجر كاذب بيناديلك
لأجل ما يغرق قلو عك
لأجل ما يحدد مصيرك
لو حتسجن حلم عمرك
بين سكوتك أو ضلوعك

مش حتاخذ من ركوعك
إلاّ ذلك أو خضوعك
جوه منك ألف مادنه
والأدان أهو آن أو انه
فين إراداه شعب ناضل
لأجل ما يحقق كيانه
جوه منك ألف طاقه
راح تقول سمعاً وطاعه
لو تأدي الفرض حاضر
والصلاه أفضل جماعه
بس حرس.. خلي بالك
ميت شيطان واقفين قبالك
والقرار مابقاش قرارك
والديابه ف عقر دارك
لو تسلم مش حتسلم
راح تموت لو يوم حتسلم

لو تغير لون ملامحك
أو تسلم لحظه رمحك
قلبي مش ممكن يسامحك
قوم يا ولدي
لو حتدي الشمس ضهرك
مش حتلقى إلا ضلك
جوه سجن الخوف وقهرك
مين ساعتها حيحمي ضهرك
مين يدلك؟
والطريق مابقاش طريقنا
والضياع والخوف سابقنا
والخطاوي مسلسله برغيف خائقنا
بس لسه النبض ساري
جوه شريان الحقيقه
صوت بيصرخ جوه منك

لسه فيه مليون طريقه
قوم وقول الحق مره
إنت ماشبعتش مذكه
إنت ماشبعتش نواح
ولا دمك صام وصلّى
ع المهانه وع الجراح
قوم وشارك بالتحدي
علي صوتك مره ثور
قول لكل الدنيا ديه
يا ضمير الإنسانية
لما قاضي يمد إيدّه
الشهاد بتبقى زور
والحقايق تبقى ضايعه
والعداله ف أرض بور
يا ضمير الإنسانية

لقينا أوراق الرصيه
واللي بابعين القضيه
زوروا بصمه جدودنا
لأجل ما تدور الكراسي الموسيقيه
غيروا تضاريس حدودنا
قوم وقول الحق عربي
خلي كل الدنيا تقرا
فوق جبينك اسم عربي
قول صلاح الدين ده كان
فارس أصيل جاب حق عربي
واللي قال لسنا عبيدا
برضه كان فلاح وعربي
واللي قام بالثوره كان
اسمه جمال عربي ابن عربي
واللي نادي بالسلام

واللي عدى للقنال
والشهيد كان دمه عربي
واللي واقف ع التماس
واللي قدّم التماس
واللي وطى لأجل ماييوس المداس
كان ندل عربي خط فوق جدران سكوتاك
مش حبيع
وبخط عربي
ده التاريخ والأصل عربي
والمصير والحق عربي
والكتاب ورسولنا عربي
والتراب في القدس عربي
بيناديننا بحس عربي
قوم يا ولدي

دعوه العبد اللئيم

عايزين نبْلِّغ يا ابراهيم
أهل الحضر والفلاحين
قبل ما ندخل سين وجيم
وربنا هو المعين
على كل ظالم يا ابراهيم
واستغفر الله لعظيم!!
حنروح جهنم أجمعين
لو قلنا للظالم آمين
راح يجي شيطانه الرجيم
ينفخ سمومه في العجين
والعيش يخمر يا ابراهيم
على لفحه النار والهجين
من غير قانون ولا يحزنون

حيوضبوا طلب الزبون
كده كل شيء ممكن يهون
لأجل الديابه الصعرانين
وأستغفر الله العظيم!!
أرجوك تفهم يا ابراهيم
كل اللي قاعدين سامعين
ما بلاها من مال اللئيم
ده القمح من إيد العويل
كبر ولادك مذلولين
شابوا العيال قبل الأوان
ولاديك بيدن في الأدان
بقى ديك متنح يا ابراهيم
والخلق ماشيين مسطولين
استغفر الله العظيم!!
أراجوز وديب مع أولعبان

صر صار ضعيف طب الميزان
واتوزع الورث اللي كان
مافضلش غير فتافيت كلام
الله يجازي البياعين
والساكتين الصامتين
واللي اشترى ومالهش دين
دي الكحكه ف إدين اليتيم
صبحت عجائب يا ابراهيم
استغفر الله اعظيم!!
وواخدلي بالك يا ابراهيم
أنا أصلي بفهم مش غشيم
حركات عصابه مُدربين
وأونطه والله العظيم
مين اللي يكشف ستر مين
الله أعلم يا ابراهيم

قالوا الفدا إرهاب جبان
ممنوع دفاع ممنوع كلام
والعيب ده فينا أجمعين
لما حلمنا مفتحين
بسلام حمام وهباب وطين
والقدس ضاعت من سنين
من إيد عيال مش فهمانين
واستغفر الله العظيم!!
نصبوا الكماين ف الميدان
السبع نام البغل قام
والحر دايرع البيان
بيمد إيده لجربانين
ويقول عشمنا ف الكريم
ماتقوللي حاجه يا ابراهيم!!
بتقوللي إيه؟

استغفر الله العظيم!!!

استغفر الله العظيم

بسمل وحوقل يا ابراهيم

يجعل نهارهم زفت طين

ويصحّي كل الغفلانين

الحاكمين والمحكومين

واكتب ف كراسي القديم

الفجر بان وملا المكان

ولا عاد لظالم فيه مكان

على أرض أولاد اسماعيل

والفضل طبعاً يا ابراهيم

في دعوه العيد اللثيم

استغفر الله لعظيم!!!

عمى البصائر

رب العباد لو غضب
 على أمه يعميها
 ويحكم اللي ظلم
 علي انظلم فيها
 وعمى البصائر بلا
 لو نبـتلى بيـها
 يجعل كبيرهم صنم
 يرعى مواشيها
 ينزل بحور العطش
 علشان ما يسقيها
 تشرب ولا ترتوي
 ولا تحوأ بحور فيها
 وتموت بضـي القـمـر

والعتمه تحيها
يارب عندي أمل
تكشف بلاويها
لأجل الحبيب النبي
تهدي خطاهها
وتحكم اللي اظلم
عللي ظلم فيها

كيد النساء

قال الرجال إن النساء
 مالهـمش في الوزارات
 ونهار أبونا مسـا
 لو حكّموا الستات
 ف وزاره التـمـوين
 والإقتصاد بالذات
 حضـيع فلوس البلد
 ف اللبس والبوتيكات
 بالذمه ده اسمه كلام
 يبقـى وزيرنا مـدام
 واسم البعـيد فتكات
 يخـتي عليه لو مشي
 يدخل مجالس إيشي

لابس قميص شفتشي
من كلمه واحده يختشي
وينزل صوت وعياط
يا أهل السلام والأدب
إقروا التاريخ اللي انكتب
فوق الطريق علامات
كليوباترا حكمت بلد
بالخيل ويا الجلد
من غير لاخذ ولاهات
وكيد النساء موصوف
عند الطبيب معروف
يخلوا سبع خروف
وتبان لهم كرامات
وكم من وزير كان قفا
جه ف الطريق واختفى

ولَهْفُ مَعَاهِ أَلُوفَاتِ
قُصْرُ الْكَلَامِ يَنْقَالِ
مِنْ فِيهِمُ الْيُفَيْدِ
مَشْ مَسْأَلُهُ عَضَلَاتِ
وَسَاعَاتِ كَتِيرَاتِ
بِيَكُونُوا رَجَالَهُ
وَرَجَالِ بَطِيعِ النِّسَا
وَطَالِعِ لَهُمُ شَنِيبَاتِ

الديموقراطية

سألت جارتنا أم بهيه
جوزها العامل في البلديه
ما تقوللي يالفندي يا جوزي
معنى الكلام الأرجوزي
اللي قالوه في التلّـزّيون
كلام يا خويا مالـهش لزوم
ديمقراطيه دور مقطيه
كلمه ماتيجي في يوم على بال
واحلف دي شتمه يا عبدالعال
قام قاله السيد جوزها
وهيه بـتمـط ف بوزها
ما تبطلوا جهل يا جدعان
ديمقراطيه يا بهيه

ما تفهمي بقى يا وليه
 ديمقراطيه ديمقراطي
 خاصمي الكباب عند الحاتي
 واتعشى على كيلو حراتي
 وأنا أبوس في قرطاس طعميه
 ديمقراطيه ومثريه
 في صحف جرايد مطويه
 بتقول نعم بكره وعده
 ولحد ألفين سنه جايه
 ديمقراطيه يا بهبه!!
 ما تفهمي بقى يا وليه
 ديمقراطيه اتكلم نول
 حتموت جبان وتعيش ضرطور
 بس المهم تكون راضي
 أنا أصلي جحش ديمقراطي

بنحت في صخر ومش فاضي
أعدل دراعي الملويه
ديمقراطيه دي لعبتنا
عملوها جدعان حتتنا
عشان ما تحلّو صورتنا
ويصدقوا إن عشتنا
عايه ف بحور العسلية
ديمقراطيه ندلعها
وساعات كتير نلوي دراعها
واللي ياكلها حبلعها
وأنا مستعد أرجعها
بس اشترى يوم عتقيه
ديمقراطيه يا بهيه
ما تفهمي بقى يا وليه
ديمقراطيه ديمقراط

وكلام كثير وبقى مرطرط
 والكل مبسوط ومزقطط
 بلبطوطه النني منقط
 من كدبه بقي ماشي يسقط
 على باب حارتنا المنسيه
 قوم عللي صوتك وازعق قول
 تحيا البقول ويعيش الفول
 رزق المدهول ع المسطول
 والعيشه حلوه مسليه
 ديمقراطيه ومش هيه
 بس الشبه عشرد لميه
 تسعه عشان العالميه
 وواحد لمون بالملوخيه
 ما تسكتي بقي يا وليه
 ف داهيه روحي انتي وهيه

دي عشان تفوت الدوريه
يموت غفير عشرين ميه
وأعيش خروف من غير ليه
وأموت قتيل ولا ليش ديه
وتعيش جناب الدي..
مو.. لو.. خيه

برقصه... بحبك

شمستنا شمس الشموسه
 طلعت ف مصر لمحروسه
 حذفت لها مليون بوسه
 وقالت لها برضه بحبك
 والذنب عمره ما كان ذنبك
 وحيعيش أسير وأفضل جنبك
 يا أغلى من روعي عليه
 بحب أرضك وسماكي
 ع الحلوه والمره معاكي
 بعشق أذانك وصلاكي
 واللّمه ساعه العصريه
 بيعد وبفرح بلقاكي
 مهما الزمان يوم قساكي
 وحياه عيونك وصباكي
 ما تهوني ولا مره عليه

وحياه غلاوتك وجمالك
من يومي عاشق موالك
وحفظت رنه خلخالك
تمخطري ع الزراعيه
عاشق دلالك والحفه
من يوم ما كنت أنا ف اللفه
كان الطهور وكانت زفه
شـبـكتي إيدك ف إديه
ومشينا سكه وبنصوره
ولقيت حبيتي بقت صوره
من بين دواير محصوره
دقت قلوبنا المأسوره
مسجوننه فيا اخنيه
ياممه اندهي يوم وناديلي
صورتك على حروف مناديلي
قومي امسحي دمع عينه
غزلت شالك على نولي

حبات عرق ءفصوص لولي
 إيه اللي فاضل ما تقولي
 علشان ف يوم ترغى عليه
 إحنا الولاد هنا حراسك
 حافظين ملامح أوصافك
 بنبوس على إديكي وراسك
 تمدي شطك نلميه
 حقدر وبيكي ءكون فارس
 لا بالكلام ولا بتجالس
 ولا بالسلام ولا بمدارس
 بإدين ولادك يا صبيه
 راح تنقشي كحك عيادك
 وحترجعي يوم ف معادك
 ونغني ليله الصباحيه
 قولي للعروبه إنك باقيه
 وبهمتك دايره الساقيه
 لا نتن ياهوه يوم حيفيدكم

ولا كاني حيعمر بيتكم
ولا شيء يرجع كرامتكم
إلا الإرادة العربيه
ولا تسندي على غير زندي
ولا طرطني يوم بلاوندي
خليكي جنبي وحنعدي
كل الدروب الملويه
دي رموش عيوننا سهام فضي
قومي سمّي يأمّه قوام خطّي
الأولى من عين الحاسدين
والثانيه من حبه ملاعين
والثله تـولـولوا يارب آمين
ترجع بلادنا المحروسه
في حضن شمس الشموسه
تحذف لها مليون بوسه
وتقولها برضه بحبك

بحب إيه؟

بحب شكل الـهـرم
 ساعه الغروب والنيل
 وبحب كلمه وطن
 وأعشق سكون الليل
 وأحب لحن لوتر
 وبحب أشـوف المطر
 حبباته ع الأوراق
 تغسل هموم الشجر
 تتمايل الأغصان
 ما بين بعاد وفراق
 وبحب إيه؟ بحب إيه؟
 بحب صوت القلم
 فسوق الورق والقلق
 لما يكون سهـران
 وأحب شكل العلم

لما يكون مـرفـسـوع
وأحب مـعـنى الكلام
لما يكون مـسـمـوع
وبحب فول الجـحـش
والفن والكـوز
وأموت في أكله سمك
من عند قـدـوره
وأحب ريحه الشاي
والقهوه في الفـنـجان
وأحب صوت رفعت
في تلاوه القـرآن
وأحب صـوت الآدان
ساعه فطور رمضان
وبحب إيه؟ بحب إيه؟
بحب صـوت المكن
والسـاقـيـه لما تدور
وأحب صوت مسعده

وأعشق غُنى العصفور
 وبحب صوت الناي
 والطبله والمزامير
 وأعشق أغاني زمان
 والعزبي ف المواويل
 وبموت ف غنوه نار
 لما يقولها حلیم
 وبحب مـولد النبي
 والسـيده زينب
 وأعشق جمال النبي
 والمـدح ف المـوال
 وأحب ليله العـيد
 والحنه والزغـاريد
 وسبوع جديد لوليد
 والدق ف الغـربال
 واسمع كلام أمك
 وأبوك كـمان غلبان

وإياك تخاف عمرك
عمرك يا واد قدام
وبحب إيه؟ بحب إيه؟
بحب صوت العرب
وجريدها لأخسبار
وبحب شععر نزار
وبحب كلمه ولد
وشهامة ابن البلد
والشعب والثوار
ومن الرسائل طه
وسوره الرحمن
وبحب مين؟ بحب مين؟
بحب جوزي قسوي
وبحب لبنني قسوي
وبحب هاني قسوي
أصله ولد حساس

ينفع يكون شاعر
 بملا الوجود إحساس
 وبحب ساره قـوي
 ودي آخر العنقود
 بسمعتها لما تقول
 سورة الضحى والعلق
 بكلام ومش مفهوم
 بموت ف برّي القلم
 واسألها كلمه علم
 أولها إيه؟ جاوبي
 تقول يا مامي علم
 أولها شين أو نون
 وبحب شكل الندى
 ساعه شروق الفجر
 وبحب كلمه أمل
 وموت في معنى العدل

وبحب فيلم الأرض
وبحب أشوف وروده
وأحب لحظه برق
ف ليله شتتا بارده
ومن الجهات الشرق
ومن القصص عتتر
وبحب كمنه حق
والهمه والإخلاص
وبحب كل البشر
وبموت ف كل الناس
وبحب بلدي قسوي
وبخاف عليها قوي
وبحب ناسها قوي
وبخاف عليهم قوي
وبحبكم قوي قوي قوي

كليت ودمنة

سلام كبري قوي للأسد
سبع السباع المفترس
لم الصغار وياً الكبار
وعمل وليمه إعتذار
لوزيره تعلوب الشرس
ضرب الجرس وقفوا الحرس
رافعين أيديهم بالولاء
آخر غباء آخر قرف
لطفك يارب إن كان فيه لطف
على المعيز ولا الغنم
ملعون أبوكم يا غجر
ما هي المداود لما تفضي من العلف
يحتلها شر البقر

كل الأرانب بئمت

لكن فيه نعبه اتكلمت

قالت حرام

تعلوب ده طول عمره جدع

شفنا على إديه البدع

وأنا صاحبه دائماً من زمان

بس الخروف كان مش تمام

مehزوز وخايف م الكلام

قام الأسد قال كلمته

وحلف بدينه وذمته

اللي يزعل تاني تعلب من التعالب

يبقى ناوي على قضااه وأذيته

جربوا الجاموس ويا البقر

باسوا جزمته

واستحلفوه بامه وابوه

إن الخروف ندمان وحس بغلظته

هز الأسد ديله وقال

كل شيء يا جماعه يجي بالحوار

فاهمين كلامي ده مش هزار

يلا ابصموا بسرعه قوام

وامضولي على هذا القرار

وطبيعي أول من بصم

كان الخ—....ر

أنا مين؟

أنا اللي ماشي وبتأخر
لغيري لأجل ما يعدي
وكنت بواسي ناس ناسي
ودمعي يخط فوق خدي
لقت الدنيا نسياني
وماشيه جنبي بتعدي
ويوم ما قلت يا دنيا
هتيلي توب أمل وردي
جابت لي دمع مضر
وتوب أحزان على قدي

رسالة بالإنابة عن إسماعيل ياسين

رسالة للرئيس صدام قبل حرب العراق

فتشني فتش يامعلم
وإن قلت لأبقى إتكلم
وحياه أبوك كنت بهزر
كان قصدي بس اعمل منظر
واديني جايلك وبسلم
فتشني فتش يامعلم
أنا اسمي بلولم يامعلم
ووشي كركم وعيلم
لاعمرى حنطق واتكلم
ولا حشكي ولا حتألم
أدبني لومحتاج تأديب
وضبني لومحتاج توضيب
وامسك رقبتى واوعى تسيب
وارميني لقمه ف بق الديب

كتفنى لو محتاج تكتيف
وافرمنى كفته أو بلوبيف
واعملنى حشوف نص رغيف
وإن قلت لأبقى اتكلم
خذ أرضى عرضى وأموالى
واخنق واقتل ف عيالى
وادبح نشيدى وموالى
فتش وخذ كل مالىه
حتى القميص اللى عليه
سجاده أبويا المنسيه
ودعوة أمة الفجرية
وخذ كمان منى هديه
غيارات أخويا الداخليه
إخيه على شويه طراير
وشعوب جبانه ما فيها كبير
وإنسانيه مالىها ضمير
وعيال بتكبر تتسمم

من قدوه خيبه بتتعلم
 أنا نفسي أقول آخر مره
 كلمايه نونو ظغنه
 إزاي وفين هره وصنا
 نسيوه وغنوا كمننا
 والحلم فينا بيتألم
 خليه يفتش يا صدام
 وبلاش ملاوعه و كتر كلام
 حيعملوك لا مؤاخذه مدام
 حكمه وقالوها ناس جدعان
 بتربي أجيال وتعلم!!
 والدور حييجي وعى غيرك
 ومصيره راح يبقى مصيرك
 أبو مين يابويا اللي يعينك
 إرفع إديك وقوام سلم
 جايلك ياواد ملك الغابه
 صحبه عصابه مع دياهه

وهرکلیز علی دبابه
والکل واقف ومبلم
وسلام کبری للورد شارون
وبیریز ویشع وابو شمعون
وانا وانت لاه مالینا لزوم
ناس فریجیه هفا بردون
وسلام کبیر قوی یامعلم
فتشنی فنش یامعلم
فتشنی فتش یامعلم
فیشنی فیش یامعلم
لامؤاخذه مش عارف اتکلم
من خوفی جایلك وبسلم
وسلام کبیر قوی یامعلم

كوكو..كوكو

زقزق وكيكى ويَّاكوكو
 ضحكوا عليكوا وشبكوكوا
 سابوا الديابه ينهشوكوا
 وقفوا على كل البيان
 حاصروا الأماكن رفعوكوا
 حرص ياودا منك لها
 وحياه أبو كو
 والديك بيدن كوكو كوكو..
 إن قتلوا ممة يأكلوكوا
 وإن قتلوا قمح يسلفوكوا
 جم كبروكوا وشبعوكوا
 وإن قتلوا لأن حيفرموكوا
 ويعجنوكوا ويذبحوكوا
 والديك بيدن كوكو.. كوكو
 قوموا انطلقوا لافض فوكوا

زقزق ده راجل مفتري
حتى اسألوا أجداد جدودكوا يفكروكوا
وكيكي ده واحد منهم
طول عمره واقف جنبهم
بيفكروا إزاي في لحظه يفرقوكوا
لكن ده كوكو مننا
عارف طباعنا وشرعنا
يامين يقولوا ياعمنا
روح قولهم ملعون أبو كوا
والديك بيدن كوكو - كوكو
زقزق إلهي يريحه
وكيكي إلهي يفسحه
وكوكو مين حيفهمه
إن المشاكل عندنا
لها ألف حل
يحل وسط اللى أذكوكوا وغرقوكوا
إفهم كلامي ياجدع

لو تفهموا معناة كلامي حشكروكوا

وإن قلتوا لأه والغبا

عشش على صوت لندا

يبقى اعذروني إن يوم صرخت

وقلت ميت معون أبوهم

على أبويا على..... ...

والديك بيدن كوكو.. كوكو

يا عم جمال

قبل الزمان بزمان
كاتب عليك يازمان
بآهات دموع عيني
جمع آهات الألم
وكتب على جبیني
مكتوب عليه الشقي
والآه في تكويني
وانزل بحور العطش
بالدمع ترويني
واستنى يوم اللقاء
والفرقه تكويني
سوق المحبه جبر
والناس قلوبها حجر
طب مين يداؤيني
يادنيا عندي أمل

تشفى جراح الألم
وياريت تصالحيني
ياما يادنيا بكيت
على الجرح لما بقيت
الجرح أنا ذاته
وصبرت ع المكتوب
صبر النبي أيوب
وصاحبت آهاته
ياعم ياجمال
شايلى همومى جبال
والصبر فاض بيه
وبقيت أنا موال
ف عروق نغم رحال
ما لقيت دوا ليه
حكمت عليه كثير
التوهه والمشاور
وقلوب ما ترحمش

وبقيت أنا عصفور
بجناح لكن مكسور
عصفور ما بيطرشى
دمع القلوب جراح
وغلبت اداوى جراح
والجرح جوابا
والليل مالهشى عيون
وازاي عليكى بهون
ضمينى يا أمايه
رسمك على الكفين
والعمر اجيبه منين
لو يوم يضيع منى
مهرك بحور من نور
وحجيب قمر مسحور
وما تبعديش عنى
حالف بألف يامين
ما اسند ف يوم ولا أميل

على زند غير زندی

بكره الزمان حیدور

بیدر تقاوی النور

ونعیش أنا وانتی

بحبك يا بلدى

بحبك يا بلدى
وحفضل أحبك
لآخر الزمان
بحبك فى ليلك
ولون سلسيلك
يصحى قلوبنا
ف ساعه الآدان
بحبك غناوى
حكاوى وتقاوى
مع الفجر تطرح
زهور الكلام
بحبك أبیه
مكابره وعفيه
بحبك حماس
بحبك تلاقى

تدور السواقى
تعلّى ف لحظه
شروقى الأساس
بحبك عروسه
حلاوه وحصان
وسبحه وطاقيه
ورичه غيطان
بحبك بدايه
ومن غير نهايه
وراحه وسماحه
وزهرة ريحان
بحبك ملامح
طيا به وتسامح
عيون سمر تضوى
وترمى السلام
بحبك مداين
وعصفور جناين

يلقط حبوبه
ويرمى المحبه
ف حزن الزمان
بحبك وشايفك
بضحكة شفايفك
ورعشة إيديكى
بتمسح دموعى
تداوى الآلام
بحبك ف فرحك
وساعة المضايق
ببال حلو رايق
يساعينى قلبك
ويدفى المكان
شبابك معافى
ونيلك موافى
بيروى جذورك
تزهر عيدان

سنابل وجنه
 بلح تمر حنه
 يحنى كفوفك
 ويحيى اللى كان
 بحبك خمائل
 واحبك ورود
 واحبك نسائم
 واحبك بارود
 بحب ابتسامتك
 ولون الربيع
 ف حكمه مشايخ
 وصرخه رضيع
 وقلبي شاريكى
 ورافض يبيع
 بحبك ومهما
 حشوف من صدود
 ح اعدى المفارق
 واعدى الحدود
 وانا من جوه حضنك

يصحيني بدرك
أبوسك واشمك
واضمك لصدري
وأقول عشت فيكي
وتهت ف عنيكى
ودقتك حلاوه
ودقتك مرار
وطرت بجناحي
عل رمش صاحي
طويت المداين
لآخر الأوان
أنا الحر دايمًا
لقيتني أسيرك
ياساكنه ف دمايا
يافرحى وشقايا
ياصرخه فى حشايا
بتجرى ف عروقى
ياضى النهار



الشهاد

أشهد إنى مواطن مصرى
وأشهد إنى حقوق الحق
عمرى ماكنت عبيط متغابى
ولا خدعونى بكلمه لأ
عشت الحرب وتهت فى سلم
وشفت الحلم وهو بشاير
فرحه بتكبر حلّة ضفاير
فوق الأرض بتبدر فرحه
كنت عروسه وشفت الفارس
روحه المهر وعمره الطرحه
فجأه لقيت الحلم بيصغر
بقى فتفوته وقد النمله
شفت عذاب وألام خضرع
عشت كرامه وشفت دموع
شفت عزيمه شعب

اتحرر من أو هامه
عشت إرادته شعب
إتبرأ من حكاه
وعرف إن الحاكم عمره
ما يقدر وحده يرد كيانه
حط الإيد في الإيد واتعلم
من أفراحه ومن أحزانه
وحلف ألف يمين بكتابه
إنه يرجع طهر ترابه
بقى من كفه بي طرح ميه
دم عروقه بينزف دسته
وقفوا الصف قصاد الصف
يرجعوا عزه أمه وجيل
كان مشوارهم صعب طويل
واشهد إنى حقول الحق
وتشهد كل الدنيا عليه
أوعى تصدق انت وهو وهو وهيه

نصر اکتوبر عمره ماکان
ضربات جویه
ولا بحریه ولا حریه
ولا بمدافع ولا ببارود
نصر اکتوبر کان یاراده
أمه وجیل
جندی موطن مصری أصیل
خاف الحلم ف لحظه یضیع
صمم.. حارب.. دافع.. حرر
عمره ما فکر مره یبیع
کانت خطوه علشان
أجبال غیرنا تعیش
خط الخطوه وضاع بعدیها
وعشتوا وعشنا علی أمجاده
عشرین سنه عایشینها عواله
شوف دلوقتی ایه اللى بیجرى
علشان فرد حمامه یاصاحبی

بيضيع منا وف يوم واحد
مليون راجل م الرجاله
واشهد إني حقول الحق
كان أكتوبر نصر لجيل
وهزيمه لأجيال بعده
واشهد إني مواطن مصرى
صبحت محاصر
بتباع بره فى سوق العمله
بنصر رغيف
غيروا شكل ملامح نفسى
بشكل مخيف
لكن صوت جوايا بيصرخ
لازم أقاوم
لازم أعيش
علشان مصر بلدنا تعيش
علشان إبنك وبتك وابنى
شمر فكر وازرع وابنى

أوعى تفكر ان سكوتك

بقى مقبول

معنى سكوتك إنك خايف

او مش شايف وش الغول

ناقش حاور إنضق قول

قول لمبارك

شعب بيقولك يامبارك

كنت شجاع فى الحرب جسور

جيت فى الضلمه وكنت النور

قول للظالم مليون لآه

وكمل نصرك

واوعى جبان باللقمه يحاصرک

وصل دمی بنبض نهارك

علشان تفضل رمز لآمه

عفيه أبيه

عارفه الظالم م المظلوم

قول يامبارك ألفين لآه

واحنا وراك تمانين مليون
ناكل طقه ونجوع طقه
بس تقول للظالم لأه
مش علشانى ولا علشانك
علشان جيل حيموت م الخنقه
إيدى فى إيدك نصبح قوه
صوتى وصوتك تعلا الهمة
قصر القول.. اصرخ قول
اللى اتاخذ يوم بالقوه
لازم يرجع يوم بالقوه
عمر الضعف ما حرر أمه
عمر الضعف ما حرر أمه

موال مصر

الأوله يامصر انا ليكى
والثانيه بالروح وبعمري حنديكى
والثالثه على اللي اعتدى ودنس أراضيكى
الأوله بارود يحمى أمان دارك
والثانيه حنعود بالنصر علشانك
والثالثه كلنا يا حلوه خدامك
الأوله دمعتي سالت فى موالك
والثانيه ضحكتي نجمه تزين شالك
والثالثه عزوتي ف الشده إيمانك
الأوله بلدى
والثانيه أرضى
والثالثه ولدى ضابط إيقاع خطوته
على رن خلخالك

حروف اسمك

يا لابس توب ما هوش توبك
وماضى باسم غير اسمك
لا كان توب الهوان توبك
ولا اسم الجبان اسمك
مصاحب ندل مش توبك
ولا وقمك ولا أصلك
ف ساعه الفرح محسوبك
ووقت الشده ما يقاسمك
وايه م الندل حينوبك
بتوصله ف حبال وصلك
مسير التوهه مكتوبك
جذوره تمد وتحاصرك
ما بين أمشير وبين طوبه
تضيع آخر حروف اسمك
يا لابس توب ما هوش توبك
وماضى باسم غير اسمك

المغنواتسى

مغنواتى أنا
والمغنى راس مالى
تاھت حروف سكتى
ولاجاش على بالى
تنشف دموع غنوتى
على خد موالى
رحت لزمانى اھتكى
قال لى وأنا مالى
اشرب آھات الندم
وفوتنى أنا ف حالى
إن قلت آھ يازمن
راح ييكى موالى
ويحن قلب الحجر
ويقول لى عيد تانى
يا مغنواتى قول

دندن على عودك
دمع الحنين جراح
علم على خدودك
والدنيا وعد وكاس
داير ما بين الناس
وطاوعها يابن الناس
اشربها كاس ورا كاس
وعدك ومكتوبك
تعبان يازمانى وآه يانى
على بختى وحظى اللى رمانى
على خلق بتجرح ماتداوى
ولا حاسه بنارى ولا همومى

ظلمونى حبايى اللى فاتونى
تاهو ف الزحمه ونسيونى
وف يوم الحزن افتكرونى
تواسيهم بالدمع عيونى

وعذابي منابى من اصحابى
جم خلصوا تمرى وعنابى
واديتهم م الفرح منابى
جابوا مر الصبار وستونى

وكمآن يازمانى وهات تانى
ليه بس يادنيا معندانى
اكنى ساكت لك ظلمانى
لو حاجه ف قلبك ماتقولى

دورى لفى وميلى كمان دورى
لفت الأيام واهو جه دورى
ودافع لك حقك بالفورى
بمقدم من دمع عيونى

عايز يازمان بقى إيه تانى
بعث الأحلام لك بجانى

لا طالبت بكنی ولا بمانی
ولا عدش فاضل لی إلا هدومی

و خلاص یاناس فین ده خلاصی
ده الدمع صبیته ف کاسی
وغریب مابین أهلی وناسی
اتفقوا علیه وظلمونی

والتوبه النوبه النبی توبه
صالحینی یادنیا ولو نوبه
دی ایام بتعدی ومحسوبه
وقفت بخساره وخدعونی

وغزلت شالك على نولی
حبات عرق وفصوص لولی
وبعت أشواقی رسولی

إيه اللي فاضل ماتقولي

جرحي ودمعي ف كراسك
حافظين ملامح أوصافك
وبوس على اديكي وراسك
لوفيه فرح تبعتهولي

لا لا لأه يا حزن ابعده عني
لو عايز صبر خلص مني
واشمعني أنا اللي إنت فاكرني
دي الناس بحالها بينسوني

وصفولي عراف يقرأ لي
بختي ويفتح فنجاني
لقى خط أحزان طوالي
والتوهه وعدى ومقسومي

مجروح وجرحى ف موالى
والحزن مخلوق علشانى
فاتح للدمع حسابى جارى
على إيه يازمان حيحاسبونى

ده الورد دبلان على عودى
والناى ياعينى خاصم عودى
امتى ياضحكه بقى تعودى
وتخففى عنى حمولى

طول عمرى صابر ع المكتوب
وصبرت صبر النبى أيوب
ورضيت أبات الليل مغلوب
كل الخلايق ظلمونى

بعتب عليك يا زمن خالى
ولا لك حبيب ولا لك غالى

ساكن ف برج بعيد على
وفوتنى لخلق باعونى

فيه حد شاف أحزان قدى
توب الألم كان على قدى
بالدمع مكتوب على خدى
مظلوم يا عالم من يرمى

كثر البكا مأثر فيه
وسنيني ماشيه معديه
راح فين زمان الحنيه
لو ليه مكان أو صفهولى

يا فرحه حنى ويهديكى
راح اتوب واحب على إديك
سابق عليكى النبى تيجى

وأنا أشيل جميعك ف عیونی

اسمی وشکلی وعنوانی

مکتوب فی دفتر أحزانی

انسان بقاسی ووحدانی

ساکن ف شارع ظلمونی

الديك- دا- طور

إهداء

كلمات لأُمِّي الحبيبه
قومي افتحي ياما البيان
الزهر سبَّح والمكان
حامل بشاير طلعتك
نن العيون
سحر ابتسامه قدرتك
حلَّى ضفاير غنوتك
قومي ابدري الأرض بآياتك سبَّحي
يا امو الصبايا والولد
الطهر ف عنيكى اتولد
قلبك دموعه قريبه
سبحانه مين خلق الدفا
جوه ف عنيكى الطيبه
وسبع سنابل طرحهم طُهر وضيا
حاملين شموع الأنبيا
ضحكه عيونهم سوسنه

طرح الجنائين والغنا
قومي افتحي باب السما
واقري ياسين
طه الحبيب نوره انجلي
يضوى الكلام بين شفتيكى البسمله
رقوه وحجاب يحفظ ملامح غنوتك
جوه عيون الضى
بلمح خطوتك
برجين حمام وف سكتك
أسراب يمام بيزوقولك طرحتك
دارت شموस्क والقمر
واقف على الشباك ييشرب زمزمك
ماء المحيا اللى اتعلا من قُلتك
طالعين سلا لم عشقهم
على دقة القلب النبى
خليكى حبه والنبى
لو ميت سنه لو تقدرى
إروى الشراقى وطبطبى
قلبى اللى شاب يرجع صبى

صوتك نغم
ساكن عروق الأرض واصل للسما
باوصيكي ياما تلضمي
حبات نهارك عقد بكري وملحمه
يا غازله من نور الأمل صبر وحكم
يامعلقه كل الصور جوه ف براويز السماح
لو تسمحي
قومي ازرعى شوق السك ضى وبراح
حابى علينا وللمى رعشه ضلوعنا
واحضنى صوت الأدان
جوه ف وريدك وافتحي كل البيان
للمصبح والفجر المباح
قومي صلى بيناع النبى
طه الحبيب المصطفى
راح تتولد كل الحروف المؤمنه
تضوى ف شرايين الصباح
لو تسمحي
قومي افتحي طاقه الأمان

حظى العفش

وقعنى حظى العفش
فى قعده ستاتى
نسوان كماله عدد
وعقلهم فاضى
مغيرين طبعهم
وملونين وشهم
واللحمه من عزهم
بمبه بلون خذهم
عنابى يا اخواتى
عاشين ومش عاشين
وعرايا مش لابسين
وكل شئ عندهم
ماشى وشئ عادى
الره قالوها غين
والنشأه أبصر فين

ولكل واحده جوز
جتل قوی وکلبوظ
بدلّعه دادی
واللی يشوف کدبهم
حیان له من شکلهم
إن البعید جدھم
کان أصله قرداتی
راکین شبح وعیون
ومعلقین محمول
سارحوا وسایین طور
فی البیت قاعد مسطول
ع الحال ده لیلاتی
وعیالهم المساکین
تاهوا مع التابهین
ومدمنین هیروین
نص النهار نایمین
والسهره فی الدفیلیه

والديسكو والنادى
عاملين لى جمعيات
إشى سيدات أعمال
وإشي سيدات رأس مال
وشى إيشى بالمجان
والبلوه فى الآتى
فى كل لحظه تشوف
واحدہ بقوام ملفوف
جره فى ايدها خروف
مجهود لكن ذاتى
بعقول مخاصمه النور
كتبت يُفط بتقول
على وشها الملعون
إحنا فرى وسبور
ونظامنا خواجاتى
توب الحيا متلوع
والقعده ف الممنوع

لو كنت ألقى دموع
لابكى بصوت مستنوع
واختمها بصواتي
يا بؤره المجتمع
إنس وشيطان اجتمع
زيدوا كمان ف الدع
مات فيكوا حس السمع
على ايه بقى نهاتى
بزنس ع المكشوف
ولا عدش فيها كسوف
وتعالى عاين شوف
آه لو أكون مسئول
أو كنت يوم قاضى
لأحكم عليهم أنا
بالسجن خمسين سنه
واللى على ذمته

إعدام عشان حضرته
على خيبته كان ماضى
يا دى المرار والقلق
صوتى يا خلق اتخفق
رجاله صبحت ورق
شباتها ع الفاضى
يا أهل الأصول والقول
اصحوا بقى م النوم
ده الشرع واعمقول
بيزين طباع وعقول
يا خساره يا بلادى
عايزه شويه حمم
علّى ماليهم ذمم
بيلبسونا العمم
ويضللوا ولادى
قادر يزيع همهم

يبعدنا عن شرهم
لاطبعا طبعهم
ولا كنا يوم منهم
دول بلوه ياخواتي
طبع النساء عندنا
بين طاهره أو مؤمنه
عارفين حدود ربنا
تلقى في نور وجهنا
ضى الرضا بادی
يعنى الخلاصه بقول
لو النساء بردون
يفلت عيارها ف يوم
ح تضيع عادات وأصول
وربنا الهادى

مليون سلام

«سلاموا عليكموا

عليكوا السلام»

وأحلى الكلام»

بيداً تمللى بكلمه سلام»

لوع السلام مليون سلام

لو الحمام أسراب حمام

بس السلام يبقى بأصول

مش ضحك يابا على الدقون

ولا فاض مجلس والسلام!

ده السلام يعنى العمار

يعنى عش

ويعنى دار

يعنى صوت عصفور يزقزق

جوه عشه النونو شقق

نور يصبح ع النهار

يعنى قمحه فوقها قمحه
يعنى بنت بوت بطرحه
يعنى ضى ويعنى نور
مش مناجل شر قازحه
سارحه بتحش الجذور
ده السلام يعنى المصالحه
يعنى فرع من الأمانى
خضرا جوه قلوب مسامحه
هو ده معنى السلام
يلى موتوا المعانى
جوه فى عروق الكلام
لوع السلام مليون سلام
لوع الحمام أسراب حمام
مين فينا ما يحبش ينام
فوق مخده بریش نعام
يطرح الموال غناوى
فوق خدود ورد وريحان

ده السلام يعنى البشاره

يعنى صفاره أمان

يعنى إيد على إيد تسلّم

تنفتح كل البيان

آه يا سلام لو فيه سلام

كنت أقوم هـ الفجر افرق

ألف شمعاه الحبايب والجيران

كنت أعلق ورده بيضه

فوق شعور كل البنات

كنت أجيب فرقه موسيكا

يعزفوا السيكا بصاجات

واجرى أذوق كل شبر وكل حاره

بالكهارب والزينات

ده السلام يعنى ابتسامه

مش ندامه وسكه مفروشه بأهات

هو ده معنى السلام
يلى خليتوا المعانى
ضايعه فى حروف الكلام
لوع السلام مليون سلام
لوع الحمام أسراب حمام
والسلام عهد وأمانه
حتلا قوه موجود حدانا
لحن بيكمل غنانا
وف تسابحنا وكلامنا
وف تحيتنا وسلامنا
فوق ملامح طفل سارح
وف عنيه ضى ابتسامه
بين شفائفه سنّه فضّه وسنه لولى
وف ضفاير بنت سمرا
جوه فى عيونها الزتونى

حلم راجع بالسلامه
جوه حجر أمى اللى قاعده
ف ريحى تستنى الأتاره
فى الشوارع الحجره
فى المداين ف المعابد
فى الكنايس ف المسجد
وف آدان الفجر لما
تضوى فى قلوبنا البشاره
ده السلام يعنى المحبه
سنبله بميت ألف حبه
والسلام عهد وأساس
السلام مش بالرصاص
مش سلام على ناس وناس
مش مدافع مش بارود
مش قنابل مش حشود

مش ده طه وده داوود
ده السلام موال غلابه
لاقيه روحها فى وسط غابه
بينهشوا فيها الديابه
واللى واقف ع الحدود
نفسه يوم يقدر يعود
يشرب الموال حكاوى
صبح نادى وريح تقاوى
السلام مش بالإفاده
مش جنازه وقهوه ساد
السلام يعنى السياده
قوه تسندها الإراده
يبقى عرضك هوه عرضى
نبض أرضك يروى أَرْضى
ونبقى فيها الكل واحد

واللى خايف يبقى واحد
مش لازمنا ومش معانا
هو ده معنى 'السلام
يلّى خبيتوا القنابل
جوه براج الحمام
يلّى عمرتوا المدافع
لجل ما يموت الكلام
وعشان يكون مسك الختام
راح أقولكم أحلى الكلام
ملعون سلامكم والسلام
ملعون أبو خاش اللى سلّم
يوم عليكموا واللى حيسلّم عليكموا
واللى سلّم من زمان

بريئه أنا منكم

يشهد عليه الليل
والتوهه والمشاورير
والقلب يوم ما اتخنق
جوه فى ضلوعى جنين
والحلم يوم ما انفرط
دمعه آهات وأنين
بريئه أنا منكم
ولحد يوم الدين
بريئه م الفهلوى
واللى ما عنده ضمير
م الندل والمفتري
واللى ما يعرف دين
وبريئه م الملعون
والصاحب اللى يخون
والست لما تكون

قادره عاديك يا حفيظ
تخرب عقون وبيوت
والراجل اللي يفوت
من تحتها مهروس
وبريئه من انهووس
واللي صبح أراجوز
م البغل والمتعوس
ومسأحين الاعتاب
وبريئه م الكداب
والهكص والأحزاب
واللي فتح بيت باب
للواسطه والمحاسيب
وبريئه م الهليب
واللي مالهشى حبيب
والسبع لما يخيب
يرخص ولا يسواش
وبريئه م الأوباش

والقادر الهبَّاش
واللى واكلها بلاشر
والعه ولا يهموش
وبريئه م اللى ماجوش
ساعه الندما ما بنوش
عايشين ما بينا هاموش
لابسين قناع ووشوش
وبيقتلوا الأحلام
وبريئه م الحكام
من صنف بال وسيكام
بقوا صوره بالألوان
باهته بلا برواز
وبريئه من الوسواس
والنطع والهماز
والراجل الهلاس
اللى ما عنده خشى
وبريئه م اللى اختشى

وعاش فى دور دروشه
وسمع سكوته انتشى
غايب وماله وجود
وبريئه م الهلفوت
اللى ما عادله صوت
بين الحياه والموت
عايش ومش موجود
وبريئه من بهوات
لابسين هدوم خواجات
يترقصوا بصاجات
وفشر هدى وجماليات
فى الرقص والتقصيع
وبريئه م اللى بيع
يبلاش لندل وضيع
من الرمه والمقاطيع
اللى بعونا قضيع
واتقاسموا ف الغنمات

وبريئه م الكلا بيظ
لابسين يادوب بلا بيص
يتزنقوا في الأتويس
ويقولوا ياي يا بوليس
لو حدم المتاعيس
يقرص ذيل الفستان
وبريئه م التوهان
على كل لون يازمان
يسقط يعيش سلطان
ويديم علينا الفول
وبريئه م المهطول
والخيخه والدلدول
والرجل الطرطور
اللى صبح مهزوز
وبريئه م المدسوس
من فرقه الهكسوس
يمسح عقول ورموز

راح جاب لنا المتعوس
رقاصه تدّي دروس
ف العفه للنسوان
وبريئه م الفبركه
ووزاره التعليم
وبريئه من الهمبكه
واللى ملهشر كبير
وبريئه من العولمه
وبريئه م التبوير
وبريئه من ده الزمن
خلا الخسيس له ثمن
والحر عبد ذليل
مصريه أصلى أنا
والطبع فيه أصيل
وادفع بروحى الثمن
والقى ف بلاد النيل
زغاريد وبدر اكتمل

طَهَّرَ قُلُوبَ مَلَائِكَةٍ
وَلَا أَقُولُ بَرِيئُهُ أَنَا
وَلَا يَبْقَى فِيهِ جَاهِلِينَ
نَرَعَى حُضَارَهُ بَدَدَ
وَنَعُودُ لِأَصْلٍ جَمِيلٍ
نَلْقَى فِي نَهَارِنَا اتُّوَلَدَ
عِزِّهِ وَإِرَادَةُ جَبِيلٍ
وَيَقُولُ بِصَوْتِهِ الْوَلَدُ
مِصْرِي وَأَصْلِي أَنَا
مِنْ صُلْبِ مِصْرِيِّينَ



ماكرينا

ماكرينا حوالينا وحيقضوا علينا
وبعيد الشر عن السامعين
صحصح وبايا لحظات يا أخينا
ونفهم اللي مش فاهميننا
دول ماكرينا
ماكرينا عايشين ويانا
حيخلصوا ع اللي معانا
وبينهبوا فينا وياكلوا شقانا
والحاله جيم والناس تعبانه
دول ماكرينا !!
ماكرينا حكام وباعونا
لديابه في الضلمه كلونا
حاصرونا ضربونا دوخونا يالمونه
حالفين ليخلصوا على اللي جابونا
دول ماكرينا !!

ماكرينا جم ضحكوا علينا
 بسلام مضروب ورضينا
 عملونا حصار قولنا موافقينا
 ضربونا بالنار غنينا شاكرينا
 للماكرينا!!

ماكرينا بيخصصوا فينا
 والخييه حتعم علينا
 وفلوسنا فين ما حنش عارفينا
 وقريب قوي حنمد إدينا
 للماكرينا!!

ما كرينا بيتكتكوا ليكا
 علشان يوم يقضوا عليك
 نفتح أسواقنا لجون وماريكا
 باسم العولمه جم غمزا عنيك
 دول ما كرينا!!

ماكرينا وده درس خصوصي
 بين فك دبابه ولصوصي

حنضیع فی کازوزه والنعمه یجوزی

وحنرجع مشی ومن غیر شوزی

للماکرینا!!

فاهمینا.. ربنا یهدینا

ولایوم یتحکموا فینا

إبن جبان ندل ولا ابن لذینه

ده احنا شعوب العالم مساکینا

ودول ماکرینا!!

قول یا سمعان للی ما سمعوشی

وانت یا فهمان للی ما فهموشی

للی اتکلموا واللی ما نطقوشی

خلیکوا رجاله ولا طواطوشی

للماکرینا!!

صعیدی فی الوای بلاتیشن

"باللهجه الصعیدی

الواد عبده حلول سیکا
إبن سنیه العمشه جارتنا
سلفه الاسطی حماده أمیه
غاوی سیاسه وهوه أساسا
مالهوش عازه
والغبا جوه حبابی عنیه
جای بیجولی
جولی یا عمی وحذر فزر
وای بلاتیشن تطلع ایه؟
جلت له یا ابنی أنا ما عرفشی غیر الدکتیشن
وای بلاتیشین
دی بتاکل
ولا دی شربه لوجع الرکبه ولا دی ایه؟
جالی یا بویا دی اتفاجیه

واللى ما ضوما اخوانا البعد ولاد الإيه
جلت له بس خلاص مفهومه وما تكمّلش
لا تجول فين ولا مين ولا ليه
المقصود يا ابن المسطوله
يبجى الحال على ما هو عليه
والمتضرر يخبط راسه فى اتخن حيطه
ويبجى ساعتها الحج عليه
واى بلاتيشن^٩
يا نهار أسود
هيه الخلق جرالهم إيه
حوسه لتبجى دى فيها نصيبه
لزمن نعرف إيه اللى وراها
ومعناته ايه
الواى طبعا ودى مفهومه ومعناها ليه
يبجى العُجده فى البلاتيشن
ودى معناها ماهوش مفهوم
بس حجيبها
لو حنجول

ان البلايشن م الكبونيشن
 والكبونيشن يعنى سافون
 شفت يا ولد ما هيش تخاريف
 يعنى خلاص ما فهاتس تصريف
 همه جالولك ليه نصرפה
 من تصرفها حناخذ إيه
 إحنا نجول والخلق تفكر
 وده حيحذر وده يستفسر وده حيفزر
 يفضلوا كده على الحال ده سنين
 واحنا نخطط سوا وندبر
 كيف حنخلص ع الباجين
 يعنى المعنى فى واى بلايشين
 بجى متفسر
 لساك برضه يا واد بتحذر
 يعنى كوشن يا ابن الهبله
 ما هواش أنسر
 واى بلايشن واى بلايشن
 وحياة رحمة أبويا عوبضه

ماعارف ليه

واى واى واى يا كليتون يا ابن الإيه

يا بتاع مونيكا يا كافى أوليه

تعمل كده فى الخلق دى ليه

المحجوج تجوله عفارم

والمظلوم تجيب الحج يا بويا عليه

اياك فاكر نفسك جاضى

جاضى وخايب

حتربجها عليك وعليه

بس أمانه وكلمه حج

عمر الحج ما كانش عليه

المحجوج الخوف والخسه

لما ركعنا نبوس كفيه

واللى نجوله نعيده نزيده

واللى نزيده نحط عليه

نعمل مارش ف شبر وربع

وندى تمام لولاد الإيه

وده کُلیته علشان ایه؟

مترف متر یا عالم خرده

وابجی جابلی نو یتحصلوا حتی علیه

وای بلاتشین وای یا آخوانا

یعنی کوشن وافهموا لیه

جولی یا فالح

منک لیها ولها له لیه

ف الفوزره دی نعمل ایه

وای بلاتشین؟

وای بلاتشین؟

وحیاه اُمی ما عارف لیه

الفاتحه للحكام

حكم علينا الرمن
بالفرض والمحتمل
وبصرخه من غير صوت
وبموته من غير ثمن
قلبي قزاز مكسور
فتافيت آهات مبدور
على فجر من غير نور
والعيشه لا تحتمل
ألفين مدد يا ولاد
كان فيه ما بينا معاد
سرقوا المون والزاد
وزوقولنا الكفن
حفنة تراب ودموع
وطريق ما فيهش رجوع
غير الندم والجوع

وعدو لا يؤتمن
يا مولفين على البكا
والدمع يا ولداه
رضع العذاب م الألم
كبرت معانا الآه
حفظت فصول المحن
والجرح كان مفتوح
لا عمره يوم اندمل
ولا بالوجع مسموح
مزنوقه فينا الروح
ومقاو حه ما بتطلعش
والحس فينا انعدم
بنهزه ما بيسمعش
بيسر سبولنا الهوا
من تحت عقب الباب
ويبيعوا للى اشترى
والزفه للكداب

كل ما تكبر سنه
نرجع ورا ميه
خافين نعدى القنا
والسكه مش هيه
يا اخوانا نوبه أمل
والفاتحه للحكام
يسعد صباح العمى
والغفله والتوهان
ملعون يا عود الذره
يا سنبله يا كتاب
يا ورق تاريخ انفرط
يا شجره اللبلاب
مكسور يا سن القلم
يا حبر... دم . رصاص
نشفت دموع الألم
شخبطنا فى الكراس
يلى دفعت التمن

آن الحصاد والجرد
أديت فروض الوطن
والسنه ويا الفرض
مسجون لسابع سما
مدفون لسابع أرض
يلى عشقت الغنا
لأجل الوطن والعرض

بانوراما

غنيوه متسلطنه
على ضفتين النيل
والصوره متبروزه
متحزمه بمواويل
نسمه طريقه وشجر
رافع عيونه بشوق
بينادي ضي القمر
ويبص له من فوق
مخطوف يا لون السما
عاشق ياضي الليل
سبحه وطاقيه وأمل
بیشابی ع الشطين
مرسى ومراكبي وسمك
ما يطقشي سد الحناك
ده مزاجه شيشه عجب

والشايه ف الخمسين

شايفه صبيه وولد

قاعدين على الكورنيش

يتقاسموا كوز الذره

ويهزروا بشويش

غنوا يا عيني يا ليل

يا قلعه يا أهرام

يا سيده يا حسين

ألفين مدد يا امام

يا مشربه أمل

يا رنه الخلخال

يا بت يا مدندشه

يا مرقصه البلاص

عامله النهار سكتك

وحوايه فوق الراس

يا طارحه فلك أمل

يا قلة العطشان

نزلت دموع القلم
رسمت عيون فنان
فلاح أصيل مجعوص
قاعد أمير سلطان
على عود سريس انفطم
بيدندن الموالم
زقزق ف قلبه الأمل
«صوت العروبه أدان»
يامحسنين لله
عاجز ضرير الشوف
ومأنجيج العكاز
موكوس بقصر النظر
ولا شفش من الغربال
يامحسنين اختشوا
مين ينصف الغلبان
زفه وعروسه ونار
درويش وحضره وزار

وكر كعه وهزار
والدم زى العسل
حنطور طالع له حمار
بعيون تطق شرار
وسرينه للحمار
وإشاره حمرا خطر
والعسكري مرزوق
فى الزحمه كان مزنوق
وأما يا دوب بيفوق
بيشوف له سكة سفر
جنب الرصيف مركون
ضى لشعاع لمبه
من فوق عمود مكسور
باصص بعين واحده
والست صوتها يقول
أنا بالأمل.. وعيال
متروشنين بعقال

وبيرقصوا سامبا
هون علينا يا خال
يا عم يا جمال
قوم رجع الموال
فيه ديب طالع له عيال
وبياكلوا بالشوكة
وف نشره الأخبار
قالوا البلاد سرار
واتخمدوا يا شطار
فيه محتمل أمطار
والسكه معكوكه
أص الكلام بأوان
ولكن عصر أدان
والدنيا إيه؟ حدوده
عش الغراب موضه
والفينو والباتيان
والشيبسي والسوبريم

والبانجو والصودا
والقهوجى فهمان
قام سمكر الدكان
وانا وانت الجدعان
من فوق سطوح الزمن
على فرشہ الأحران
ومأجرين أوضه
من خرم إبره أمل
بصيناع القمه
شفنا الفتوه أمام
جدعان ومش جدعان
شبطه وأونطه وشوم
على معمه ولمه
والمفتري النمام
طول عمره ندل جبان
لطح وعريض القفا
ولا عند هوش ذمه

وكفوف تقول لله

وام الشهيد إياه

قاعده بتستناه

تدعى لرب الكون

يارب يا ستار

يا عالم الأسرار

بدل لنا الأحوال

واكشف لنا الغمة

ودى عجله ماشيه لورا

وراكبها واد مفعوص

بفئله متشجوره

ف الزحمه راح مدسوس

والسارق المسروق

يلهف رغيف محروق

ترقع قفاه بالجزوز

يصرخ يقول: بالذوق

ما الكل يابا لصوص

عود القصب ممصوص
والبرتقال بفصوص
والطرح عنابي
أدباتى فقرى صريح
واسمه البعيد حابى
طول عمره أصله فصيح
خدم الزمان تصريح
وإداله تعسيلة
وفى جذع شجرة توت
أحلامه مربوطه
بيعيد حساب الزمن
والضحك ع النوته
علق ف صدره حجاب
وفتح ف قلبه كتاب
ما فهوش ولا صوره
قال الزمن كداب
قسمنا ع الأحزاب

كذاب فى إيد كذاب
يمشوا ورا الكذاب
مركوب أبوهم داب
ولا عدلهوش قومه
فيه ناس تربى شتاب
وفيه ناس تربى كلاب
لا مؤاخذه أنا الكذاب
والقافيه محكوميه
سجع وبحور بتدور
يلى عليك الدور
دى السكه محصوره
جلا لیب وجینز.. دقون
بارتى.. وسبوع وطهور
حبره وحجاب ومايوه
دايو وعيون ويبجو
عربه كارو بنور
كرباج ورا وحدور

شباك بشيش مكسور
حبل وغسيل منشور
منديل بأويه سبور
وعوافى أو بنجور
ما عادتشى تفرق شور
سمعنا يابا داکور
خلى الحقيقه تبان
واقرا لى ف الفجان
واكشف لى ع المستور
يمكن ساعتها أقوم
أنوى الصلاه والصوم
وآخذ معاك صوره

آخرتها طيط

كذاب وصدق كدبته
عريان وسلف بدلته
وحياء جوز أمي وحضرته
لأصرخ واقولها ف خلقتة
حنروح فطيس
لو يوم نهيص
ورا ندل بايع ذمته
بنصدقوه وبنشكروه
وبنحمدوه ولا حاجه تمره في جتته
عامل شاویش
على ناس مفیش
بکروش وریش
وعقول ما فیش
وسیادته واضع خطته
فرق نسود
عدی الحدود
واضرب رصاص

ارقع وشوط
خدكـام قـيراط
وابعت طرود
بطاطين.. لحاف
متغمسه بريحه البارود
علشان ما يعجب حضرته
يا ابن الأصول
يا ابن الذوات الاربع
يا فاهم ف الحاجات
والمحتاجات
إيه لازمته بس العناد
إيش ياخذ الريح م البلاط
فضك بقى من صحبته
شوفلك طريق غير سكته
آخرتها طيط
يا ابن العبيط
تزعـل تشيـط
اشرب معانا من المحيط
وخسيس يدوسنا بجزمته

نصيحه لوجه الله

اللى ما يعرف عدوه
عمره ما يعرف صديق
واللى يختار يوم رفيقه
عمره ما يضل الطريق
واللى واقف ع المفارق
يوم مشرق يوم مفارق
مش حتفرق لو يفارق
قله حيفضى الطريق
سكتته سكه مهالك
له طريق فى الضلمه سالك
لو أجير أو كان ده مالك
ع الشطوط ح يموت غريق
واللى ماشى لوحده سارح
تنكر كل المطارح
ميتته من بحر مالح

عمره' ما تبل ريق
 واللى عقله سجين لفكره
 واللى جوه ضلوعه سجنه
 عمره ما يتمد ذكره
 والبراح فى عنبه يضيق
 واللى يرضى يوم بذله
 واللى شاف الحق ضلّه
 واللى واقف زى ضلّه
 عمره يوم ما يكون طليق
 واللى ما يعرف عدوه
 عمره ما يعرف صديق
 واللى يختار يوم رفيقه
 عمره ما يضل الطريق

هل ده يحصل؟

نفسى أغمض يوم وافتح
والقى نفسى ف أى مطرح
جايه فيه الشمس تمرح
والقمر نازل يصبح
ع الشوارع والحارات
بين كفوفه سلطانيه
يملهالى فول مقشر
لو يلاقى الفجر كشر
يزغده ف كتفه اليمين
يطلع الموال يضر
غنوته بشعر البنات
حادى بادى هل ده يحصل
كنت أقوم وافرك عنيه
كنت ألم الصهيجيه
ليله لأهل الله شويه

فته لحمه عيش ونابت
 صوتنا يصبح ذنانات
 كنت أبوس الأرض تطرح
 سنبله ومحراث ومدفع
 فوق كفوف العزم يركع
 صوت حيازح م السكات
 صوت يقول لليل عزافى
 يلى ماشى لبكره حافى
 ضحكى فرشى ولحافى
 جوه قلب المشتاقين
 حلم مستنى الميعاد
 حير وحواله لو مجاشى
 عمر جاي وعمر ماشى
 والعمى ليه ما تعماشى
 قبل ما يعم البلاد
 حادى بادی هل ده يحصل
 حادى بادی مش حیحصل

إلا لما الفجر يبرق
بين عروق الضلمه يبرق
يحرق العتمه اللي تخنق
صوت نبى ينوى الجهاد
تطلع الشمس العفيه
تيجى تشرب من إديه
فى الصهاريج تجرى ميه
ينتعش نبض الساعات
السكات ملعون سكاته
بل ريقه م اللي فاتوا
حقهم للأفوكاتو
صعب كان يرفع قضيه
بعدهما تهب ومات
وحادى بادى هل ده يحصل
حادى بادى آه حىحصل
لما خيط الفجر يسرح
بين شقوق الأرض يطرح

دمعنا عشق ونايات
آه تنادى الذكريات
بصر يا بنى النيل نجاشى
والتاريخ على كيفه ماشى
فيه حروف ما كتبتهاشى
بين سطور ما فهمتهاشى
لو صحيح ما عرفتهاشى
روح وركب فهمات
حادى بادی لو ده يحصل
حادى بادی بکره يحصل
مش حیحصل.. لآ حیحصل
مش حیحصل.. لآ حیحصل
مش حیحصل.....
لآ... حیحصل

رسالة من عبده مشتاق بعد ما تجن وفاق

الولايات الرابعه ليك
والولاية الخامسه ليّ
خمسه وخميسه ف عنكم
يلى حتنؤم عليه
بطلوا لؤم وخبائه
حدجاب سيره الرياسه
مالى أنا ومال السياسه
دى العبارة ف الدباره
نفسى أبقى وزير ظغن
والقى كرسى ف الوزاره
هوه ده مش حق ليّ
ولا يعنى كتير عليه
حبه ليكم حبه ليه
يوم عليكم يوم عليه
ولا يعنى تكشى فاكر

إنها ورث وتكّيه
ياوزير بالأقدميه
الولاية الرابعه ليك
والولاية الخامسه ليه
نفسى أشوف شكل المنافق
والملاوع واللى نافخ
بدلته ورافع إديه
والمراوغ والمقاوح
واللى عامل نفسه كافح
ربنا يعينك عليه
نفسى أشوف شكل المرابى
واللى كوشّع الأرضى
واللى نام وضميره راضى
وربنا غضبان عليه
والمهادن والعجيب

واللى عامل نفسه ديب
واللى صقف غصب عنه
واللى صقف رغم إنه
عارف إن الصقف عيب
نفسى أشوف شكل الرياله
والمساله والغباوه
والأمور الفهلويه
هوه ده مش حق ليه
ولا يعنى كثير عليه
حبه ليكم حبه ليه
يوم عليكم يوم عليه
ولا يعنى تكتش فاكتر
إنها ورث ونكيه
ياوزير بالأغلبيه
الولايه الرابعه ليك
والولايه الخامسه ليه
نفسى أقابل مره دندى

والسيمون ابن الفيميه
أصلى متغاظ منه غيظه
بكرهه كده بالغريره
كان قصادي ابن اللذيذه
وراح ف كرش اللي اسمه ايه
نفسى أشوف مجلس وزاره
نفسى أخش البرطمان
كلمتى تبقى بإشاره
واد مخلص أو لعبان
نفسى أعمل سندباد
نفسى أركب طيارات
عايزه أشوف شكلى وملامحى
بيضه فله وكنت قمحى
والقى فجأه وشى نور
وامشى وضحك للمصور
ألبس البدله الليمونى

واقلع البدله الرمادی

صوره بالبدله الزتونی

صوره بالشرز الضماتی

صوره من غیر حاجه خالص

صوره فوق راسی الباریه

قول جنان أو قول سماجه

نفسی أعمل أی حاجه

بس أشوف العبد لله

لما حنصف وابقی بیه

هو ده مش حق لیه

ولا یعنی کثیر علیه

حبه لیکم حبه لیه

یوم علیکم یوم علیه

ولا یعنی تکنشی فاکر

إنها ورث وتکیه

یا وزیر صعبان علیہ

الولاية الرابعه ليك
والولاية الخامسه ليّه
نفسى اشارك نفسى أشعر
إنى قد المسئوليه
نفسى أفهم يوم وافر
البنايه البناويه
نفسى أرفع أى حاجه
فى الشئون المعنويه
طب وزير للمنشآت العمرانيه
وحشه ديه
أرض صحرا وكوز فيه ميه
يعمرولى الشكمجيه
ولا حتى وزير سخافه
أملا مخ الناس لطافه
كرسى ف التنوير واضلم
طلعة الفكر البهيه

وارعى فكر العلمانيه
وأخذ الجائزه الى هيه
برضه نوبل مش شويه
شوف عموما
مش حناقش فى الديباجه
يا جماعه أى حاجه
يعنى ح ندوحر ف ديّه
هو ده مش حق ليه
ولا يعنى كتير عليه
حبه ليكم.. حبه ليّه
يوم عليكم.. يوم عليه
ولا يعنى تكنش فاكر
إنها ورث وتكبه
يا وزير بالعند فيّه
الولاية الرابعه ليك

والولاية الخامسة له
عندى فكره حلوه جدا
بس فكره ميه ميه
مسكونى الخارجيه
صعبه ديه.. حته منها
مش بحالها
مش كثير أبدا عليه
ح سعى واعمل شو يجزن
فى العصابه المفترية
نفسى أروح للزفت وش ابن عم الواد كليتون
اللى عامل جاكى شن
نفسى أطلع غل جود
ف قلبى واصل للودن
نفسى أقوله طظ فيك!! بالانجليزى
نفسى أقوله حرام عليك!! بالانجليزى

سيب بلاد الناس فى حالهم يا عزيزى

ربنا ينكد عليكم

باليابانى والايطالى والباريسى

انت مش الفيل صديكى

مستحيل حتكون رفيكى

إنت الجانى الحقيقى

اللى بوظ لى القضية

نفسى استدرك شارون

أو بيريز والواد براك

فى الحارات اللى ف بولاك

وأساله ايه مقاس قفاك

قوللى جوه العلبه إيه

دبله فضه ولا فيل

واسكعه بإيدى الشمال

وراقعه برجلى اليمين

قول أنا عيوشه ياه
والهرم قول مين بنه
جدو خوفو
ولاً فوفو
ولاً أبوك مستر كوهين
يلا يا ابن المفتره
روح أبيب وارفع قضيه
يللى ستك عنصريه
كلت ايه حشرب عليه
نفسى أقول كل الكلام
واجرى اصوت فى الميدان
يمكن اسمع صوت آدان
أهدى واتنيل شويه
هوه ده مش حق ليه
ولا يعنى كتير عليه

حبه ليكم.. حبه ليه
يوم عليكم.. يوم عليه
ولايعنى تكنش فاكر
إنها ورث وتكيه
ياوزير الحقانيه
الولاية الرابعه ليك
والولاية الخامسه ليه
ولا اقولك مش قضيه
الولاية الخامسه ليك
والولاية السادسه ليك
والولاية العشره ليك
ولولادك ولذويك
ربنا يبارك لى فيك
تبقى قد المسئوليه
واللى حقه ضاع ف زحمه

ربنا يعوّض عليه
واللى نفسه فى رصل لحمه
يجى فى العيد الكبير
يلقى فته وليه عديه
ألف ميت مليون ضحيه
م الغلابه الشقيانين
والولايه الخامسه إيه؟
الولايه السادسه ليه؟
والولايه العشره مين؟
مين حيقبض مين عليه؟
لأ ماليش فى السكه ديه
ربنا يعوض عليكم
ربنا يعوض عليه

حكم الهوى

بحب همس الهوى
لما الهوى ييصيب
والقى الحبيب عصفور
طاير فى ايده حبيب
منقار على منقار
والوصل يبقى قريب
يتمشوا على الأغصان
وحبيب فى حضن حبيب
يتهامسوا بالأحان
حب الطيور ده عجيب
فى العش بيتى اللقا
واللى انكتب ده نصيب
لاييعرفوا يكذبوا

ولا يعرفوش العيب
لا حد م العصافير
جه قالهم ممنوع
ولا حد بيقول عيب
لقمه وضله وشجر
حكم الهوى ده غريب



الجبن وسنيه

العقل لما اتسجن
جوه في زنازينه
فرد قلوغه الخوف
وفرض قوانينه
ولا كل مين خاف سلم
من نصل سكينه
ده الظلم لو يوم حكم
عللى مهاودينه
الحلم يبقى سراب
وتوه عناوينه
والحق يصبح أمل
ف عيون محبينه
والفرد يبقى صنم

مكتوب على جبينه
يلع سكوته مرار
يشرب دموع عينه
ده لكل فاجر ظلم
أتباع مطاوعينه
حائس مع متعوس
قدم قرايينه
من نبض حلم انفجر
جوه ف شرايينه
وده طبع فينا اتولد
م اللي احنا شايفينه
نبكى على اللي انكت
واحنا اللي كاتبينه
نلطم على المقتول
واحنا اللي قتلينه

تايهين في دنيا البدع

والمولى ناسينه

عيني عليك يا جدع

فين الخلاص فينه

داير يقول للبيع

والكل بايعيه

وينادي جاي ياهووه

ولاحد حيعينه

وقالوا زمان ف المثل

واظن فاكرينه

العجل لو يوم وقع

تكثر سكاكينه

يخرب زمان الخوف

والجن وسنينه

مبروك عليكوا

خبوا عيونك يا أبو عمار
وجرجروك م الدار للتار
ماضيت لهم على صك قرار
بيقولهم ده ماعدش غرار
وفي ورث أبونا انتم أحرار
ولا عاد كفاح ولا عادش نضال
ولا فيه حجاره ولا ثور
مبروك عليكم يا أبو عمار

عليك والسلام

يجيلك رزيه
يا راعي السلام
يا وش الأذيه
يا نسل اللثام
يا شاري وباع
في حقي اللي ضايع
يا لاغي عقولنا
بوهم وكلام
يا فارض وصايتك
وشاهر عصايتك
وبررت غايتك
بحفظ النظام
وبتشد ترخي

وتؤمر وتنتهي
وساعه الضروره
تشد اللجام
يجيلك رزيه
يا راعي السلام
يا وش الأذيه
يا نسل اللئام
بتأذى اللي غايب
يخاف اللي سايب
يجيلك مسلّم
ويدي التمام
شربنا الأونظه
وميت ألف ورطه
تكعبل خطانا
في طريق الضلام

تحاصر شعوبنا
وتنهب في قوتنا
ونيجي لجنابك
نقولك تمام
ووضبت قاعده
على إيه المناهده
ماضينا.. ومضينا
في طريق الانهزام
يجيلك رزيه
يا راعي السلام
يا وش الأذيه
يا نسل اللئام
عيدان السنابل
حتطرح قنابل
تفجر سكوتنا

ونمحي الغيام
نرجع حقوقنا
نحرر شروقنا
من الفجر تنطق
عروق الكلام
ويبقى سلامنا
وبقى إيماننا
ويبقى علينا
وعليكوا السلام



الديك - دا - طور
«باللهجة النوبية»

أيها الساده اللي مش ساده
إليكم نشره إلهم المعاده
في حديث خاص لإذاعه
هس هس العانيه
صرح الوالي المعظم
من ولايه ننه ننه
للولايه بتاعنا إحنا
اللي فاهم كل حاجه
واللي عارف كل حاجه
واللي مش محتاج لحاجه
إلا لشويه عزيمه
على حبه من إراداه
بس عايزين الصراحه

كان حديثه نيله خالص

سوري عفواً!!

كان حديثه حلو خالص

والمذيعه حلوه خالص

والكلام كان حلو خالص

بس كان هايص ولا ص

تنك الساعتين بطوله

مش لاقى حاجه يقوله

واللي بيتقوله يعيده

واللي بيعيده يقوله

خلت 'لعثمان بتاعتا

عقله خلبط خلطبيط

قاله يخرب بيت أبرعي

قولي حاجه يا مصيب

إنت وياهم علينا

ولاً ويانا عليهم
تنح المذكور وقاله
يا بلاوي افهموني
أنا طول عمري حياي
أعشق اللون الرمادي
وأكره الفعل الإرادي
بس فكري زي فكر اللي جابوني
كان ضروري يكون أحادي
قاله عثمان يا عظمتك
يعني قصدك ديك دا تور
قاله ديك دا اللي قصادك ولا طور
قاله عثمان شايفه ديك.. والله أعلم
قاله يبقى أنت اللي طور..!!

دستوريا أسیادنا

دُسْتُورِیا اِخوانا یا بُعْدا

لأُ سوري دستور مـ البُعْدا

محبوس حابس یا اُسیادنا

وبکاکي من فوق مادنه

وورايه ديوك بیکاکوا

حرّصواع الباقي مع کوا

برکه مولانا هولاکو

حلّت وعلينا اللعنه

طرطور طرطر طراطير

بیغیروا ف الدساتير

ولا عاد في الحته كبير

ويا وارث تورث ميز

ما الورث اتباع واتباعنا

نرجع تاني لموضوعنا

وبیان لדיار الافتا

من جمهوريه زفتي
لعبه وعمولها استفتا
صوت يلي انت سامعنا
وقول ملك ولا كتابه
أسد شبل ف الغابه
واحلف وحياه راس بابا
زفه ف مولد كدابه
والله يجازي اللي خدعنا
للجوكر ألف تحيه
ملعون خاش الحريه
يحيا قانون العبوديه
والقوانين الوضعيه
والحكومات الشموليه
لها منى ألف تحيه
وحياه أمي دي رجعيه
لو صوتنا علي وجعجعنا
واحد ولا فيش غير هوه

قاعد مترجع جوه
وبكيفك أو بالقوه
لو سوبرمان وفتوه
روح قوله بقى يودعنا
عصابات شغل فتوات
واستعباط على حرّكت
والسقا أبوه لو مات
حيققوم يسقى الشربات
ويكمّل على مواجع
مزيكه وترابتو
ونفديك بالدم أفدود
بس احنا ورحمه أبوه
مين ده اللي حيلوي ذراعنا
روح هاتلي لمون بالصودا
أنا حاسه بريحه شوطه
حيصعدوا فصل الروضه
والورث حيصبح موتسه

لم الجدعان واتبعنا
على قهوه ساقيه مكّي
نصرخ نلطم وحنبكي
ده ناويها وييتكتكلي
قبل ما حتى يودعنا
ظقططوا يا عيال قولوا هيه
الحكم صبح تيك أواي
لو عايز قول أوكيه
لو رافض قول أوكيه
في كلا الحاتين نو و ي
غير كوديه وزار ينفعنا
أنا عايزه بخور م الجاوي
وحمار أرمن وحصاوي
ودراع برغوت مش غاوي
تنطيط عفريت ومخاوي
شلة مقاطيع يقطعنا

حابس من شر الكرسي
من شر عزيزه ومرسي
من قرص النمل الفارسي
م الأحياء والأموات
من كايروا إلى بغداد
أشتات أشتوت أشتات
حرصوا من لعب السيكا
م الحشكه وم البولوتيجا
ولا تشمت يوماً فيك
مارشيل بت أم ماريك
قول حاجه الله يهديك
وادعي معايا يخليك
حلُّوا بقى عن أوجاع
وانصرفوا عليكموا اللع
انصرفوا عليكموا اللعنه



الأونه

مولود على كتف الزمن

عيل طشاش مرفوض

وبزمزميه أمل على كتف مش مسنود

بيرضعوه بالثمن والوأؤه بشروط

مين فيكوا شاف الوله

مين فيكوا معرفهوش

أسمر بلوني أنا

والإسم معرفهوش

شهقه حضوره لما دوره بيتتهي

تهتف يعيش

كبر وقال باسم الحجر

دمه انفجر

طرطش على وش الوطن

واتلخبطت كل الرتوش

ما تكتفوش صرخه بريء

ميت غريق ف بحور عطش حي وشهيد
وما تجسوش دمة ألم
دفعت ثمن نوبه أم
متعلقه في كتف الوليد
سن القلم حبر ورصاص
ينزف رصاص لو ينطلق
لحظة وجودي بتتخفق
للم حروفك واوع خوفك يهزمك
رعشه إديك
خطوة عنيك بين المنارق تلزمك
وبتقسمك بين سكتين
سكه هلاك
تنزف دماك
تعصر وريدك ترجمك
كل القلوب الزانية
والتانية لحظة ميلادك ترجفك
وتكتفك..

جوف السلاسل ينزفك.. تستنزفك

لحظه شرود

سجنك بيوت

نطقك سكوت

تسكت.. تموت

والموت كفوف بتلمنا

دهشه غيابك مشكله؟

مش معضله

إسحب وريدك واقعنه

يرسم حصان قلبين وسهم بينطلق

لوّن حصارك بإحتضارك

خُد قرارك.. وانسرق!!

يا مايا يا ام عبون سراب

متشرنقه

موتك قرار؟

ولا الفرار

ولا انت حبه الشرنقه

بعيون عجوزه مشقه
 نبضي في عروقك شنقه
 رعشه ضلوعنا معشقه
 والخوف سيوف مترشقه ف جثه تاريخ متعلقه
 على حبل بره الذاكه
 واحنا في وسط الداره
 مركز نزيف الأسئلة
 الخط ده مش خطنا
 والإسم ده مش إسمنا
 خط الدمار فوق عرشنا
 لحظه مواتك مزمنه
 والعش قش.. وقش كومه عضمنا
 والدش.. دشدش عرشنا
 بشبشلي طوبه تحت راس سيدنا الولي
 ما احنا ف زمان الأويا
 على كل باب واقف بعام
 وف كل حاره ميت نبي

بيحفظونا الأدعية
ويديم علينا الأوليا
الكذابين الأدعيا
يتمموا بتراب نجس
ويصلُّوا بيناع النبي
لحظه شروق اشمس م الغرب الغبي
وقفوم جميع الأغبيا وقالوا على الدجال نبي
ملعون زمان الإنكماش
الإنشطار الإندهاش
الإنهزام اللي لتزم
بالإنحسار والإنكسار
بالإنتصار اللي انهزم
ملعون زمان الأوليا
الكذابين الأدعيا
ملعونه كل الأزمنه
كل اللجان و لأكمنه
تسقط جميع الأنظمه

المستسلمه المتأزمه

المتأسلمه المتلثمه

بتواب عفن

مين فيكوا بيقول ده الوطن

قالوا الوطن أمن وسكن

لا لقينا أمن ولا سكن

قالوا الوطن حصن د مان

باعنا الوطن

باعنا بلاش ولا ساب لناش

حق الكفن

ملعون أبو كلمه وطن

ملعونه يادقة قدم

صاحبت يميني وهيه تحيي العلم

لطفك يا عالم بالآلم

بالعجز وبصرخه ألم

مين فينا خان؟

مين الجبان؟

مين اللي باع من غير ثمن؟

إنت اللي خان ولا أنا؟

هو اللي باع ولا أنا؟

أتباع يزيد ولا عمر؟

حزب الحسين ولا علي؟

ومعاويه ليه ما يكنش أنا!!

مخصيه يا كل العقول

واستنسخوا من نسلنا

غابه قرود على شكلنا

تعجن تنام

تضرب سلام

تكمل فصول المهزله

قيموا الزينات يعلا الإيراد

يا اهل الهمم

والدعوه عامه للحثاله وللزباله وللرمم

رصوا الجماجم رصه تشبه للهرم

وترصصوا يا أهل القمم

وابدأ مزادك يا وطن
إيد الشهيد ماسكه الحجر
بتنين شلن
من غير حجر
باتنين ريال
راسه وعيونه مفتحه
باتنين جنيه
ومغمضه
باتنين دولار
دمه في قرايز للي عايز يشربه
مين قال جنيه؟
فيه حدح يزود عليه؟
اعلى بمزادك يا وطن
فر في دفاتر خدمتك
فيه لسه ناس على ذمتك
خطبة عرابي وعمته

خالد وسيفه وهمته
رأس الحسين لحيه علي
ناصر بدينه وذمته
أعلى بمزادك كملّه
لو حرف ينطق كمّمه
واصل نزيف
آخر خريف حتكمّله
ألا أونه أونه
لو تجونا
حتلقونا تحت عهده حضرته
ألا دو.. Tre
مين قال.. Tree
قرب.. وعاین.. واشتري
شالوم شارون أعظم زبون
لازم وطبعاً نكرمه
مادنه وهلال

صوت الأذان

فوق الميزان

مني كادوه.. مين يشتري

جثه نشيد

وصباح شهيد

بيشهد المولى البصير ويأمنه

حزمه عروق

طاقه شروق

حالفه الطريق حتكملة

قفه ضلوع

حفنه دموع

حافظه التاريخ من أوله

ظبط ميزانك وأعد له

وكمّل مزادك يا وطن..

كمّل مزادك يا وطن

صرخة عربية

(مسرحية بالعامية المصرية)

الشخصيات الرئيسية

الراوي

الراويہ

الأب سالم

الأم راجيہ

الإبن عماد

الإبنہ نعمہ

الخال حسن

المعلم أنيس

صياغة وحوار وأشعار: إيمان بكري

منصه التمثيل بلا قطع ديكور، ولكنها غنيه بالموتيفات الشعبيه الفلسطينيه، وشاشات عرض لأفلام الإنتفاضه وما يحدث على الأرض المحتله لشحن المشاعر وتهيته الجمهور المتلقي.

ومن خلال هذه الشاشات يظهر الراوي والراويہ لإلقاء بعض الأبيات، وكأنهما خارجان من قلب الأحداث ويتبادلان إلقاء المقطوعه الشعريہ..

الراوي: الأوله يا عين

والثانيه يا يل

والثالثه يا عين

الراوي: الأوله يا عين والصبر أجيبه منين

صبري عليهم طال

الراوي: والثانيه يا يل قولي نهارك فين

تتبدل الأحوال

الراوي: والثالثه يا عين ملّك غراب البين

وأمرنا للاندال

ده الندل لما حكم قال للخسيس إعلى

والواطي مهما علي برضه الأصيل أعلى

الراوي: يا مقسمين الأرزاق ع الحلوه والمره

أنا اللي صبري طال ما نصفتونيش مره

ظلم الخلايق فاق وأنا كلمتي حره

مكتوبه ع الأوراق بالتمر والحنه

ده الحر لو يرم فاق ماكتشي يوم مره

قدام جبان يهان

ولا ينحنيش مره

الراوي: وأنا صنعتي قوآل

والقول علينا حق

لو شفنا قاضي حكم بالظلم

حنقول لأه

الراوي: يحرم عليه النوم

دي لو القيامه تقوم

والأرض لو تنشق

عمري ما أقول الآه

وأنا جوه بصرخ لأ

الراوي: آه يا زمان العبر

الحر فيك انضمام

شفنا ف زمانك عجب

والحكم له أشكال

حسب المزاج والطلب

والصنف والألوان

واللي حكم ع العرب

قاضي مالهشي ميزان

الخصم عندك حكم

والشرع فيه متهان

الراوي: قوم يا تاريخ انظلم

واكتب على الأبدان

ده الظلم لو يوم حكم

حكمه ف جميع الأحوال

براءه اللي قتل

واللي اتقتل إعدام

صوت: والتهمة إيه؟

الراوي: مقتول

صوت: وجريمته إيه؟

الراوي: مفعول

صوت: والجاني ميز؟

الراوي: مجهول!!

صوت: مجهول وكل العيون شايفاه

مجهول وكل البشر عرفاه

شيطان رجيم إبليس جبان
أفعى بتسعى بالأذى تنفث سموم غلها
في كى شبر وكل مكان
الله عليك يا زمان
يا مولف الحيتان ع الزور وع البهتان
يلي رفعت العلم في دوله الضغيان
حكمت كل سفيه
واتحكموا الأندال
صوت: مش بس دوله.. ألف دوله وألف جلاذ فوق رقاب
كل العباد
كل الحقوق اتقسمت عللي مالهش حقوق
كل الإيدين اتسلسلت بالعافيه أو بالذوق
والحق ضاع ويأ اللي ضاعوا من زمن
صوت: وشهاده الزور والخيانة واللي باع من غير ثمن
صوت: والكلام اللي حروفه اتشقت من نرف أوجاع الألم
والحقايق اللي طمسها الخوف على جبين الوطن
صوت: ونصره الظلم المبين

صوت: واللي ناصب ع الطريق ألفين كمين

والوعي والحس والعقل والعدل كل ده فين؟

الراوي: العقل لما اتسجن جوه ف زنازينه

فرد قلوبعه خوف وفرض قوانينه

ولا كل ميز خاف سلم من نصل سكينه

والظلم لو يرم حكم على مهاودينه

الحلم يبقى مراب وتتوه عناوينه

والفرد يصبح صنم مكتوب على جبينه

يلع سكوته مرار يشرب دموع عينه

ولكل ظالم فجر

أتباع مطاوعيه

حايس مع منعوس قدّم قرايينه

من حلم عمر انفجر جوه ف شرايينه

وده حالنا طرل الزمن

م اللي احنا سديفنيه

نبكي على المكتوب واحنا اللي كتبينه

نلطم على المقتول واحنا اللي قتلينه

عيني عليك يا جدع

فين الخلاص فينه

داير يقول للبيع والكل بايعينه

وينادي جاي يا هوه ولا حد حيعينه

وقالوا زمان في المثل وأظن فاكريه

العجل لو يوم وقع تكثر سكاكينه

يخرب زمان الخوف والجبن وسنينه

صوت: يعني باختصار محكوم علينا بالدمار

الراوي: وألف سور وحصار

وقرار يبلغني قرار

ومعاهده استقرار

ع الإنهزام والموت

والصوت ما عدلوش صوت

ضي النهار بيموت

والخوف صبح دستور وقانون بقى مفروض على

كل خلق الله

اللي العمى غواه

واللي الظلام خلاه ماشي ف طريق مسدود
 الراوي: وقلوب ما ليها الخوف ف الضئمه مسجونه
 عشقت ليالي لصمت وبنفس مكسوره
 زرعت إديها الأرض بالدمع والحسره
 طرحت نذله وجبن وديابه مسعوره
 لا همهم حراس ولا ناس بقوا صوره
 الراوي: ما تفوقوا حبه يا ناس وتصحصحوا شويه
 ولا انتو يعني خلاص

بقي دمكم بيه
 عشقتوا لوز الدم والدنيا خادتكم
 ما بين رغيف وغموس دنياكوا محصوره
 لموا عيدان الشر من قبل ما تفرع
 وإزاي تنبت أرض والكل ييقلع
 دي الأرض بشابي وبصرخه مكتومه
 حابوا عليه حرام خلوني مستوره
 صوت: الستر من عند الله وإزي بقي حنعود وكل عام
 بينود والجوده بالموجود

صوت: ومستحيل حيعود من ثاني عام الفيل والطير والأبابل

فيه ناس كثير بتقول للبيت إله يحميه

الراوي: ده كلام جميل بس كمان بيقول امعى وأنا أسعى معاك

الراوي: صحى الأمل جواك خلي العزيمه وقود وسلاح ونار

وبارود واصرخ وأنا وياك.. اصرخ وأنا وياك

أغنيه: أصرخ

من حقك تصرخ.. تتألم

ولسانك ينطق يتكلم

لو حزن

أوعاك يوم تضعف وتسلم

لو جرح

علم على جرحك واتعلم

قاوم.. حاول.. صمم.. قرر

نبضك في عروقك يتحرر

لو طعم الشهد حيتمرر

خد تمر نخيلك واتمرمر

واصرخ قوم هذ سجون الخوف جواك

حرر.. واتحرر واحدا معاك

لو صوت احق يضيع ف سماك

راح يعلا صـت الظلم هلاك

واصرخ

صوت: نصرخ ونحكي ونتول نزيح قناع لحوف ونكشف المستور

خلف الأسوار في المستوطنات في المناطق اللي باقيه

من فلسطين يمكن نقدر نتقذ اللي باقي منها

صوت: إيه رأيكم نبداً ونحكي الحكايه من أولها والقضيه الفلسطينيه

قضيه العرب كلهم

الراوي: واللهجه مس مهم اللهجه بأي لهجه حتوصل بإحساسنا

وصدقنا حتوصل

وما تنساش ابن الفن وسيله نقل لكل الدنيا بالحرف بالكلمه

بالحرکه وبالإيتاع

صوت: خلاص نبداً نعرض قصتنا ونمارس العمل المسرحي

كمحترفين

وبدون تحضير آمانه نعرض الصور وبصدق حنقدر

نوصلها

لكل مكان.. على الأقل نشعر بعدم السلبيه ويبقى لنا

دور إيجابي

صوت: حنبذاً نمثل والدعوه مفتوحه لكل إنسان صاحب رأى

وكلمه

بالمشاركه معانا...

صوت: انت يا.. حتلعبى دور الأم وانت يا... دور الأب...

وانت يا دور نعمه و... دور عماد و.. ور الأستاذ أنيس و.. دور

حسن بقولكوا إيه نبذاً ونخلي توزيع الأدوار من خلال

الأحداث ومتطلباتها..

الراوي: طب وأنا و... دورنا إيه

صوت: آه..... و.. احنا عارفين أنكم ما تقدروش تسكتوا

وعشان كده إنتم لكم الحق في التواجد والتعليق في أي

وقت من خلال العرض

شغل الإضاءه واضبطوا الكاميرات واجهزوا... إبدأ

الراوي: اللي ما يعرف عدوه

عمره ما يعرف صديق

واللي يختار يوم رفيقه

عمره ما يضـ الطريق
 واللي واقفـ المـ الفارق
 يوم مشرق يـ الفارق
 مش حتفرق لـ يفارق
 قله حتفضي الطريق
 واللي ماشي لـ حده سارح
 تنكره كل المطروح
 ميتة من بحر ملح
 عمرها ما تبلـ يق
 واللي ما يعرف عدوه
 عمره ما يعرف صديق
 واللي يختار يوم رفيقه
 عمره ما يضلـ لطريق
 يقتحم المسرح رجل ذو أهميه ويتبعه مجموعه من الرجال
 بشكل مريب وملابس غريبه ومرييون يفرضون وجودهم
 على المجموعه يتقدم الرجل المسئول ويوجه حديثه
 للمجموعه بعد أن يوقف العرض.

المنتج: أعرفكم بنفسي أنا منتج المسرحيه وجيت أطمئن بنفسي على العرض ومعايا ضيوف.. «ينظر حوله» اتفضلوا يا جماعه.

يستغرب المؤدون

صوت: مين دول؟ تعالى لما نشوف

نحب نتعرف مين دول وإيه أهميتهم

المنتج: دول جماعه سواح أصدقاء بأثق فيهم ثقه عمياء وحيكونوا عيوني اللي حشوف بيها ووداني اللي حسمع برضه بيها.

صوت: غريبه!!

المنتج: وإيه بقى الغريب فيها.. يعني اعتبروهم زي مقص الرقيب وجهه عليا تراقب كل ما يحدث وكل ما يقال..

الراوي: مش من حقك تفرض أي رقيب ع الكلمه

المنتج: بس الكلمه سلاحها خطير

الراوي: برضه أساس الكلمه أمانه وساعات كلمه بتبقى أمانه وساعات كلمه بتبقى ضمير.

المنتج: أي ضمير؟

صوت: أي ضمير ممكن شعب وفرد وأمه ممكن كلمه تحرك ثوره.

المتج: ياه.. ضمير.. وثوره.. وأمانه إيه الكلام الكبير قوي ده.. إن كان على حتي فأنا من حقي بفلوسي وبنفوذني أقرر مش ممكن أبداً حتصور إن فلوسي تضيع في كلام وعموماً المسرحيه دي والفكره واللعبه دي كلها كده على بعضها لعبتي خيوطها ف إيدي وعلى رأي المثل إن كان لك عند الكلب حاجه قوله يا سيدي.

الراوي: طب قوللي يا سيدي..

مين دول أصاڠ ويهمهم إيه من عرض مسرحيتنا وإيه أهميه رأيهم في رؤيتنا ولا كلمتنا..

المتج: قلت أصدقاء لي مصلحه معاهم ويهموني أصدقاء يا سيدي من دوله صديقه..

صوت: بلاش والنبي كلمه صديقه دي إحنا عايزين ناس تقول الحقيقه..

المتج: طب إتعرفوا الأول

يهودي: يا صديقي سيبنا نعرفهم بنفسنا ده لو كانوا لسه ما عرفوناش من شكلنا أصلهم بيشمو' ريحتنا من على بعد أميال وعلى العموم نعرفكم بنفسنا..

أنا شالوم عازر

صوت: عازر مين بالضبط

يهودي: وأنا كرهين بيريز

صوت: يا حفيظ

يهودي: شامعون راين

صوت: يا نهار أبوكو طين

وجايين لغاية عندنا يا سناحين الدما يا مشردين أجيال.

صوت: إيه اللي جابكم هنا مالكوش ما بنا مكان الأرض دي أرضنا
والفكر والكلمه من حقنا.

يهودي: أوكي أوكي مش مشكله سس إحنا برضه من حقنا نتعد في
ركن يحصنا نتفرج وننقل ونرقب ونقول رأينا مش دي
برضه المديلولوخيه بتاعتكم سوري قصدي الديمقراطيةه ولا
أنا غلطان.

صوت: لأ مش غلطان أنت أولعبان وحبان لا بس قناع ملعون
حربايه متلون به ألف شكل ولون، ومستحيل حيكون لك أو
لغيرك أي حضور أو أي دور واتفضوا بره من غير مطرود.
يهودي: لأ لأ الكلام كده مرفوض..

المنتج: الحل عندي..

ياه.. انتم لسه فاكيرين.. ما خلاص حضيعوا وقتكم ووقت
الناس.

والناس عايزه تهيص تفرش برقصوا يغنوا يتسلوا
وخلص.

الناس محتاجه رغيف غموس قمه هدمه نومه فلوس
وخلص وجاي تقولي فلسطين ما خلاص الناس نسيت
زي ما كل الدنيا نسيت اسم فلسطين بحه خلاص.

الراوي: خلصت روحك إنت وهوه يلّي فنحتوا ما بينا الهُود يلي
زرعتوا جذور الغربه جوه قُوبنا واسأل كل الناس
حتجاوبك حتقول لأه بعلو الصوت، وفلسطين والشعب
العربي عمر ضميره في يوم ما يموت.

الراوي: طين الأرض وصوت المادنه

طله نخله وظل الشجره

لون الفجر وغمي القمره

غصن زتون مي ساحات الناصره

رمله يافا وحيفا ويونس

ضحكه طفل ودمعه حسره

قومه شعب وأمه وثوره

جيل ورا جيل ورا جيل ورا جيل

حافظين كل حروف الكلمه

ومش ناسيينك يا فلسطين

مش ناسيينك يا فلسطين

يهودي ١: حلو كلامك وبهنيك.. روحك عاليه وصوتك عالي بس
خساره ما فيش ولا كاميرا ولا تسجيل علشان تشجب
تهتف ترفض وتدين.

يهودي ٢: قول الشعر ورص قصايد واشعل جو الرفض السائد كل
ده كله مش حيفيد.. المستفيد الوحيد هو أنا بس انتوا مش
فاهمين.

شوفوا لكم موضوع ثاني غير فلسطين.

صوت: حنقدم المسرحيه رضيتوا رفضوتوا حنقدمها.. بكيفكوا
غصب عنكوا حنكملها.. متوجها لأحد الكواليس يا مدير
المسرح.. ابدأ العرض وبلا مقدمات.
يعترض اسرائيلي طريقه.

يهودي ٣: نحن أغلبيه يا سيد ولنا الحق في أننا نقدم عرضنا زينا
زيكم بليز من فضلك..

صوت: آه بدأتم اللعبه اللي احترفتم فنونها المسكنه والدحلبه
والتزييف والتدليس والضحك على الدقون ضللتهم العالم
بأك'ذبيكم وللأسف كثير صدقوكم مش ذكاء منكم لكن
غباء مننا وتهاون لكن الحال مش حيدوم أكيد في يوم
حينكشف القناع والكل يعرفكم على حقيقتكم.

الراوي: العنصريه في دمكم والنداله والخيانه هي رايه مجدكم

نفس الوجوه هيه هيه والأساليب هيه هيه

والملاعيب هيه هيه

يتدخل المنتج

خلاص انتهينا يتجه ر يضع علامات على المسرح هي دي
حدودكم وهذه حدودكم انتم ولا تتعدوها.

يهودي: بالطبع بالطبع لن نتجاوز لكن ممّكن جداً. جايز.. مين
عارف على العموم هي دي بدايه اللعبه «الممثلون يتجمعون
ويرددون».

إحنا منسحبين «واحد منهم».

الراوي: لأ.. هو ده غرضهم لازم نكمّل وقول ونوصل رسالتنا
وكلمتنا ونحايل وبكل طريقه نوصل لعقول العالم وضميره
نصحّي وعيه وتفكيره لازم نبدأ ومن الأول.

«يمكن أن يدور حوار حركي بالجلسه بين الفريقين يحاصر
الممثلون العدو وينجحون في إبعادهم وإدخالهم دائره
الظلام ثم يردد واحد منهم.

دلوقت ممكن نبدأ.. كله واحد ياخذ مكانه.. ابدأ العرض.

الظلام ونور يرتكز على وجوه الراوي والراويه.

الراوي: هو اسمه عماد

الراوي: وهي إسمها نعمه

الراوي: هو مدرس موسيقي

الراوي: وهي مدرسه تاريخ

عاشوا ف حلم جميل متحني بلون الفرحه جوه عيونهم هيه
بتحكي وهو يغني.

الراوي: تحكي حكاية شعب سجين بين قضبان عاش الأسر سنين
وسنين

لكن لسه وريده بينبض

لسه عيونه السمره بتحلم.. صامد حي ليوم الدين
وهو بيحضن عوده

وصوته يبهز قلوب الملايين

هو يغني وكل الناس بتغني وراه

جمع كل الناس حواليه

الراوي: والأطفال كانوا ضي عنيه

ما همه أملنا ف بكره وبعده

ع الإصرار والعزم اتواعدوا

واسمعوا صوتهم.. وأصل ليكوا؟

فتح عينك وأنت تشوفهم
افتح كل مسام إحساسك وأنت تحس برعشه
خوفهم اسمع.. حاول مره تشوفهم
تنتقل الإضاءه على نعمه وعماد وحوالهم بعض الأطفال
يتغنون بأغنيه فيها أمل وحماس..
هيلا هيلا هيلا ويالله
النصر قريب إن شالله
سمى وكبر قول بسم الله
فجر بركان الثرره صلاه
وارفع علمك وياذن الله
النصر قريب إن شالله
هيلا هيلا وهيلا ويالله
النصر قريب إن شالله
بجهدك وعزمك وبيديك
وبدمك وبدم شهيدك
حتحرر أرضك ونشيدك
يعلا للفض وبعون الله

النصر قريب إن شالله

هילה هيله وهيله ويالله

النصر قريب إن شالله

ضم صفوفك وحد صوتك

أرضك عرضك همه وجودك

وامسك إيد طه يا عبد الله

هילה هيله وهيله يالله

النصر قريب إن شالله

بعد انتهاء الأغنية يقتحم اليهود المكان مره أخرى في ضيق واضح.

يهودي ١: اسمحوا لنا نعرض على الأغنية.

صوت: ليس من حقكم الاعتراض أو توجيه أي نقد.

يهودي: نحن شركاء.

صوت: شركاء! في إيه بالضبط؟!

في المسرح.. المسرحيه.. العرض.. والأغنية

صوت: مهاترات وافتراءات كالعادة

صوت: يا سادة المسرحيه دي مسرحيتنا إحنا أصحاب الفكره

والأشعار والأغنيات.

اليهودي: آه بس انتم نسيتم إن ييه اتفاقيات.

الراوي: إيه؟ اتفاقيات يضحك . أبوك السقامات انتم اللي بتتكلموا
عن الإتفاقيات من إمتى احترمتوا اتفاقيه ولا حافظتم على
عهد.

يهودي: بحاولوا توصلوا للناس إيه بالضبط؟

الراوي: بنحاول نخلق جيل جديد يحافظ على أرضه وذاكرته وعلى
وعيه.

يهودي: آه يعني إرهابيين جدد لمستقبل.

الراوي: الإرهاب ده انتوا اللي تعرفوه وخلقتموه وصورتوه لكل
الدنيا بشركم وشرعكم اللي لا بيراعي حقوق ولا دين ولا
شرع.

صوت: ما تحاولش معاهم هم بيحاولوا يعطلونا ويضعفونا
ويصرفونا عن واجبنا.

الراوي: بالضبط كدد واصلوا العرض ولا تلتفتوا لهم، «يواصلون
العرض وينكمش اليهود في ركن مظلم» مره أخرى، نرجع
تاني لحكايتنا.

حكاية عماد ونعمه

في كل بيت ألم والآلام أشكال مره بنشوفها ومره بنداريها
ومره بتلاقي نفسنا جواها.

تدور الآه وإحنا معاها

كان الحب جناح بيرفر ف على قلبين

الراوي: بس الدمعه كانت جوه عيونهم ترسم طعم الحزن في نظرة
في همسه في كلمه.

أصل عماد كان نفسه ف عيل يحمل اسمه وشكل ملامحه
بيكي يضحك يصرخ يجري يملا البيت بشقاوته حياه كان ده
أملهم هو ونعمه.

بس ظروفهم كانت صعبة أصل الخلفة ما هياش لعبة.

الراوي: وقالوا زمان أن الولد بيكون سند وولد يقلب الموازين
ويخلي للدنيا شكل وطعم ولون.

فرع يفرع من جذر ثابت ويمد في الأرض لسابع أرض
ويكون له وجود ويكمل باقي المشوار.

الراوي: ولد يقلب الموازين.

الراوي: ولد يقلب الموازين

يتحرك الرواه وتدخل نعمه وعماد في دائره الضوء.

نعمه: عماد

عماد: نعم

نعمه: فيه إيه يا عماد مالك؟ بتهرب منِّي ليه؟

عماد: ما فيش حاجة يا نعمه وبعدين الهروب مش من طبعي يا نعمه.

نعمه: جراك إيه؟ على طول سرحان إيه اللي شاغللك

عماد: انت اللي منعيره وعنيكي حيرانه ومكسوره.. إيه اللي شاغللك انت .

نعمه: نفس اللي شاغللك يا عماد

عماد: إيه بس اللي شاعلني يا نعمه

نعمه: نظره حزن غربيه في عينيك بتبوح بسر- وحيرتك وانت في وسط العيال في المدرسه.

عماد: قصدك إيه؟

نعمه: الخلفه يا عماد.. قالنا سنين منتظرين

عماد: التحاليل والأطبا قالوا ما فيناش حاحه حنعمل إيه يعني حنعمل إيه؟

نعمه: طب إهدى شويه العصبية دي كلها ليه أنا معذوره محاصره والدتك بنظرانها' وأسألتها مش بتقدر أن الموضوع ده بيهز كياني وبيأثر عليه وفيه كمان، «يربت على ظهرها».

عماد: معلش يانعمه ما تزعلش منها طوَّلي بالك وارمي حمولك

على اللي خلقك.. تعالي يا نعمه.

«ينصرف عماد ونعمه وتنظهر مجموعه اليهود فرحين».

يهودي ١: هما فين.. أظن ما حدش هنا مشيوا تفتكر حد سامعنا.

يهودي ٢: لأ لأ ما أظنش

يهودي ١: سمعت بودانك حكاية جميله هأها رائعه تخيل العقم

يسود في كل مكان وفي كل شيء الفكر الابتكار الفنون

العلوم النسل الحسن كل شيء كى شيء.

ويجي اليوم اللي تبور فيه الأرض الفلسطينيه ولا يبقى فيها

لا أحياء ولا أموات.. ولا هوسه ولا ضجيج أصوات وتعود

لنا أرض المعاد.

يهودي ٢: هما راحوا فين.. ما فيش حد على خشبه المسرح فرصه

هايله 'لأن نقدم لكم يا ساده مسرحيه اسرائيليه عبقرية.

يهودي ١: أسألهم الأول يمكن يعترضوا أو يرفضوا.

يهودي ٢: قصدك الناس يعني ما اعتقدش لا فيه رفض ولا

اعتراض وحتى لو افترضنا فيه اعتراض كأن مفيش

اعتراض.. نقدم لكم يا ساده ويكل افتخار مسرحيه شعب

الله المختار إخراج موشي سملانسكي قدمت عام ١٨٩١

لرواد الصهاينه.

يجتمع مجدوعه اليهود ليشكلوا المنهد بسرعه.

يهودي ٣: آه... آه... الجوع معدتي خاويه

يهودي ٤: حفيت قدماي الأشواك تمشي بداخلها

يهودي ٣: عزيزي مل تقابلنا من قبل

حيهودي ٤: بعصبي ربما نتقابل بعد لحظات في الجحيم كيف اقابلك

وكل منا أتى من بلده مختلفه ولم أر وجهك غير الآن.

يهودي ٣: هون عيذك لقد جمع الألم بيننا

يهودي ٤: اغرب عن وجهي فالطريق ما زال طويلاً.

يهودي ٣: إلى أين وجهتك.

يهودي ٤: الاستيطان في يهودا والخليل.

يهودي ٣: والعرب

يهودي ٤: سنأخذنا منهم فالأمر سهل في البدايه نتسلى عليهم

بمشاكل وهميه ونماطل ونؤجل ونزعجهم بالغارات حتى

يرحلوا.

يهودي ٣: إلى أين؟

يهودي ٤: هذا شأنهم

يهودي ٣: دعنا نبقي هنا فقد أصبحنا أصدقاء فالجوع وقدماءك

الحافيتان يدعوننا للبقاء.

يهودي ٤: أنك أبله أنني أسير على حرير الحلم وبسط من الذهب
وهل سنعيش بمفردنا.

يهودي ٣: سنجعل هذه الأرض مركزاً لتجميع كل المهاجرين مع
معونات أصدقائنا وأسلحه الآخرين نكوّن مستوطنات في
كل مكان وتبقى أرض الميعاد «يضحكان بصوت عالي».

يهودي ٤: برافو برافو.. آه عذراً إذا لم تعجبكم.

«يدخل الممثلون فيعود اليهود لحدودهم متظاهرين بالبراءة».

صوت: خرجتم عن دوركم المرسوم خالفتكم كل أصول اللعبة.

يهودي: لعبه !.. هي دي لعبه

صوت: سنضطر لطردهم من خشبه المسرح

يهودي: نحن أغلبه لا نستطيع ما تقدرش

«يلتف اليهود ليقيموا الصلاه يدفعهم الممثلون ويسيطرون
مره أخري على المسرح مصاحباً لذلك حركه وموسيقى».

الراوي: عفوا يا ساده.. الآن بإمكانه أن نواصل العرض ونقدر
نكمّل مسرحيتنا ونحكي الحكايه

احكي وقول يا ولد

واحكي حكايه بلد

العزم فيها اتولد

وصبرها كان سند
وقت الوجع والآه
وسرى في ترابها الضيا
حفظت وجوه أنبيا
موسى وعيسى وضيا
طه حبيب الله
الراويہ: وعلى براق الهدى
أسرى النبي المهتدي
وصلى ونال الرضا
في المسجد الأقصى
بوركت يا أرضنا
يا مسامحه يا مؤمنه
يلي حملتي الضنا
والحمل يا ولداه
صرخه ألم في الخلا
كاس الأهات اتملا
يا مصاحبه قوله آه

الله عليك الله

«بعد الأبيات السابقة يلقي الضوء على عائله عماد ونعمه والأب والأم».

عماد: حصدنا المر والصبار

وعشنا الذل ليل ونهار هربتوا يابا ليه هربتوا وسبتوا الأرض ليه والدار.

سالم: لا ما هربناش ولا ضعفناش حاونا كثير ومقدرناش جيوش الظلم والجبروت وأعوانهم في كل مكان فرضت علينا الموت وعشنا دنيا محصوره ومعزوله وراء قضبان.

عماد: تقوم تهرب

راجيه: أبوك ماهر بشي م الميدان وقف ورفاقه وسط النار فلاحين طلبه وعمال وشيوخ وحريم وأطفال يخطوا بدمهم على أرضهم شهاده ميلاد ما بيحيش وبقاء محكوم عليه بالموت وإيه يعمل قليل الحيله ويا كلاب ينبحوا الكل ينبح وراهم يذبحوا والكل يذبح معاهم.

عماد: والعمل إيه؟ الحل فين...؟ نضيع؟ نموت؟

نعمه: لأن ندوب جبال الثلج وقوالب الشمع اللي حاصرتنا وفرضت علينا قانون اللاوعي واللاشعور.. نبعث ننتقض انتقاضه الروح والبدن والحجاره والصخور نقاومهم بكل

قوتنا وبكل عزيمة نقف وقفه واحده نصرخه صرخه واحده
نرفض الذل والهوان والخضوع ونقول لكل العالم أن
الحقوق ما بتضعش والأرض ما بترجعش إلا بالمقاومه
والمقاومه هي قرارنا والجهاد هو مشورنا.

عماد: فرقونا.

الأم راجيه: نتلم

عماد: شتونا

نعمه: نتجمع نتحد نللم حروفنا ونرفع سيف الحق ونكون جمله
صحيحه ومفيده نكتب الجمله صح مره واحده في حياتنا.

أول حروفها لأ

الأم: لأ للظلم لأ للضعف لأ للتهاون لأ للاستسلام لأ لأ لأ

نعمه: ملعون كل من لا يقول الحق

الجميع: ملعون كل من لا يقول الحق

ملعون كل من لا يقول الحق

أغنيه: ملعون العجز بأشكاله

ملعون الظلم وأعوانه

ملعون السجن وسجانه

لو يوم حيحاصر خطوتنا

ملعونه يا وعود كدابه

يا أفاعي يا صقور يا دياه

يا وشوش خداعه وقلابه

خدنا قرارنا ودي كلمتنا

ملعون الضعف اللي أسرنا

ملعون الصمت اللي حاصرنا

ملعون الخوف لو يجبرنا

بايدنا نكتف ثورتنا

ملعون - ملعون - ملعون

«تغير الإضاءه لتناسب جو منزل الأسره الأب سالم يجلس
في شبه ظلام وفي يده خطاب يقرأ في الخفاء تدخل راجيه».

راجيه: إيه يا سالم فيه إيه وإيه اللي ف إيدك.

سالم: ما فيش حاجه يا راجيه إيه ده ما تقولي حاجه وانت داخله
تكحي تخبطي على الباب أي حاجه.

راجيه: طب إيه اللي بتقراه؟

سالم: جواب جواب يا راجيه

راجيه: جواب والنبي صحيح جواب من مين من محمد من عمر

سالم: لأ لأ ده من أمين ابنك

راجيه: بيقول إيه فيه؟ كويس تعبان جعان بردان شعبن ما تقول

سالم: حاضر يا ستي كويس والله

راجيه: باعت فلوس

سالم: مش كتير حاكم الواد أمين ده حظه قليل ورزقه قليل المهم
بيسلم علينا كلنا.

راجيه: ياه.. العيال وحشوني قوي يا سالم ويا عالم حشوفهم إمتى
وإزاي سنين متغربين يا كبداهم في بلاد الله لا بنشوفهم
ولا بنظمن عليهم يرضي مين ده يا رب...

سالم: سيبك بقى من الكلام ده ما تقلبش عينا المواجه
راجيه: يعني قالك إنه راجع..

إن شالله وبيبوس إديكي

سالم: ويسأل عن أخوه عماد وبيقول يا ترى عماد جاله الولد ولا
لسه ما أنش الأوان .

سالم: لسه والله يا بني باين لسه مأنش الأوان

راجيه: يوه يا حاج ما تقولش كده على مهلهم

سالم: يعني حنسيه كده مهموم وحيران الود تعبان تعبان يا راجيه

راجيه: مالکش صالح بيه ربنا يسعده هو وعراته ويهنيهم بيحبوا

بعض يا حاج والنبي ما تكسر بخاطرهم وبكره ربنا يكرمهم
بالخلفه الصالحه يارب.

سالم: بس أكيد هيه عارفه أن العيب منها

راجيه: منها ولا منه ما حدش عارف سيهم ف حالهم

سالم: ازای اسیبهم عماد ده ایبنی فرع من جذری لأزم أفرح بیه
وبعیاله وانا مخلف أورطه وهو لازم یكون طالعلى .. شوفی
بلغیهم قدامهم مهله شهر وإلا حیكون لى تصرف تانى
ینصرف

راجيه: یا حاج

سالم: ده آخر كلامى.

یدخل ویظهر الیهود وهم فرحون بهذا الحزن وهذه المشكله
التي تؤرق الأسره ويرقصون ویغنون

أغنیه: شعللى والمعنى واطفى وولعى

زیدی زیدی یانار خلیها دمار

امنحی وامنعی وارفضی واسمعی

واملیها جفاف أضعاف أضعاف

والضعف یسود فیسود أنصاف

والفرع إن مات الجذر یموت

وإن جه مولود حيكون موؤود

حيموت حيموت

ولافيه مين شاف ولا فيه درى

شعللى والمعى واطفى وولعى

زیدی زیدی يانار خليها دمار

امتحى و'منعى وارفضى واسمعى

شعللى شعللى شعللى شعللى

«ينصرفون وصوت الأتددام يظهر ويدور حوار بين الأم وعماد ونعمه لإقناعها بالنزول في بحر أيوب للتبارك وحل عقده الحمل»

نعمه: ياخالتي النى بتطلبية ده صعب قوى يستحيل

راجيه: مش صعب ولا حاجه الموضوع مش مستحمل تأجيل ويعنى الأطباء كانوا عملوا ايه

نعمه: نقوم نلجأ للدجل والخرافه

عماد: يانعمه المطلوب شئ سهل ما تكبريش لموضوع

نعمه انت اللى بتقول كده ياعماد جراك ايه؟ حاجه غريبه والله

راجيه: يابنتى لازم نخبط عى كل باب جايز ربنا يجيب الفرح والعلاج واجب

نعمه: العلاج يا خالتى مش العادات والخرافات هى اللى حتحل المشكله.

راجيه: يابنتى ده بحر مبارك بحر أيوب بس اللى يصبر لازم ينول ودى عاده مش خرافه..

نعمه: لأ لا يا خالتى

عماد: يانعمه إحنا عملنا اللى ف وسعنا ومش عارفين نعمل ايه؟

نعمه: لأ يا عماد إحنا عارفين بس إحنا اللى مش عايزين رافضين خايفين من جوانا نجيب عيل يشوف اللى بشوفه يشيل حمل الماضى ولا يلاقىش حاضر والمستقبل فى علم الله يا عالم حيحصل فيه ايه.

حزبيه ازاي وحنواجهه ازاي وحنقوله ايه؟

حزضعه عكاره ونشر به ميه مسمومه ويتنفس هوا فاسد اللى حيحصل إننا حنسجنه فى حضننا وحنخنقه بحلم مش عارفين نحققه مش حتعرف تغنيه ولا حعرف احكى به. علشان كده مش عايزين رافضين خايفين هى دى الحقيقه هى دى الحقيقه .

سالم: ايه الحكاياه لأ مش حقيقه الحقيقه ان الست اللى تكون عاقر تتعالج ومش عيب لو دورت على العلاج فى كل بلاد الله.

راجيه: يا حاج ليه الكلام ده..

نعمه: سبيه يا خالتى أنا مش عاقر يا حاج بصوا حواليكوا وانتوا تعرفوا مين اللى عاقر.

الأرض هيه اللى صابها العقم والجفاف اسألوا الأرض الشراقي ايه
اللى صابها. الأرض عشان تنبت لازم تتسمد وترتوى بجهد وعرق
وعزم الرجال.

يا إما تشقق والجذر يموت
أرضكم هيه اللى عاقر مش أنا
أرضكم هيه اللى عاقر مش أنا
ومنين حيجي الولد تكنش فاكر 'نه حيجي فارس همام ويعيد لنا
زمن الفرسان.

عماد: نعمه جراك إيه؟ إسكتي
نعمه: لأمش حسكت
فى زمان العجز واليأس والقهر ما بيحبش فرسان لما الجبن يبقى
وسام.
لما سيوف الحق تنام بتحرن الخيل ويهرب الفرسان حنجييه فى زمن
جبان ملعون.

العدل فيه سجان
والحق فيه بهتان
والظلم فيه سلطان
والملك فيه طغيان

بنهرب من زمن لزمن ومن أرض لأرض ومن موت لموت كرهنا
صمتنا المكشوف زهقتنا من ليالى الخوف ءادمنا النعوش والموت.

منين حيجى الولد منين حيجى الولد منين حيجى الولد
«تبكى نعمه وتنصرف وينصرف الجميع فى حزن ورائها»
نستمع لأصوات نقاش يدور بين الآسره فى محاوله إقناع 'نعمه
لنزول البحر.

راجيه: سبع مرات يابنتى زى م
بيقولوا ونزول البحر طهر يانعمه
نعمه: أنا ما اذيتش يا خالتي

راجيه: يابنتى

نعمه: البحر ما بقاش بحرنا دنسوه وغيروا لونه وطعمه وشكله
بحرهم غدار والميه نجسه وموجههم مالهش أمان.

عماد: يلا يانعمه .. يهديكى يانعمه.

عماد: عشان خاطرى يانعمه.

الأم راجيه: ربنا يكرمكم يا ولاد بحق جاه النبى يارب «يمكن أن
يصاحب بعد هذا الحوار موسيقى تتصاعد وتحمل معانى الصبر والكرم
وأيوب»

أغنيه: يانا تسه يا أيوب

توبنا اتملا بذنوب
وصبرنا على المكتوب
صبر النبي أيوب
ياناعسه يا أيوب
الطهر لونه اختفى
والصدق أصبح جفا
مين اللّٰى خان السور
بدل آيات الوفا
وكتب حروف اسمنا
يا امايه بالمقلوب
ياناعسه يا أيوب
يا شط بحر العجب
موجك ده ولا لهب
مين فينا كان السبب
وبحق جاه النبي
ضى ونجمه وصبى
جلل النبي أيوب

ياناعسه يا أيوب

نعمه: خايفه يا عماد

عماد: ما تخشيش

نعمه: الميه متعكره..

عماد: إغطسى الأوله

خدى نفس واغطسى الثانيه

نعمه: مش قادره الثالثه

نعمه: روحى رايحه الرابعه

عماد: كمان مره الخامسه

نعمه: البحر مش بحرنا طلعونى

عماد: الخامسه

نعمه: مش طايقه

عماد: السادسه

نعمه: خرجونى حموت خرجونى خرجونى

«تصرخ صراخاً عالياً مع تصاعد الموسيقى وتغير الإضاءات»

منزل الأسرد وسالم أمام العشاء ويتحدث لراجيه

سالم: فين العيال ياراجيه حتعشى لوحدى

راجيه: طيب حاضر....

سالم: البنت عامله ايه دلوقت كانت تعبانه قوى؟

راجيه: ياكبدى يابنتى بس الحمد لله دلوقت احسن ح اقوم اندهم
يا عماد يانعمه.. تعالوا يا اولاد

يظهر عماد وهو يسند نعمه ويبدو عليها إعياء شديد
عماد: تعالى يانعمه.. ارفعى راسك يا حبيبتي ما توطيش.

نعمه: خايفه أقع

عماد: لأما تخافيش كلنا جنبك إسندى ظهرك

راجيه: عامله ايه يابنتى دلوقت

نعمه: كويسه يا خالتي الحمد لله

سالم: حمد لله على سلامتكم يانعمه يابنتى إنتى غاليه علينا كلنا
وعرفنا غلاوتك عندنا.

«عماد ونعمه يتحدثان بصوت منخفض»

سالم: ياه يا ولا انتوا بتتكلموا ف ايه

عماد: ابدا يابا دى كلمات لحن جديد

راجيه: كلماته بتقول ايه ياعماد يابنى والنبي تسمعنا.

عماد: اغلى كلام يا امه.

وأحني معاني يابا

سالم: عن إيه؟

عماد: عن القدس

راجيه: القدس.. يا سلام

عماد: الحلم يابا.

سالم: أجمل حلم ياعماد.. اجهزوا يا ولاد

راجيه: لإيه يا حاج

سالم: للقدس ياراجيه

الحلم والضروره حنروح نصلى فى الأقصى

نعمه: والمعابر والتصاريح والحصار والتفتيش

سالم: ما تخافش ما تخافيش ربنا حيوفقنا ويقويننا ويسهلنا ده احنا

رايحين نشكى له وندق على بابيه

نعمه: الأقصى

عماد: الأقصى

الأم: الأقصى

الجميع: يارب نصلى فى رحابه يارب نصلى فى رحابه مشهدين

معاناه الأسره في رحلتها إلى القدس بين المعابر ونقاط التفتيش وتبين

وحشيه المعامله من قبل اليهود ويمكن أن تسنحدم طريقه تكتيكيه
لتضخيم أجساد اليهود وتصور أقدامهم وكأنها قضبان تحيط بالأسره
وهم يقفون كموانع حديديه وتصاحب هذه امشاهد تلك الأغنيه
التعبيريه.

أغنيه: ممنوع الحلم ماتحلمش

ممنوع الحرف ما تنطقشى

ممنوعه الكلمه بمعانيها

ممنوعه الخطوه تخطيها

ضلك غربه ومسجون فيها

ممنوع.. ممنوع.. ممنوع

ممنوع الهمس ما تهمشى

ممنوع اللمس ما تلمشى

ممنوعه الآه لو تتألم

ممنوع تنطق أو تتكلم

ارمى سلاحك واركع سلم

«يظهر أفراد الأسره وعلى وجوههم الإعياء والإرهاق وقد وصلوا
قرب المسجد الأقصى ويتصادف وجودهم اقتحام شارون المسجد
والصراع الذى دار بين الجانبين ينطلق مجموعه على المنسرح فى معركه

بالحجاره وصوت طلقات النار تتفرق الأسره وكأنها تبحث عن أفرادها
وسط هذا الهياج ومراسى الأنباء يظهرون على المسرح وكأنهم ينقلون
الحدث»

مراسل ١: أحييكم من أمام المسجد الأقصى حيث تستمر قوات
الإحتلال فى إطلاق الرصاص على جموع المصلين ومنعهم من الصلاه
ومن الواضح أن الموقف يزداد سوءاً وسوف يزداد تعقيدا مع تحيات
وليد العشرى من رام الله.

مراسل: سيداتى سادتى اسؤال الذى يتبادر إلى الذهن لماذا يقتحم
شارون المسجد الأقصى فى هذا الوقت بالذات هل سيصعد الموقف
ويثير الغضب لعام.

يشند القصف يهرع الجميع ويظهر فى الصورة طفل مع أبيه يختبئان
من القصف خلف حجر كبير والطفل يمسك بحجر صغير فى يده يركز
جنود الإحتلال فوهات بنادقهم على انصبى يصرخ الأب وهذا هو
مشهد استشهاد محمد الدره.

صوت: بلاش بلاش الوله

الولد معايا.. حاسبوا.. حاسب.

مات الوله مات الوله.

موسيقى تصويره مصاحبه لحركات تعبيريه على المسرح تصور
بشاعه الإحساس بالقهر والظلم.. والكل يجتمع حول الطفل ووالده
يسير الأب فى شبه ذهول ويردد مرتين.

صوت: لما ندانى الوله

أنا قلت يا ولدى

وبصرخه شق السما

طرح النهار بلدى

حضنت كفوفه الحجر

وكأنه ماسك قمر

نور في ليل بلدى

انا قلت لجل الوطن

ولدى ده مهر وثمان

وتعيشى يا بلدى

«ينصرف الأب والطفل الشهيد مع مجموعه من المحتشدين وتبقى
الأسره وبعض الأشخاص...»

«يمكن أن تكون الكلمات الآتية أغنيه مصاحبه لمشهد الحزن
والشهداء».

الرواي: يا ضمير الإنسانيه سكت ليه

إظهر وبان قول للجبان يرفع إيديه

وف أى مله وأى دين

هو احنا فين
يبقى القتيل هوو المدان
وف شرع مين
مخنوقه يا صرخه ألم
مالكيش نصير
هدم وحصار خسه ودمار
ولافيش ضمير
الراويہ: ملعون يا شرع الغاب
في كل كتاب ودين
نطق الحجر لما الضمير
قال مستقيل
ثوره طيور صحت
وريد الانفجار
حق ومصير شعب انتفض
تحت الحصار
مدفع سلاح قدام جناح
عصفور سجين

صرخه شهيد قالت

نشيد العدل فين

الراوى: يا ضمير العدل فين

سكت ليه

سكت ليه

سكت ليه

«تذهب الأسره لتصلى فى أحد الأركان فيحاصرهم الجنود ويؤدون الصلاة وفوق رؤوسهم فوهات البنادق وأرجل المحتلين وهم يقومون بالصلاه، يدور الحديث بين مجموعه من اليهود».

يهودى: رايحين فين ولين؟

سالم: عايزين نصلى وندعى رب العالمين ولاده كمان ممنوع حرام عليكموا.

يهودى: مافيش صلاه

عماد: إبعد إيدك أنت وهوه سبونا نصلى وحمشى على طول

يهودى: ممنوع صلاه إلا لشيوخ فقط ممكن إنت وهوه بس

سالم: وده يرضى مبن ده مكان مقدس لكل الأديان وكل إنسان حر فى عباداته وإقامه شعائره

يهودى: مش مضبوط.. إحنا بس اللى نقول مين يدخل ومين لأ ومش عايزين نضيع وقت يلاً صلوا قدامنا هنا..

«يصلى سالم وراجيه وبيتعد عماد ونعمه وهو ممسك بذراعها ويدور الحديث بين الجنود ابيهود».

يهودى ١: متطرفون.. إرهابيون.. سفاكون

يهودى ٢: إن الرب ليندم ألف مره فى اليوم لأنه خلق الفلسطينيين والعرب لابد أن نتسيد هذا العالم وتلك البقعه نحن أحق من أى شعب آخر..

يهودى ٣: لابد وأن نهيمن ونخضع الكل لسطوتنا فنحن أحب إلى الرب من الملائكه والقطب حاكم العالم خارج من بذرتنا وسنسيطر معا على كل أطراف الأرض

صوت: لن يحدث أبدا.. الأرض ليست إرثا لكم.. أنتم تحلمون تتوهمون وسيأتى اليوم الذى فيه تتساقطون ويتلاشى مجدكم الواهى القائم على الظلم والإعتداء والبعى والعدوان.

يهودى ١: مين أنت؟

صوت: إنسان له الحق فى القول والإعتراض والرفض فلسطينى!

يهودى ٢: يعنى عربى!

يهودى ٣: يعنى إرهابى

صوت: لأ إيجابى هارب من قيود السلبيه التى بتحاولوا تفرضوها على جيل بأكمله..

يهودى: لا اعتقد أنك لا تؤمن بما تقوله فأنت واضح أنك من جيل الشباب وعارف كويس أن بينا معاهده سلام وبيننا وبينكم إتفاقيات وعهود.. واشهدوا يا خلق أهو احنا نريد سلام وهم لأ..

صوت: السلام بقى واهن زى بيوت العنكبوت وخيوطه اللي نسجتوها حولنا.

الراوى: سلام.. ياسلام

لوع السلام مليون سلام

لو الحمام أسراب حمام

بس السلام بيتقى بأصول

مش ضحك ياب على الدقون

ولا قض مجلس والسلام

السلام يعنى المحبه

يعني قمحه فوقها قمحه

الراويه: يعنى بنت بطرحه

يعنى ضى ويعنى نور

مش مناجل شر قازحه

سارحه بتحش الجذور

السلام يعنى المصالحه

يعنى فرع من الأمان

خضرا جوه قلوب مسامحه

السلام يعنى البشاره

يعنى صفاره أمان

يعنى إيد على إيد تسلم

تنفتح كل البين

الراوى: هو ده معنى السلام

يلى خبيتوا المدافع

جوه ف براج الحمام

الروايه: يلى موئوا المعانى

لجل ما يموت الكلام

ملعون أبو اللى يسلم يوم عليكموا

يلى دابحين السلام

«يتهجمون على الشباب الواقف يشترك عماد ونعمه تقف بينهم

تحاول أن تتدخل بينهم يضربون الشباب بظهر بنادقهم ويلقونهم على

الأرض ويلتقون حول نعمه يقربون منها ويلقونها فيما بينهم وهى

صامده لاتتحرك بعينيه عزمه واصرار على الصمود ويحاول عماد أن
يدافع عنها ولا يقوى يتخاذل يضعف يستد على ذراع أبيه وأمه..
وينظر فى هلع إلى نعمه وهى محاصره».

يهودى ١: عنيده

يهودى ٢: عفيه

يهودى ٣: جميله

: عريه

يهودى ١: جريئه

يهودى ٢: لاتخشى شيئا

يهودى ٣: أنفاسها تتلاحق

يهودى ١: ماتت

يهودى ٢: حيه

يهودى ٣: متعبه

: سنريحها

«يدورون حولنا فى نهم مع مصاحبه موسيقى تتصاعد مع طبيعه
الحديث يقتربون منها ويمدون أذرعهم فى محو له لمس جسدها تظهر
نعمه الصمود والتحدى»

الروايه: آه ياقلبي كان ف جنبى

حلم جانبى من بعيد
ولحد دارك
بس بابك كان موارب
والعقارب والسنين شقين رحايه
وأنت مطحونه ف ادمايه
كان معايا ألف حلم وألف غايه
ميت مرايه
والوشوش هياحه هيه
والزوايا منتهيه
الراوى: والبدايه خط مايل
ف النهايه عبد شاييل
فوق كتافه
حمل ناطق بالحقيقه
والعيون ماتت بريئه
لما باعونا ف دقائق
والمظالم لبسها توب حقايق
والخرايق نهر جارى فوق دمايا
مين عليه ومين معايا

ألف ضفر وألف حافر
 مغروسين جوه ف حشايا
 وف بنوك الدم ضعنا
 لما بعنا دم أحمر حمر فاير
 واشترينا دم فاسد
 الروايه: والروافد هيه هيه
 والحكاية منتهيه
 واللى سايرع الجميع
 لابد يوم حيسير عليه
 على داير فوق خطوط انعرض حاير
 حلّى ياشمس الضفاير
 وابدريها ألف مره
 يلى خليت صوتى عوره
 الكلام ما لهوش مواسم
 يلى واشم فوق عروغى
 ألف دقه خوف كفايه
 الراوى: تهت يامايه ف طريقك

وف طريقك كان حريقى وكان حريقك

كنت واقفه وأنت شايفه

ريشى طاير من لهيبك

بس خوفك بل ريقك

قام طريقك خاف وحوّد عن طريقى

الروايه: أنت فاكرانى بحقيقى

ولاناسيه

الراوى: ألف صحه وألف عافيه

ترجمى لى بالاسلام

وف شرايبنى إالى ماتت

ترجمى لى دم وافر

حلم عاقر جوه منى

مستحيل البعد عنى

الروايه: قريبنى من عيونك

واسترينى بطرف توبك

واشترينى قبل ما يبيعوا اللى فاضل

«يرتفع صوت الأذان من المسجد الأقصى تحاط نعمه بهاله من النور

ويتراجع الجنود فى رهبه ورعب من هذا الصمود».

«وهذا المشهد مشهد فى منزل الأسره الكل مهموم وحزين وصوت
الرصاص يصل لمسامعهم يستمعون إلى طرق الباب تقوم الأم لتفتح».
راجيه: حسن أخويا خش يا حبيبي.. شفت اللي حصل لنا واللي
جرى لنا شفتنا الموت بعيننا.

حسن: الموت بنشوفه كل يوم ياراجيه "بتلفت حوله" فين عماد
ونعمه.

راجيه: كل واحد فيهم قاعد لوحده حالتهم لانسر عدو ولا حبيب.
يدخل «سالم»

سالم: أستاذ أنيس وحسن أهلا أهلا! إعملنا تاي يا راجيه واندهى
ع الولاد..

أنيس: عماد عماد فين يا حاج سالم عايز أكّمه..

سالم: نفسه مكسوره حاسس بانكسار مش راضى يكلم حد الموقف
كان صعب على أى حد ف مكانه

أنيس: بس مش لازم يستسلم.. الوقت ده لازم نكون كلنا مع بعض
آن الأوان نفوق من الوهم. الوهم سجن كبير مالوش قضبى ولا سجان
لازم نعيش الواقع والحلم والحقيقه.

حسن: ده لازم يحص يا أستاذ أنيس لازم نفرح بالتحول الإيجابى
والروح الجميله اللى سادت فى كل شبر عربى..

«تدخل نعمه»

سالم: يلا بينا يا راجيه نصلى المغرب ونسبهم مع الأولاد شويه بينا
ياحاج يارب النصر من عندك يارب.

نعمه: ما حدش حيرجع حقنا إلا أحنا يا أستاذ أنيس بإدينا وبإيد
ولادنا وولاد ولادنا.

أنيس: صح يانعمه إنت صح «يدخل عماد من الجانب الآخر وهو
حزين مهموم كسير» لا ياعماد ما أحبش أشوفك مهزوم ولا ضعيف
أنت أقوى من كده.. جواك بركان ثوره لازم تترجم مشاعرك أفكارك
وتحولهم سلاح فى وش عدوك يقاومه ويقضى عليه.

عماد: ده لو كان بإيديه أو يقدر عليه

نعمه: اللي ما يقدرش يعمل حاجه يبقى سلبى.. متواكل مش أنت

اللى حبيتك واخترتك شريك لحياتى

عماد: كانو كتير وأقوى منى

نعمه: أنت الأقوى.. لأنك صاحب حق.. لكن للأسف ساكت
صامت وصوت الظلم ما بيعلاش ويسود إلا لما صوت الحق بيضعف
ويموت.

«يتقابلان يحاول أن يهرب منها من نظراتها تسلط الأضواء عليهم
ويدور بينهم حديث وعتاب».

نعمه: كنت الحنان

كنت الأمان

كنت الندى

كنت الطريق اللي ابتدا

كنت الحروف كنت الشمس كنت الشجر

كنا بنسهر نقرا أحلامنا على ضى القمر

ويهزنا لحن الوتر

وتهزنا كلمه وطن

عماد: بس الحروف أتغيرت.. اتلونت.. واتبعثر والبحر خان كل

المراكب والشطوط بعدت وغابت فى العدم مين السب. «يهزها

أو يدور حولها» معرفشى مين.

نعمه: مين اللي شد القوس لصياد الأمل مين اللي حدد له الهدف.

عماد: مين اللي غيرف السور حدد براويز اللغه

نعمه: معرفش مين

عماد: ضى النهار ليه اختفى

مين اللي باعه ف الخفا.. مين اللي زيف حلمنا أنت وأنا أنامش

جدير بيكى يا نعمه ومش أنا الشاطر حسن أنا حرف منذور للسلاسل

والزلازل والعطش حرف منذور للسكون للموت لكرباج الحرس.

حرف متحاصر بقضبان التقهقر والتراجع والحرس للحصار للموت

لأثواب الكفن.

من أول الحرف النبى ولآخر الحرف العفن
أنا مش جدير بيكى يانعمه ومش أنا الشاطر حسن
أنا مش جدير بيكى يانعمه ومش أنا الشاطر حسن
«يهرع بالخروج وهو منفعل بيكى وتهم نعمه وراءه يناديها أ.
أنيس».

أنيس: سبيه يا نعمه تعالى يا بنتى هو محتاج يعيد حساباته ويتغلب
على ضعفه..

ياه يا نعمه فكرتيني لما كنت صغيره كنت شعله.. نشاط وثور
وعناد.. لسه زى ما أنت

نعمه: متهيألك يا أستاذ أنيس أنا كمان تعبت تعبت من المقاومه
وقوله الحق فى زمان فيه الحق اندبح بإدينا قبل أدين أعداءنا.

أنيس: لا يانعمه لأزم ييقى كل واحد منا قوى لأن القوى بتكون
مبادئه نابعه من جواه وإرادته هى اللى بتحكم وقراره بيكون بإيده.. أما
الإنسان الضعيف بيكون عبد لأفكار الغير ويمشى ورا إرادتهم.
هو ده حل المشكله.

«تنطلق أصوات وغناء يلهب مشاعر الناس وتصل إلى آذانهم
تصرخ نعمه».

كلمات عماد.. كتبها أمتى.. لحنها أمتى.. تعالوا يا أستاذ أنيس
خالى حسن سامعين.. عماد مع الناس ف وسط النار بيغنوا يا حبيبي

يا عماد ما كنش لأزّم أجرحه ولا تُشك في وطنيه وقدرته على المقاومه
إسمعوا الكلمات والحماس والأصرار.

أغنيّه: لبيك يا قدساه

نحن عباد الله

أقسمنا باسم الله

نحمي حمى الأقصى

سجل فهذا قرار

نحن جنود النار

سنهد ألف حصار

وسنشغل الأحجار

ونعيد بالإصرار

أرضنا لنا وديار

تبت يد الفجار

سجل فهذا قرار

نحن عباد الله

نابلس ورام الله

والناصره وصبرا

اقسمنا بسم الله
نحمى حمى الأقصى
شهداؤنا أحرار
وزئيرنا إعصار
وضلوعنا أسوار
وجميعنا ثوار
سجل فهذا قرار

«يدخل عماد يلقي بنعمه ونظرات الحب تحاصرها وكأنهم عرفوا
طريقهم الصحيح».

نعمه: شفت ياعماد الكلمة عملت أيه:

حسن: الناس كلهم ييغنوا ويرددوا كلماتها بكل عزم وقوه وإصرار
الكلمه أمانه يا أستاذ حسن والكلمه ضمير وحكمه وموقف أمه.

نعمه: وبالكلمه حنفضحهم مسموعه ومرئيه ف كتاب ف أغنيه

عماد: لازم نكشف تاريخهم زيفهم خداعهم قدام كل الناس

نعمه: ومش بالكلام بالإثبات والدليل بالعلم والمنطق وبالتاريخ اللى
زيقوه.

عماد: وحروفوه وزوروه.

حسن: تاريخهم كله مكتوب بإيدكهنه فى عصور الجهل والتخلف

وكل ديانتهم وكتبهم بتحضر على سفك الدماء والقتل والدمار
والخراب.

أنيس: تاريخهم يشهد ببشاعتهم مش بس مع البنى آدمين لم ينجو
من آذاهم حتى الرسل والأنبياء.

نعمه: يا أستاذ أنيس أنا خلاص أنا قررت أنى اشارك فى المقاومه
بتأليف كتاب.

حسن: عنهم

نعمه: طبعاً.. أصلهم.. فصلهم.. نسلهم.. خداعهم.. نذالتهم لازم
نكشفهم ونحاربهم بنفس سلاحهم نوصل كلمتنا لكل العالم اللى
صدقهم وانخدع فيهم.
«ينطفىء النور فجاء»

نعمه: ودى برضه طريقتهم ينطفىء النور علشان ما تتكلمش وصوتنا
ما يوصلش لكن خلاص مش حسكت أبداً بعد النهارده حاكتب
وأقول مش حسكت أبداً.. كرهت السكون والضعف والعجز كرهت
السجون والمخبرين والأسوار كرهت الحصار وصوت الحرس كرهت
الحزن وصوت الرصاص كرهت البارود وكرهت المقايضه كرهت
العهود جنون القنابل صليل السلاسل وبرء السجون وح اكتب
واقول.. حقول.. لازم نكون لازم نكون لازم نكون.

«ينصرفون ويدخل اليهود وليصبحوا فى دائره الضوء».

يهودى ١: مجنونه فاكهه لوحدها حثقدر تعمل حاجه.

يهودى ٢: أعداء الساميه المجرمين بيحاولو 'يفضحونا

يهودى ٣: ما تخافشى مش حيقدر 'يعملوا أى حاجه وزى ما أنت شايف كل واحد لوحده.. وهنا نقطه ضعفهم.. إحنا مجندين كل الدنيا لخدمه أهدافنا وزى ما أنت عارف كلهم أصبحوا أبواق وحناجر أقصد العرب لكن فعل صعب صعب جداً.

يهودى ١: يعنى تعتقد أننا نجحنا فى تشتيت شملهم وتفريق كلمتهم طبعاً.. ده أكيد.. بس المهم أننا نواصل تكتيفهم وتكميمهم مش لازم الكتاب ده ينكتب ولا يترجم لازم ندبح حروفه من قبل ما تتنفس.

يهودى ٣: فعلاً والبنت دى لازم تستلم تسكت خالص عنيده..

يهودى ١: نكسر عندها.. نزلها نبعداها عن كل الناس نسجنها نسجلها نجنتها المهم لازم تسكت تسكت وللأبد..

«يدخل أو ينضم إليهم بعض الجنود ويمسكون العصا بأيديهم ويقومون بقرع العصا على الأرض فى دائره شيطانيه وحركات هستيريه».

أغنيه: سكوت سكوت سكوت

مش عايزين نسمع صوت

ومصير الكلمه الموت

جدران منازلکوا حدود

والأرض ضريح وتابوت

غرقان فى ذهول وسکوت

«سکوت لیلی شبه إضاءه على نعمه وهى جالسه فى حاله انهماك فى الكتابه وإرسال أخبار لوكالات الأنباء العلمیه فجاء یقتحم علیها الغرفه أشباح أربعه یشلون حركتها الآخرون یلملون الأوراق ویتقاذفونها فیما بینهم یدخل عمد على هذا المشهد الحرکی یتتهى المشهد بقتل واحد منهم دفاعا عن نعمه وعن شرفه وعرضه ویختفی عمادوسط ذهولهم».. «هذا المشهد یمكن أن یتیم عن صریق التعبير الحرکی والموسیقی».

یهودی ١: موتوه الإرهابین

یهودی ٢: غدر وخیانه..

یهودی ٣: كنا بنلعب مجرد لعبه یقومو یقلبوها جدشایفین.. شاهدین.. مش كانت مجرد لعبه ساکتین لیه.. حتشهدوا معنا مش كده لازم تشهدوا لازم تشهدوا معنا.

«تدخل الأم على نعمه وهى فى حاله قلق وغلیان».

راجیه: أهدى یابنتى ما تعملیش فى روحك كده.

نعمه: فى شرع مین یقتحموا البیوت ویهتكو سترها ویهددونا لغایه

أمتى.. لغايه أمتى.. وعماد عماد يا خالتي راح غين بيدوروا عليه فى كل
حته

بقاله كام يوم لاحس ولا خبر

راجيه: خلاص يا نعمه عماد عرف طريقه وبدأه ومحدثش حيقدر
يرجعه خايفه عليه خايفه قوى خايفه يا خالتي

راجيه: لأ يا بنتى أنا فرحانه بيه ورفاقه الى زيه فكرونا بأيام زمان
ورجعوا الحلم والجهاد والمقاومه صحونا..

نعمه: معقول يا خالتي الحلم ممكن لسه جونا حى؟

راجيه: طبعا حى الحلم عمره ما يموت يانعمه مالوش وطن إلا فى
قلوب الناس.

«يدخل ساله الأب فى حاله ضجر».

نعمه: مش مهم ياعمى الاخبار المهم أن البلد اتملت ثوار معاهم
شمس بكره الجاى.

«صوت المذيع ينطق بإعلان عمليه استشهاديه فلسطينيه يستمع
الجميع ثم يهتفون».

الجميع: الله أكبر.. الله أكبر

راجيه: يحميك يا ولدى ويحرسك أنت و لجدعان يارب ساعدهم
يارب "تبكى"

سالم: بس ياراجيه ما تخافيش ربنا معاهم.

«يدق الباب ويدخل المنزل اليهود الأربعة» يقومون بنفتيش المنزل وجمع كل ما يصل إليهم أيديهم ويوجهون حديثهم لنعمه».

يهودى ١: أنت تعالى.. قربي.. بلاش كلام كثير، أحسن لك وللجميع ما فيش اتصالات ولا كتاه ولا تصوير ولا همسه ولا حرف.

نعمه: ومين قال أنى همس أنا حضرخ وبعلو صوتى.

نعمه: ما عدناش نخاف منكم . أنتم بترتجفوا قدم عيون طفل ماسك فى ايد حجر.. بتصغروا فى عيون كل لدنيا وهى بيكبر بيكبر أكبر مما تتصوروا.. بترعبوا بترتعشوا وهو يقابل رصاصكم وقنابلكم ببسمه جرح وبضحكه ألم حتى لو مات بتفض عيونه مفتحه رافضه تغمض عن الظلم تانى..

يهودى: أخرسى.. أخرسى

راجيه: هى البيوت عندكم ملهاش حرمة اطلعوا بره لبيت نجستوه دنستوه عايزين منا إيه . ربنا يهد حيلكم يابعدا.

يهودى ١: فين عماد إتكلّموا مش حنمشي إلا لما ناخده مسانا محكوم عليه بالموت زى ما قتل واحد منا..

يهودى: مافيش حاجة

يهودى: مافيش حاجة

راجعين لكم تانى مش حنسيكم
يهودى: وأنت لو ما تعلمتيشى من الدرس الأول ممكن يبتقى فيه
دروس تانيه..

كفى عن المقاومة.. الحلم الصهيونى تحقق معظمه ومهما كتبت مش
حيصدقك حد العالم كله ملك قبضتنا.

نعمه: واهم واهم جدا بكره العالم كله حيعرف أجرامكم ولكم يوم
قريب والكل حيرفضكم ويطاردكم.. آه...
«يضحك باستهزاء».

يهودى: تقصدى الشجرة اللى حتنادى وتقولكم ورايا يهودى ممكن
يكون ده صحيح..

بس يامدرسة التاريخ مش فى زماننا ده

لاحنا اليهود اللى حيكونوا وراء الشجرة ولا أنتم بحالتكم دى اللى
حتحاربونا هأهؤ.. واستنوا بقى الفرع نكون إحنا خلاص رسمنا الحدود
وشكلنا العالم كله زى ما حلمنا بيقول سنسود سنسود سنسود.

«يضحكون وينصرفون وبعد قليل تستمع الأسره لصوت من ينظر
الأب سالم من النافذه».

سالم: يادى الخراب سحاب حريق القدس وصلنا دخان أطف
يارب.

راجيه: الأيام كلها شبه بعض بس فيه حاجه جديده روح جديده
إحساس جديد يا حاج حلو قوى.

نعمه: أدور على عماد في أي مكان لازم لآقيه أكون جنبه لازم
نتحرك الكل لازم يتحرك..

«يسمعون طرقا ويدخل حسن والأستاذ أنيس» «حسن مجروح
ويستند على أنيس».

أنيس: وسعوا سكه وسعوا سكه إرتاح يا حسن أقعد هنا هاتوا شاش
وقطن يا نعمه بسرعه.

راجيه: أخويا.. يا ضناي يا حبيبي فيك إيه جراك إيه؟ إيه اللي
حصل.

أنيس: يا تخافيش يا حاجه نشان جاله على كتفه وسام.

سالم: فيك إيه يا حسن إحكي لي يا خوي أنت بخير.

حسن: بخير يا سالم هو أنا حكون أغلى من العيال والشباب اللي
باعوا أرواحهم عشان يفدوا الأرض والعرض الموت مش مهم ما أحنا
ميتين ميتين يبقى على الأقل نموت بشرف.

سالم: بعد الشر عليك يا حسن

نعمه: أستاذ أنيس ماشفتوش عماد

أنيس: سيرته على كل لسان ف وسط النار والبارود والدخان يبقاوم
وبيغنى كلماته وأغانيه بتلهب الحماس واقف إيده في أيدهم وبصدره
بيحمي ظهورهم ربنا معاهم.

نعمه: هاتى الشال يا خالتى لأزم أروح له.

راجيه: يابنتى الدنيا جحيم بره

نعمه: مش مهم

راجيه: ثوبك مقطوع

نعمه: شالك حيداريه يا خالتى.

مشهد مطارده للجنود اليهود للفدائيين وعن عماد وسط تشكيلات
مره يندس بين الشباب والشيوخ فى مسيرتهم ويقومون بتهريبه وسط
كلمات حماسيه.

أغنيه: إرفع.. علمك صوتك رايتك

واحمى أرضك طينك عرضك

واحرس قرآنك إنجيلك قدسك دينك فينك.

واصل قاوم واثبت حاول واوعى تساوم فتح عينك

بص شمالك.. بص يمينك

حرص واوع تضاطى جبينك

تبت فى جذورك بضوافرك

واوع تفرط

وحد صفك

فينك

«ينطق عماد وسط هذه المجموعه يلتف حواه الأطفال وهم يتغنون
بأغنيه ويقف فى وسطهم.. والجنود اليهود يبحثون عنه».

أغنيه: توت توت

توت توت توت

طق بغيظك فرقع موت

يا استعمار أمشى بقى وغور

وسع سكه لضى النور

العصفور أهو عدى السور

ولا حيخاف ولا يوم حيسلم

ولا حيصدق أى وعود

توت توت

الأرض بتولد أحرار

جوه قلوبهم ثورد ونار

حالفين يوم ياخدوا بالثار

م الظالم أبو قلب جحدود

مش حتعيش بينا ولا تسود

توت توت

طق بغيظك فرقع موت
جابهوا مدافع ويا بارود
والندل عليهم بيجود
شافوا الحجر النبی بيصلى
فى عيون طفل برى مولود
هرب الديك خاف من الكتكوت
توت توت

توت توت توت توت
طق بغيظك فرقع موت

«يهرب عماد من الحصار ويتقابل مع نعمه فى مشهد رقيق وبعيدا
عن الأعين ويمكن أن يتم إظلام المسرح ويحدث تكثيف للضوء على
وجه نعمه وعماد».

نعمه: عماد

عماد: نعمت

نعمه: وحشتنى

عماد: وحشتينى

ليه الخوف اللى ف عنيكى والعرشه اللى ف اديكى

نعمه: خايفه عليك

عماد: اوعى تخافى الكلمه دى كرهتها لازد نغيتها من قاموس حياتنا.

نعمه: أنا فرحانه بيك.. أتغيرت

عماد: رجعت فُتت تنفضت زى الأرض م انتفضت وفجرت الزلازل والبراكين اللى جوانا.

نعمه: راجع إمتى لينا

عماد: ده احنا لسه يادوب ابتدينا

نعمه: وحلم الولاد

عماد: الأرض ولدت لنا آلاف الأولادهم ملنا يانعمه يعنى مش بتفكر.

«يضع يده على فمها»

أوعى تكملى أنا مش ممكن أستغنى عنك ولا كان ممكن أفرط فيكى أنت وجودى وامتدادى.. وحياتى يانعمه.

«يسمعون وقع أقدام اليهود ويكن أن تنشر الأضاءه على المسرح كله يفترقان وقبل أن يترك يدها».

نعمه: عماد عماد أنا حامل يا عماد.. حلمنا حيتحقق وفرعنا حيفرع لفروع ياعماد جاى الولد ياعماد.

عماد: خلى بالك من نفسك وسلامى للجميع

الراوى: ضى النهار

ماحدث يقدر يمنعه

الروايه: وصوت الحق لو ينطلق

الكل لازم يسمعه

الراوى: وقف عماد وسط الولاد

والرصاص والبارود

وصرخ بعزم الصوت

يانعيش سوا يانموت

والموت ماهوش بالجوع

والعيشه مش بالقوت

عمر الخلاص ما يكون

فى طريق ضلام مسدود

شرك الضلال منصوب

علشان تبات مغلوب

بيكتفوك بالقوت

وبيضربوا المربوط

علشان تخاف وتموت

الرواية: بعنا آمال ونفوس

علشان رغيف وغموس

وصبحنا يا ولداه

بين فك ديب ولصوصر

زندك ما مدام موجود

إياك تميل ع الغير

وحرّس من التعبان

وده قرصته والموت

وإياك تعيش فى الكون

موجود ومش موجود

وزعق بعزم الصوت

الرواي: يانعش سوايا يانموت

الراوى: قوم ياوطن هز الهلال

قوم يا وطن هز الهلال

قوم هد قضبان المحال

حل الضفاير ياوطن

وإياك تقول تعظيم سلام

للإنكسار والإنهزام
آه يا وطن ده أنا فيك بموت
آه يا وطن لو يوم تعود
الروايه: قوم يا وطن واصحى بقى ولا التنا
مكتوب عليك م الأوله اليوم الخلود
قوم عيد حساب المسأله
واحسبها.. صحصح يا وله
قوم على صوتك للسمما
قول اللى باعك يا وطن
ده ماكنش أنا
أنا مش جبان ولانيش
نبات شيطاني سارح بالجحود
يلا يا شمس اتسرسبي
بين العروق واروى الشراقي والشقوق
اللى حفرها الخوف على جبين الشروق
الراوي: قول السلام
عمره ما كان

معناه تراجع ولاً خوف

الروايه: ولا يوم ما طيرنا الحمام

كان قصدنا نغضى على

صك لمبايعه ولاً موت

أو مذله ولاً خوف

معا: قوم ياوطن أصحى وفوق

حط النقط فوق الحروف

حط النقط فوق الحروف

«مشهد لمنزل الأسره سالم وراجيه يبدو عليهما القلق».

راجيه: صوت الرصاص زى المطر والدخان فى كل مكان

ياترى الأولاد فين وشباب البلد مين مات مين انجرح من لسه حى.

إحرسهم يارب يارب

سالم: ربنا يستر ياراجيه الباب افتحى بسرعه يمكن يكون فيه أخبار.

«دقات سريعه يدخل حسن... بسرعه»

سالم: افتحى ياراجيه

راجيه: حسن حسن ياخويا

حسن: اوعى الرصاص حيطول رقبتى

راجيه: فين الأولاد يا حسن بخير ورحمة أبوك تقوللي

حسن: بخير ياراجيه بخير

إستنوا لما آخذ نفسي ياساتر..

الإنفاضه يا سالم بقت حرب ياسالم معركة مش متكافئه دبابات
وطيارات وجيوش بيواجههم شباب وأطفال بحجاره وخرطوش..
وحوش يا عالم ضد طيور ما فيش عدل.. ما فيش حق ما فيش ضمير

سالم: والجرحى كثير؟

حسن: كثير المشكله العلاج والأدويه ما نعين المجرمين أى معونه
تصل خلال احدود..

ربنا موجود.. اللي بيحصل ده ضد الإنسانيه وحقوق الإنسان وكل
شىء..

بس يا راجيه العيال واقفين زى الأسود بيقابلوا الرصاص
بصدروهم واللى بيسقط منهم بيقوم بداله عشره وكأن الأرض بتنشق
وتطرح زرع مفرع لا بيدبل ولا يموت الله أكبر انصرنا يارب.

«دقات أخرى على الباب وأصوات ضجيج تدخل نعمه وحولها
تلاميذها وبعض الهارين من الرصاص والدمار وكل طفل يمك
كتاب التاريخ».

راجيه: نعمه فيه آيه ياختي أدخلى أدخلوا يا ولاد..

يرضى مين يارب الشحطه والخوف والفرع والظلم ده.

راجيه: عماد.. شفتيه يا نعمه.. ردى عليه

نعمه: عماد بخير يا خالتي بخير وبيسلم عليكموا كلکم

راجيه: أمال وشك مخطوف كده ليه

نعمه: تعبانه شويه.. عندى احساس بالغثيان

راجيه: معقوله يانعمه.. أوعى تكوني.. آلف مبروك

سامع يا حاج

سالم: أحمدك يارب مبروك لينا كلنا

لما ربنا يريد.. كله بأمره

«طفل يتأوه من أثر جرح فى يده» «نهرع إليه نعمه»

نعمه: إجمد يا بطل ده وسام على صدرك يامصطفى دم الثورة اللى
بيحرر التراب والأرض.

الطفل: كل البلاد إتحررت بالحجاره؟

حسن: لا يا ابني الحجاره رمز للمقاومه وإعلان للجميع أننا مش
حنسلم ولا نستسلم للمستعمر الجبان اللى محاصرنا فى كل شبر وكل
مكان مانع عنا السلاح والرجال والمعونه والعلاج والمياه والنبض.

طفل: وفى المعارك كل شئ مباح

أنيس: بس دى مش معركة المعركة لأزم تكون متكافئه ولها قانونها
وأهدافها دى مذبحة مذبحة بمعنى الكلمه إباده جماعيه ما بتفرقش ما
بين راجل مدنى ولا كهل ولا طفل ولا مسن.

حسن: ماهيه دى مباح اليهود وهو ده أسلوبهم خسه ونداله وانتصارات مزيفه.

نعمه: سجلهم مليان ومتعبي مذبحه بلده ناصر ودير ياسين وبلده صالح وصابرا وشاتيلا والأقصى والحرم الإبراهيمي ودير ياسين مش كل دى مباح سجله باسمهم القدر.

حسن: بس برضه زى ما فيه مباح سجله فيه برضه أبطال كتبوا بدمهم تاريخ المقاومة والصمود اتحدوا القهر والموت من حياه البلايس لمحمد الندره شهداء العرض والأرض والدين والقدس.

«يدخل عماد متسللا من النافذه يرتدى ملابس تنكريه ويكمل الحوار» يلتفت الجميع حوله. تهتف نعمه عماد

راجيه: ابني حبيبي

سالم: عماد ابني أنت بخير

عماد: والمقاومه حتستمر وحتمتد فى كل شبر على أرض فلسطين النفوس اتحررت من سجن البدن والخوف وما عدناش نصدق عهود وبنود واتفاقيات وهميه وشباك وكماين وكذب وزور.

خلاص إنتفضت الأرض وهزت كل اللي عليها وكشفت القناع وسقطت كل الأقنعه المزيفه

راجيه: تعالى فى حصن أمك يا حبيبي

سالم: عماد.. تعالى يا بنى نفسى أحسن عليك اطمئن عليك.

أنيس: عرفت تعدى من الحصار إزاي ياعماد

عماد: كان لازم أشوفكم كلكم واطمئن عليكم نعمه وبويا أمى
المستقبل اللى سايه فى إديكم ياولاد أمانه.

راجيه: فيه إيه ياعماد.. حاسه بصوتك متغير.

عماد: أبدا ياما أنت بس متهايا لك

سالم: سلامتك يا با فيه إيه

«يوجه حديثه لنعمه».

عماد: كملى مشوارك يانعمه وكمئى حكايتنا و اكتبها

سالم: نعمه حامل ياعماد . وحتجيب الوله..

مش مهم نعمه اللى تحيب الوله.. المهم الأرض تولد أبطال أرضنا
ولآده يابا ونعمه حتجيب مقاتل يا أمه.

عماد: رضيعه غضب وثوره خليه يشم ريحه الأرض يانعمه ترعرع
فى عروقه وتفرع إراداه فى شرايينه ويكمل حلمنا وأنتم ياولاد.

حلم عمرنا حطوا أيديكم فى إيد بعض واثبتوا تبتوا ف الأرض دى
الأرض عرض والعرض غالى..

سالم

ابنى.. بص فى عينه أنت ناوى على إيه

ولا حاجة يابا دلوقت قوى قوى جدا فوق ما تتصور كل منافذ
الضعف اللي جوايا إتسدت وبنت جوايا سد صوان.. حبيت الأرض
قوى يابا حبيت الحرية اللي بتحلم بيها كل الشعوب المسجونة وراء
قضبان الإحتلال.

راجيه: عماد يابنى.. أنا خايفه عليك

عماد: من إيه يامه بس خايفه؟ وإيه اللي ممكن يحصل لى

راجيه: الموت.. الموت يابنى

عماد: وإيه يعنى يا مه الموت

الموت ولف علينا من زمان يا ما بيكبر كل مابكبر وبيكتف آهات
الصوت.. الموت غمس معنا اللقمه وبلع معنا القوت إيه يعنى يامه
الموت.

راجيه: ومين اللي حيحمى الأرض لما شبابها يروح

عماد: من حيفا ونابلس والناصره

من يافا وأرض فلسطين

م القدس وم الأرض الخضراء

راح تطرح أبطال حطين

رجالهم بلامح تانيه

ف عيونهم عزم وإصرار

ف قلوبهم حلم الملايين
 عماد: راح تولد ثوره وثوار
 راح تولد يامه الأحرار
 نعمه: مش حثبور الأرض السمره
 ولا حتموت يامه فلسطين
 وأن مات منا ولد حنجيب
 بدل الواد مليون واتنين
 بس أن مات فى قلوبنا وطننا
 حنجيب يامه بداله منين
 طفل: كلامك جميل قوى ياأستاذ عماد نفسى أبقى زيك
 عماد: كلكم لأزم تبقوا واحد
 طفل: لوحدنا حنقدر؟
 عماد: نبدأ والكل حيحصلنا.. لغايه ما تكمل الدايره ونرفع رايات
 الحق ونكمل
 أنيس: نكمل الجمله يانعمه
 الصبح اللى أول حروفها لأ..
 لازم الجمله تبقى صح طول ما الإيدين الواعيه القويه هى اللى
 بتكتبها لما القلم يكون مداده ثوره.

وإرادته وعزيمته لأزم يكتب صح..

يتكلم ويقول للكل كلام صح..

الراوي: يابن خالي ويابن عمي

يلى نبضك هو دمي

مد إيدك يلاً سمي

نبدأ المشوار سوا

متقلش أنت ولا أنا

لأكلنا مع بعضنا

حنخضر الرمله

ونزرع سوسنه

جوه التراب اللي شرب

من دمنا

دم الفدا اللي سال لهيب

الراوي: يلى واقفين ع المفارق

قربوا دلوا الغريب

حرروا صوت الجرس

جوه الكنايس

والآذان جوه الجوامع
حرروا دمه ألم جوه الحارات
وامسحوا دمع الشوارع
وارفعوا رايه العلم
شايفه مريم واقفه
بتنادى اللى تايهه
واخذه عيسى ف حضنها
والرسول فوق البراق
يوصينا نحمى عرضها
أنيس: شدوا من جوف التابوت
عزم الرجال
واكتبوا أغلى الحروف
أروا الشراقي والرمال
بالدم والموت الخلال
حسن: واكشفوا زيف الزمن
اخلعوا قناع العفن
عماد: أخرج يا مارد م الكفن

نعمه: أخرج يه'مارد م الكفن

الجميع: أخرج يا ماردم الكفن

«موسيقى ثوريه، وتؤدي أغنيه في إصرار وثوره يشترك فيها الجميع»..

أغنيه: غضب غضب غضب غضب

غضبٌ سيحطم أغلالى

غضبٌ سيفجر بركانى

بسيوف الحق بإيمانى

ستعيدُ القدس العربيه

فى أرضى غضب وسمائى

غضبٌ بوريدى ودمائى

بيمينى غضب ويساوى

غضبٌ سيفجر إعصارى

ونعيد القدس العربيه

غضبٌ قد ضاق بقضبانى

بالسجن ووجه السجنان

بالحجر سأعلن عصيانى

سنعيدُ القدسَ العربيّه

غضب غضب غضب غضب

«يسمع الجميع صوت أقدام تقتحم وتحاصر المنزل وصوت يطالب
بتسليم نفسه».

يتساقط الأطفال وتظهر نعمه تمزق ثيابها وتنقل الأطفال وتضمّد
جراحهم إلى أن تكاد تتعري.. يدخل الجنود».

يهودى: إذا هرب عماد.. مش مهم

لكن فيه اللي أهم منه مستقبله إمتداده حلمه سنأخذك أنت يانعمه
والولد اللي أنتى مستيناه...

لأزم تموتى ويموت حلمكم معاكم

«دائره الجنود تحاصر نعمه وتدر حولها مهدده مصاحب ذلك المشهد
موسيقى تعبيريه إلا إن يقتربوا منها وسط ترديد الموجود على خشبه
المسرح...»

سترك يارب

«تلقي أبيات الناس للاستمرار والمشاركه... وفي ثناء ذلك يدخل
الجميع واحد تلو الآخر داخل الدائره وأولهم عماد الذى يعود ليدافع
عن زوجته ومستقبله حتى تفتتح الدائره وينحسر وجودهم ويصعد
إناس آخرين من داخل الصابه ليصعدوا على المسرح ويتجمهروا

وكلما صعد فرد أختفى فرد من اليهود إلى أن تنتهى الآيات مع ظهور
نعمه صامده والجميع من حولها...»

الآيات

الرواية: قوم يا ولدى

عدى فوق النور وخطى

جوه منك نار وثوره

صوت إرادته أمه حره

الرواية: صوت ترابك بينا ديلك

شق عتمة ظلم ليلك

خلى صوت الحق يعلا

شد طرف النور يجيلك

أنيس: قوم وعدى بس حاسب

فجر كاذب بيناديلك

لجل ما يغرق قلوبك

لجل ما يحدد مصيرك

حسن: جوه منك ألف مادنه

والآدان أهو آن آوانه

فين إرادته شعب ناضل
 لجل ما يحقق كيانه
 جوه منك ألف طاقه
 راح تقول سمعا وطاعه
 لو نأدى الفرض حاضر
 والجهاد أفضل جماعه
 الراوى: بس حرس خلى بالك
 ميت شيطان واقفين قبالك
 والقرار ما بقاش قرارك
 والديابه فى عقر دارك
 الراويه: ولو تسلم مش حتسلم
 راح تموت لو يوم حتسلم
 لو تغير لون ملامحك
 أو تسلم لحظه رمحك
 قلبى مش ممكن يسامحك
 أنيس: بس لسه النبض سارى
 جوه شريان الحقيقه

صوت يبصرخ جوه منك
لسه فيه مليون طريقه
حسن: قوم وشارك بالتحدي
علّي صوتك مره ثور
قول لكل الدنيا ديه
ياضمير الإنسانيه
لما قاضى يمد إيده
الجميع: الشهاده بتبقى زور
حسن: والحقايق تبقى ضايعه
الجميع: والعداله ف أرض بور
الراوى: قوم وقول الحق عربى
خلى كل الدنيا تقرأ
فوق جبينك إسم عربى
الروايه: خط فوق جدران سكوتك
مش حبييع وبنخط عربى
ده التاريخ والأصل عربى
حسن: والتراب فى القدس

الرواي: بيناديننا بحس عربي

الجميع: قوم ياولدى

قوم ياولدى

قوم ياولدى

«يمكن أن يشترك الجميع فى إنشاد هذه الأبيات ولا تقفل الستار لأن العرض مستمر إلى أن تحل القضية ويصل الصوت».

هیه دی یا ولادنا مصر

من الديوان القادم

هيه دي يا ولادنا مصر

مصر يا بني مش رياسه

ومش حكومه

ولا هيه حزب الأغلبيه بالضروره

مصر يعني الناس وطيبه قلبهم

يعني الشوارع والحواري والهرم

ونساييم النيل اللي شايل

حمل قاسم ضهرهم

ضحكة ميلاد الضىّ ف عيون النهار

اللي إنفلت من بين كفوف الليل

يحابي على البنية والولد

مصر اللي عارفينها ف تاريخنا اللي إنسرق

كانت غضب.. ثورة قلق

كانت خلاصة الكون ف ساعة ما تخلق

طهر الندى يوم ما ابتدا
بدء الكلام والبسملة
قلب إتوجع يوم ما ابتدع
فرعون وحرّاس الكنوز
شرع اللصوص والفرّ عنه
هيه الفرع وهيه الأصل
جدر اتمد ف جوف الأرض لسابع جد
بريحة الود وحبل الوصل
هيه الوردة وحد النصل
وهيه آهات الوجع
وهيه ضربة الودع
قلب العروبه اللي اتوجع
م الشحتفه
إحساس يطبطب ع الكتاف
وف حضنها صهد النفا

محفوظة يا سوره الوفا
تسقيك صهيلها ف الخفا
ترقيك نقولك بالشففا
من شر حاسد إن حسد
هي لحظة بوح وروح بتروح وتتخلق جسد
هيه ريق الفجر سرسوب الأمل
اللي اترسم يوم ما اتسند
حيله وميل ع الجدار
طبق الحليب اللي اندلق وقت الحصار
هيه السنابل والعيدان
مصر أبراج اليمام
من ألف عام
هيه العروسه والحصان
مُهرة ودفعت عمرها لأجل الوطن
طَرَح النضال في عيونها شوْكُه ونخلتين صبار

هيه الناس .. والكون . والحته

والضحكاية اللي ف سراديب كراكيب أيامنا

بنخبيها ونطلعها ف وقت الشدة

هيه السبحة والدراويتس

نن القلب الصاحي بيحلم ع الكورنيش

هيه الهس وبس ما فيش

لسعة دمعة بتعصر قلبك

تحرق خدك تنزل تتسحب بشويش

هيه الحسين الأزهر

وشارع نحمده

وصل العروبة والمحبة اللي إنكتب بالدم

من ألفين سنه

ولوحدها بتجدده،

لو كان في دين احنا ولادها نسده،

مصر ريحة الأرض وغيون السما

طعم الأماكن والبيوت

رافضه السكوت والموت على حدود الألم

صورة وطن محفورة جوّه قلوب مموتها العطش

هيه قرص الشمس رحمه

للغلابه الشقيانين

وعروق بتصرخ م الجفاف

في الليل بخاف

من رعدة العجز المبين

هي الأم اللي منكفانا ومنكفينها

وندعي عليها ونكره اللي يرد أمين

هي الجواب والأسئلة

ريحة التراب والأمكنة

نبض الأمانى المستحيله الممكنه

يا ربنا

إحميها من شر العمى

من شياطين الإنس وتلاب العسس

واشفيها من داء اخرس

واطلق رصاصة رحمتك

تهرب خفافيش الوطن

ما فيش حاجة

ما نيش محتاجه أنا حاجة
ولا عايزه خلاص حاجة
ولو طمعانه أنا ف حاجة
ما ختوليش ولا حاجة
عموما بصوًّا فيه حاجة
حقولها بس محتاجه
عقول تفهم ولو حاجة
ما هيش مفهومه أو حاجة
نفسِّرها بكام حاجة
واهي حاجة مع حاجة
حتظهر وتبان لنا حاجة
وأنا.. ما بخافشي من حاجة
ما نيش مسنوده ولا حاجة

لكن ما بنخافشي من حاجه
وأساسا مش حقول حاجه
لكن فرضا لو حقول حاجه
حيحصل إيه؟ ولا حاجه
حيعملوا إيه؟ ولا حاجه
وبعد الشر لو واحد م السامعين
من الضالين فهم حاجه
حيعملوا إيه؟ ولا حاجه
فتتوكل على الستار
لوجه الله نقول حاجه
فيه ناس بتعيش عشان حاجه
وناس بتموت عشان حاجه
وناس بتموت على الحاجه
وناس تديلك الحاجه
وتبقى ليها محتاجه

وناس تديلك الحاجه
تاخذ قدامها ميت حاجه
وناس تكبر تكون حاجه
وناس تصغر عشان حاجه
وناس منظر ومش حاجه
وناس تحلم بحلم بسيط
وتصحى وما تلقيش حاجه
وناس تنهب في خلق الله
ولا حدش يقول حاجه
وتلقى كبير حرس ونفير
عليه منظر وهو جبان
وشيخ منصر ولا حدش يق قولحجه
كلامي يا خلق فيه حاجه؟
لحد دلوقتي فيه حاجه؟
كلام عادي وبسيط جدا

ولا فهشي ولا حاجه
ما أنا مقدرش أقول حاجه
صحيح نفسي أقول حاجه وميت حاجه
لكن مش قادرة أقول حاجه
لأنني لو حقول حاجه
حيجي ناس بتوع
وياخدوني على الحاجه
ويمكن أروح ورا الحاجه
وهوه لو سمع حاجه
حيعملوها لي ميت حاجه
عموماً بصوا
لو واحد من القاعدين
عايزني أبلغه بحاجه
يقول ما يخافشي من حاجه
نعم فـيـه إيه؟

ولا تديس ولا تهجـيص
ولا حـاجـه
سـمـع .. مع .. هـس
أنا حاسه إن فيه حـاجـه
دقـيـقـه سـكـات
لـتـبـقـى حـدـاد
أنا حاسه إن فيه حـاجـه
زـمـانـكـوا يا خـلـق فيه حـاجـه
ولـازـمـه كـام ومـيت حـاجـه
ده لو كان يعنى فيه حـاجـه
أنا عن نفـسـي
مـش حـاسـه ولا حـاجـه
ولا مـتـضـايـقـه ولا حـاجـه
سـمـادـتـك بـرـضـه مـش رـي
مـا فـيـش حـاجـه

جنابك برضه مش زيّه ما فيش حاجة
مما أنا قلت لكوا م الأول
ما فيش حاجة
عليه النعمة يا أخوانا
ما فيه حاجة
ورحمة أبويا ويا أبوك
علي اللى جبابوك
ما فيه حاجة
وعهد الله وعهد الله وعهد الله
مما خلوا لنا ولا حاجة
وبقــــــــــــــــولك إيه!!
خــــــــــــــــلاص.. خلّص
وفرکش يلا يا أخوانا
ما فيش حاجة!!

آخر بيان البغبنان

آخر بيان للبغبنان

كان بهبهوني مافهمنا هوش

بغبن وقال بقين كلام

والمعنى إيه؟ ما فهمنا هوش

معقول يكون البغبنان

اللي تبغبن من زمان

صماويل جنباه اتلخلخو'

طول عمره سايق في الجنان

والعقل عامل شقلبان

قام جابله أورطه يمحمنخوا

عملوا وطن من غير بيان

واتملكوا فيه الغيلان

ووطن جعان ازاي ينام؟

والطمعجيه في خيرہ ناموا وانتخوا

والبغغان يكره يموت

يسمع سكوت المحروسين

وإن قلت بهم

قفاك یرن عليه آيادي المحروسين

ويجرجروك إنت وزووك

زي الخروف

ويسمعوك يادي الكسوف

لستة كلام ما أبوخه

والبغغان اللي تبغغ

كل من قرب حداه اتبغغوا

جم طرمخو ع الطرمخان

واللي يطر مخ يسطه وينغنغه

وف مجلس البغايغ

بتلقى البغغان

قاعد يبغ بالكلام
يضحك وهم يستسخنوا
ما تقلش يعني الأولعبان
ابن الجبان اللي ف بلاد الأردغان
هوه اللي كان بيزغزغه
يارب تهدي البغبغان
واللي تبغ يوم معاه
إقصف رقبتة ودغدغه
والهي يوم الممعمان
ألاقاه هناك وكثير معاه
م الباغبغ اللي افتروا
يوم أو بغوا
وما تقلقوش ما تقلقوش
م البغبغان السكره
كتالوجه بيقول إظبطوه

وانتوا تلاقوه ماشي لورا
صلاحيته لن تنتهي
وخدمته عفوا أخي
آخرتها هيصه ومسخرة
يا خلق لأوا اللاه قوموا اتلحلحوا
شوفوا الكلاب
حتى الكلاب لو لاقوا يوم
واحد حرامي بينبحوا
وانتوا اللي ضايع عمركوا
وانتوا اللي مسروق حلمكوا
مش عارفه ليه بتنحوا
سجانه مين حكّم عليكموا البغبان
تستاهلوا ميت مليون كمان
ونصيحتي ليكوا تروحوا
وإن شفتوا مره البغايغ
جاين عشان يبغفوكوا
اتبغفوا.. اتبغفوا

فهرس اشعار
ایمان بکری

الفهرس

الصفحة	العنوان
5	الديوان الأول عجائب يا زمن
7	الإهداء
9	• الشاعر
11	• عيب
12	• مين ليه
16	• عد الآهات
20	• أنا طرطور
24	• الجمعيات
26	• ونقول يا مين
31	• حلم
34	• المحاكمة
40	• أنا إنسان
42	• بغنى لمصر
48	• ديدى إيه
52	• مخى يا ناس
55	• أنا مش نبى
61	• أهل المغنى
63	• التعليم
65	• السكوت محال
68	• أحلف يمين
72	• رسالة من هريدى (باللهجة الصعيدية)

العنوان	الصفحة
• وردة إيه ؟	75
• كيدهن عظيم	78
• النيل ييكى	80
• ياما كان	83
• أعضاء مساطيل	86
• الهلفوت	89
• تصقيف	91
• الهروب	94
• الصيام	97
• يا شمس	100
• انتباه	101
• أهل الطب	105
الديوان الثاني المصححاتى	113
الإهداء	115
• وتر السكوت	117
• ياريتها تعود ليالىكى	122
• عجبى	127
• سألوني النونى	128
• ألف باء	131
• قال لك إيه	136
• ويعيش ويموت	141
• خير الكلام	146
• أنا وليدك	149

الصفحة	العنوان
151	• أم الطيبين.....
156	• إظهار وبان.....
159	• سطور الأبجدية.....
163	• يا ضمير الإنسانية.....
164	• إتمشي النهار.....
168	• الحاوى.....
172	• أنا الأديب.....
175	• نيام نيام.....
178	• الشنجرنو.....
180	• كان فيه واحد.....
184	• الشاعر.....
185	• صباح الخير (١).....
187	• صباح الخير (٢).....
190	• صباح الخير (٣).....
192	• صباح الخير (٤).....
194	• الأوله.....
198	• رجال.....
200	• سلام يا صاحبي.....
203	• بغبغوه.....
206	• اليوجا.....
208	• أهلك لتهلك.....
211	• فى ناس وناس.....
213	• المنحوس متعوس.....

الصفحة	العنوان
217	● كله تمام.....
219	● المصححاتى.....
225	الديوان الثالث قصر الكلام.....
227	الإهداء.....
233	● صباح الفل.....
235	● شقالبظ.....
238	● أولها.....
240	● حلم.....
242	● آه ياوطن.....
246	● خروف العيد.....
248	● سجن البدن.....
250	● معني السكوت.....
254	● وليه لأه.....
258	● عروق لكلام.....
262	● قال الوداع.....
264	● اصرخ بعزم الصوت.....
267	● حلي الضفاير.....
272	● خلويص بقي.....
278	● ولاد ال.....
284	● طظ فينو.....
289	● قوم ياوندي.....
295	● دعوة اعبد اللّيم.....
300	● عمي البصاير.....

الصفحة	العنوان
302	• كيد النساء.....
305	• الديمولوجية.....
310	• برضه .. بحبك.....
314	• بحب إيه ؟.....
320	• كليلة ودمنه.....
323	• أنا مين ؟.....
324	• رسالة بالإنبابة عن إسماعيل يس.....
328	• كوكو.. كوكو.....
331	• ياعم يا جمال.....
335	• بحبك يابلدي.....
340	• الشهادة.....
346	• موال لمصر.....
347	• حروف اسمك.....
348	• المغنواتي.....
357	• الديوان الرابع الديك دا طور.....
359	• الإهداء.....
363	• حظي العفش.....
369	• مليون سلام.....
376	• بريئة أنا منكم.....
383	• ماكرينا.....
386	• صعيدي في الواي بلاتيشن (باللهجة الصعيدي).....
391	• الفاتحة للحكام.....
395	• بانوراما.....

الصفحة	العنوان
405	• أخرتها طيط
409	• هل ده يحصل
413	• رسالة من عبده مشتاق بعد ما تجنن وفاق
425	• حكم الهوي
427	• الجبن وسنيته
430	• مبروك عليكوا
431	• عليكوا السلام
435	• الديك - د- طور (باللهجة النوبية)
438	• دستور يا سيادنا
443	• ألا أوانه
453	• صرخة عربية (مسرحة بالعامية المصرية) ١٩٣٠-٢٨١
541	قصيدة من الديوان القادم
543	• هيه دي يا ولادنا مصر
549	• ما فيش حاجة
556	• آخر بيان البغبغان
561	الفهرس